







33987/A/2



33987/A/2

F. III

16/12











DE  
CURANDIS  
FEBRIBUS CONTINUIS,  
LIBER.

IN

Quatuor divisus SECTIONES:

Quarum singulæ singulorum Morbi  
*TEMPORUM*,

Quæ totidem quoque sunt numero,  
*REMEDIA* continent.

---

AUTHORE  
*FODOCO LOMMIO*,  
BURANO.

---

LONDINI:

Impensis GUL. & J. INNYS, ad  
Insignia Principis in Cœmeterio  
D. Pauli. MDCCEXVIII.





6





Celeberrimo Viro,  
JOHANNI FREIND, M. D.

Collegii Medicorum *Londinensis*, &  
Societatis Regiæ

S O C I O.



UM morbi, quo  
jamdiu laboro,  
depellendi spe, ad  
Te, Vir Clarissime, nu-  
per confugerem, cumque  
ei Professioni, in quâ Tu  
A 2 inter



inter primos locum obti-  
nes, me nomen dedisse in-  
telligeres : non modò cum  
summâ benevolentia vale-  
tudinis meæ suscepisti cu-  
ram, sed etiam de ingre-  
diendâ Studiorum viâ per-  
multa mecum es huma-  
nissimè collocutus. Ita,  
cum sanitatem mihi quo-  
tidie restitueres, iis inte-  
rim me præceptis infor-  
mabas, quibus aliquando  
aliis etiam salutaris es-  
se possem. Illud quidem  
conservatæ vitæ benefici-  
um

um quanquam magni æstimare debeo, atque, uti par est, æstimo: huic alteri tamen nequaquam esse censeo comparandum, per quod efficis, ut quam vitam nolim otiosè traducere, eam, per Medicinæ devia errando, laboriosè inutilem non transigam. Siquidem hortabar, ut quamprimum ostenderem, memet esse, quoad ætas pateretur, aliorum commodis inserviendi cupidissimum. Id au-



*tem fieri posse judicabas,  
si ex hominum propè me-  
moriâ jam elapsum, Lom-  
mii, De Curandis Fe-  
bribus Continuis, Tra-  
ctatum Orbi Literato re-  
donarem. Ego verò lu-  
benter hoc suscepi munus;  
quippe quod neque recon-  
ditioris Scientiæ, neque  
ingenii quicquam, sed cu-  
ræ duntaxat aliquantu-  
lùm desideraret. Hoc in  
Te simul, tanquam præ-  
stantissimi Ingenii notam,  
nequeo non summo opere  
ad-*

*admirari: quòd, dum  
nostræ Ætatis Authores  
Scriptis obscuras Tuis,  
aliorum etiam de Re Me-  
dicâ bene merentium O-  
pera intermorta excita-  
re, atque in lucem pro-  
ferre contendas. Quod  
Tu quidem per alium re-  
ctè facis; quoniam, quod  
ab Ægrorum assiduâ cu-  
ratione tempus Tibi reli-  
quum est, id, tùm in le-  
gendis, atque illustrandis  
Veterum Monumentis,  
tùm in Arte præclarissi.*



*mâ per Tuas Lucubrationes ulterius promovendâ, studiosius impendis. Ecquid autem insperatius mihi unquam evenire potuit, quàm ut huiusmodi quicquam mihi demandares, & operam ullam, cui quidem ego defungendæ par essem, Tui nominis celebritate commendari permitteres? Ecquid revera mihi magis fructuosum, quàm ut a Te, quem propter incredibilem Tuam, & in singulis Medicinæ*  
*par*

partibus, & in omni Li-  
teraturæ genere Scien-  
tiam, summis laudibus  
effecerunt Principes Gentis  
nostræ Medici, a Te, in-  
quam, ego prima Artis  
elementa haurirem, &  
Studia mea in Tuâ ipsius  
Domo feliciter auspica-  
rer? Ea persequi in Æ-  
de Christi gratissimum  
erit; quam Tu quidem  
non solum amas, & colis:  
sed etiam claritatem eam,  
quam ab illâ quondam  
accepisti, nunc in illam  
vicissim



THE UNIVERSITY OF CHICAGO  
LIBRARY  
1215 EAST 58TH STREET  
CHICAGO, ILL. 60637  
U.S.A.

THE UNIVERSITY OF CHICAGO  
LIBRARY  
1215 EAST 58TH STREET  
CHICAGO, ILL. 60637  
U.S.A.

THE UNIVERSITY OF CHICAGO  
LIBRARY  
1215 EAST 58TH STREET  
CHICAGO, ILL. 60637  
U.S.A.



LIBRARY



# LECTORI EDITOR S.



LIBRUM Tibi in manus  
trado, *Lector benevole*, nisi  
semel antehac, quod sciam,  
idque annis abhinc supra  
centum & quinquaginta, non impres-  
sum. Eâ Artis scientiâ fretum, *Authorem* habet *Lommium*, ut Meden-  
tium studiis sit apprimè utilis: eâ lo-  
quendi venustate, ut, inter aliarum  
etiam Literarum cultores, non defutu-  
ros



ros esse sperem, quos Opusculi brevit-  
tas, Sermonisque elegantia ad ejus le-  
ctionem, ipsis fortasse non mediocri-  
ter profuturam, invitare possit, atque  
allicere. Nam siquem, in utilissimâ  
jucundissimâque *Medicinæ* cognitione,  
plusculum operæ collocare neque ani-  
mus ferat, neque tempus finat : pau-  
culas ei tamen horas otioso licet insu-  
mere, ut adversus *Febres Continuas* fe-  
tueri queat, atrocissimum Morbi ge-  
nus, maximèque vulgare. Ferè au-  
tem, inter initia valetudinis, ex quo-  
rum procuratione vitæ mortisque mag-  
nâ ex parte pendet eventus, ab ipsis  
*Ægris* gravissimè peccatur ; vel quia,  
propter nimiam securitatem, non ve-  
lint, vel quia, ob loci incommodita-  
tem, Medicum non possint arcessere.  
Itaque nemini supervacaneum esse po-  
terit, ut, in Morbo hoc acuto, ac bre-  
vi, vel sibi aliquam ipse opem præsta-  
re, vel saltem noxam non inferre ad-  
discat.

Cui rei maximè idoneum esse hunc, quem jam publici juris facio, *Tractatum*, quisquis eum legerit, facilè percipiet. Neque enim reperietur ille falsâ Philosophandi specie perplexus; quo scribendi genere ita nonnulli Medicorum insaniunt, ut *Ægrorum* deliria, pro veris rationibus, æquo jure amplecti potuerint: neque contra *Præscriptorum* formulis confertus; quibus adcò *Recentiorum* intumescunt Volumina, ut inter varia Remediorum genera ipsam ferè Medicinam jamdiu amiserimus. Nihil certè proponit *Author* prudentissimus a communi pæne omnium sensu, captuque semotum; frequentem verò Medicamentorum ingestionem acriter impugnat: curationem ferè hujus Morbi per tempestivum debitumque *Venæ sectionis* usum, ac *Victûs* rationem exequens.

Quod ad *Sanguinis* attinet *detractionem*, locum hunc tam dilucidè, atque amplè pertractavit, ut, qui in *Medicina*

nâ



nā non sit versatissimus, haud gravibus  
sanè in hâc re erroribus implicari posse  
videatur. Quod quidem leve videri  
non debet ; cum Febricitantium pluri-  
mi, vel, neglecto per initia Morbi hoc  
Remedio, Sanguinis abundantia, atque  
impetu tandem obruantur : vel, juxta  
Vigorem præposterè adhibito, dejectis  
viribus ocysimè jugulentur. Sanè, quod  
ad hoc argumentum spectat, si vel *Re-*  
*centiorum*, vel etiam *Veterum* scripta  
consultamus, invenietur nemo, qui Ve-  
næ secandæ leges, hâc in Febrium spe-  
cie tenendas, judicio tam exquisito  
tradiderit.

Cæterum, in instituendo *Victu*, quod  
Alimenti genus, tanquam apprimè con-  
veniens, *Hippocratem* maximè secu-  
tus, proposuit, id etiam Ægrotantibus  
plerumque gratissimum esse contingit,  
nullique unquam non parabile. Porro  
refrigerantia pocula non parcâ manu  
porrigit ; quæ quoniam, & Febrilem  
materiam diluunt, & æstum tempe-  
rant,

rant, Ægris & tutam, & jucundam curationem præstant. Ita ut frustra sint ii, qui, recenti satis memoriâ, de Sanguinis missione, & de Potionum diluentium usu, nova se quædam, ac priùs inaudita protulisse jactitârint; cum nihil in eorum scriptis de his rebus occurrat, quod non antea, vel ab *Hippocrate* præceptum, vel ab hoc ipso *Lommio* uberrimè fuerit explicatum.

Illud autem animadversione dignissimum est, quòd, in ultimo ferè Incremento Febris, novam, ut ipse prædicat, maximèque interdum efficacem secutus sit medendi rationem. *Lenem* scilicet *Purgationem*, appropinquante Morbi Vigore, cum judicio adhibuit; ita ut neque, in summo discrimine, intrò manentis materiæ corruptione opprimeretur Natura, neque vires tum, cum iis maximè opus esset, acrioribus Medicamentis labefactarentur. Id quod etiam, in *Variolis*, jam ad maturitatem



profectis, præclarissimi nostræ Ætatis Medici, magno cum Ægrotantium comodo, sapienter imitati sunt.

Ad curanda Febrium Symptomata, quæ Mortales gravissimè exercent, atque cruciant, Remedia tradit, uti admodum utilia, ita communia maximè, ac facilia; ubi illum, non solum ad Ægrotantium salutem, sed etiam ad levationem, & solatium non parum attendisse reperiemus.

Jam, in ipso dimicationis puncto, Naturæ optimum sese adiutorem, atque socium adjungit; quam quidem, non, uti fidus fortasse, sed hebes famulus, quocunque trahat, retrahatque, subsequitur: sed, tanquam vetus minister, & sagax, Magistræ suæ quasi nutum observans, viam illi, quamcunque ingredi velle videatur, interclusam aperit, impeditam explicat, laboranti novas ad assequendam metam vires opportunè suppeditat. Siquidem, quo tempore & Medentis Solertia præcipuè

puè perspicitur, & desideratur ars, tùm  
diversarum evacuationum imminentium  
præfagia, tùm promovendarum ratio-  
nes, cum admirabili brevitate, atque  
elegantiâ, descripsit.

Atqui per universum Operis teno-  
rem summa ipsius prudentia, ac mode-  
ratio elucescit; quòd neque aliorum,  
neque suæ pertinaciter addictus opi-  
nioni, ubique fervet mediocritatem  
quandam, ac modum. Hoc etiam *Autho-  
r*is nostri laudibus meritò adjici po-  
rest: quòd, sive Ætatem ejus, sive Gen-  
tem respicimus, tam disertum illum,  
tamque doctum extitisse, jure mirari  
valeamus. Etenim haud facilè invenie-  
tur quispiam, inter Medicinam facti-  
tantes, qui quidem iisdem temporibus  
vixerit, nisi \* Amicus ejus, *Fernelius*,  
qui vel ob lectionis varietatem, vel ob  
scriptionis excellentiam, ei ullo modo  
comparari possit. Suam nempe sen-

---

\* *Præf. Commentar. in Cels.*



tentiam Veterum Medicorum, maximè-  
que *Hippocratis*, experienciâ, atque  
authoritate comprobata, semper ferè  
munit, & corroborat. Quos quidem  
Authores celeberrimos, non solùm ut  
exscriberet, perlegit, sed etiam ad ex-  
amen revocavit. Eumque legendo mul-  
tùm profecisse sciet, quicumque artem  
illam eximiam, quâ Veterum Monu-  
menta, hoc in Libro, aut lucem, aut  
ornatum acceperè, perpenderit. Quòd  
si ii nonnihil aliquando inter se disside-  
re videantur, eorum opiniones, expo-  
nendo, & dilucidando, quantùm fieri  
potest, conciliat; si planè repugnent,  
collatis inter se diversis sententiis, ac-  
fideliter, accuratèque pensitatis, suum  
cuique momentum tribuit. Hinc, quàm  
longè *Arabes* Medici *Græcis* inferiores  
fuerint, ex eo fati intelligemus. Ne-  
que verò suspicari quispiam poterit,  
quòd, vel propter invidiam aliquam,  
vel partium studium, iniquus in hâc re  
judex fuerit. Nam eundem inter *Ara-*

*basi*

*bas* Scriptorem, *Avicennam* scilicet, cujus præcepta sæpissime repudiat, quémque ex ipsius ore falsi nonnunquam arguit, aliàs collaudare non dubitat. Siquando *Veterum* ipse vestigia deferit, non in eos, tanquam erroris Authores, temere invehitur : sed id liquidò commonstrat, omnes, qui eundem sibi proponunt finem, non iisdem semper, præsertim ob diversarum Regionum disparem situm, viis debere insistere.

Hæc, aliâque permulta, *Lector benevole*, in hoc Libro, observatu utilissima reperiēs : quæ dignissimum efficere, qui, in magnâ certè bonorum Scriptorum raritate, ab interitu jam-jam imminenti vindicaretur. Cæterùm opus hoc adèò mihi vitio non vertes, ut etiam felicitati meæ haud illibenter tribuere velis : cum *Virum* illum *Doctissimum*, qui superiore anno *Commentarios* suos in *Hippocratis Scripta Epidemia* (harum *Continuarum Historias*



rias enarrantia *Februum*) summâ arte,  
ac scientiâ elaboratos, ingenio perpo-  
litos, eloquentiâ illustratos, publici fe-  
cit juris, edendum mihi hunc Libel-  
lum in manus tradidisse cognôris. Ti-  
bi autem ego munusculum hoc gratissi-  
mum fore confido, cum id ab illo val-  
de comprobatum, Tuæ verò lectioni  
commendatum, ex ipsius Domo in lu-  
cem denuo prodiisse rescieris.



Jodocus

**J**Odocus Lommius Buræ, oppidi in  
Gueldriâ Batavicâ, propè Lingam  
amnem, natus est. Anno 1557, edidit,  
de tuendâ Sanitate, Commentarios in  
primum Librum Celsi; quo tempore,  
Tornaci apud Nervios egit; cujus Rei-  
publicæ, ut ipse dicit, Medicus fuit  
Physicus. Postea, Bruxellæ, Anno  
1560, emisit Observationum Medici-  
nalia Libros tres; in quibus omnium  
Morborum Signa, & quæ de his ha-  
beri possunt Præsagia, accuratissimè  
pertractantur. Quos Ordini Senato-  
rio Reipublicæ Bruxellanæ dicavit;  
Nerviis quippe relictis, in hâc tan-  
dem urbe, honesto stipendio donatus,  
Medicinam factitavit. Hunc demum  
in publicum dedit, De Curandis Fe-  
bribus Continuis, Librum, Bruxellæ,  
Anno 1562.

ILLUSTRIS.







ILLUSTRISSIMO HEROI  
CAROLO A BRIMEV,  
COMITI de MEGHEN,

D<sup>no</sup> de HUMBERCOURT, de HOUSDAIN, &c.

Equiti Aurei Velleris,

Gubernatori Geldriæ, atque Zutphanicæ,

JODOCUS LOMMIUS, S. D.



*Aud levibus sanè de causis,  
Heros Illustrissime, vide-  
tur accidere, ut Homo præ  
cæteris animantibus gra-  
viorum pluriumque insultu morbo-  
rum pulsetur. Nam etsi tempera-  
menti elementorum perfectionem, cau-*  
B *sam*

*ſam ſanitatſ meliorem acceperit brutis, quæ indies cernimus ſuavem ferè vitam, tædiique morborum caſſam tranſigere, luxu tamen, varietatèque epularum ac poculorum præclara hæc valetudiniſ ſeminaria corrumpit. Præter hæc, permultos quoquè videre eſt temperantes homines, ſimplicique contentos menſâ, vitioſo quodam corporiſ ſtatu morbiſ haud parum multis naturaliter implicari. Scilicet non ſolùm victuſ, aërque circumfuſuſ tædia conciliant ægrotationum, ſed & ipſa primituſ inſita natura, quæ ſæpe haud æquè ſtabilem nobiſ valetudinem, atque cæteriſ animalibuſ, videtur contuliſſe. Tùm adverſuſ horum improſperam ſortem hominum, tum ad corrigenda vitia aliorum, quibuſ vitæ intemperantia ſanitatem labeſecit, vi præſtantiâque mentis, quam ſoli homineſ inter reliquas animanteſ divinam æternamque poſſidemuſ, arſ quædam eſt reperta medendi, quam ideo Therapeuticeſ appellaverunt. Cum*

enim a primi Parentis Adæ lapsu  
corpusculum hoc non æquè, ut antè,  
absolutum vacuumque miseriis, at  
mille tædiis tùm malorum opportu-  
num aliorum, tùm etiam ægritudi-  
num, experiri Homo cœpisset; sicuti  
magnâ fuit necessitate coactus, ter-  
ram, quò feracem alimenti redderet,  
indefessis laboribus colere, reliquaque  
vivendi præsidia duriter emoliri; ita  
planè quoquè debuit adversus ærum-  
nas morborum certa quædam remedia  
ingenti solertiâ quærere atque expe-  
riri, ut ita scilicet meliùs saltem tra-  
duci vita posset, quæ optimè non po-  
test. Tantopere verò hæc ista morbos  
depellendi cupiditas, ne dicam necessi-  
tas, omnibus injecta est, ut jam inde  
ex tam longo ævo nusquam gentium  
non sit Medicina. Facile enim omnes  
sensere sanitatis esse incomparabilia  
commoda; ægritudines autem, tædii  
ac periculi plenas, animi corporisque  
functionibus officere. Itaque Virum  
Medicum, qui hâc in parte mortales



juvaret, apprimè coluerunt, tanquam multis aliis, ut Homerus ait, præstantem. Cujus rei gloria complures olim ad Medicinæ studium excitavit sapientes viros; qui, cum se scirent non modò sibi, verùm juvandis etiam aliis hominibus esse natos, salutaris quoque artis hujus professionem agita-  
verunt. Quorum ego insistere vestigiis, ex quo puerilibus literis sum exemptus, quantum pro virili licuit, cœpi. Vel aliquam ratus laudis partem, inter reliqua societatis hominum officia, eo comparari labore posse, qui indies in avertendo excludendoque humanæ valetudinis hoste desudat. Itaque hætenus etiam eò operam meam omnem contuli, conferamque posthac, non solum medendo, id quod jam totum factito decennium, verùm etiam commentarios scribendo Medentium studiis utiles.

Ut autem pro tempore aliàs alia memoriæ prodidi, ita nunc visum fuit continuæ febris versare curationem.

Conti-

*Continuam voco, quæcumque vel ex omnibus nata putrefactis intra vasa humoribus, vel ex unico tantum, jugi continuatâque accessione hominem exercet. Dignum apprimè id genus morbi visum est, cujus recta curatio proponeretur. Creber enim ejus est, ac ferme popularis per æstatem insultus, plurimosque is ipse mortales medio flore ætatis tollit. Siquidem præcipiti ac periculoso movetur impetu, adeoque celeriter vel resolvitur, vel occidit. Ut ne dicam etiam vix ullum morbum reperiri alium, in quo sanando æquè hodie frequenter, æquèque turpiter, ne dicam flagitiosè, peccetur. Nam vel sanguinis missio, si-ve intemperanter, si-ve alienis suscepta temporibus, quot acutè febricitantes neci dedit? quot item malè conciliata perdidit purgatio, jugisque continuatio medicationum? Nimirum in eâ feбри, quæ unicam non est superatura septimanam, ut multi faciunt, primo die alvum solvere, secundo se-*

quilibram sanguinis, incisâ venâ, de-  
trahere, tertio lenitivum bolum pur-  
gandi causâ dare, quarto injicere  
clysterem, quinto perpurgare, sexto  
septimove, *ferocientibus juxta statum*  
*symptomatis*, rursus fecare venam,  
*quid hercle aliud est, quàm agrotan-*  
*tis vires vitamque unâ cum morbo*  
*studere tollere?* Cujusmodi errores  
(quos certè gravi dolore animi com-  
mitti video) ideo sunt detestabiliores,  
quòd cum aliis in morbis, naturâ lon-  
gis, correctionem interpositis admit-  
tant temporibus, in acutis tamen fe-  
bribus, ceu multùm alioqui mobilibus,  
non admittant, semperque multam in  
se se secuti exitii claudant culpam.  
Ergo etiam hìc, quid quâque parte  
sit peccatum, & quæ vera curandi  
sit via, propono: quam quidem ip-  
sam ratione comprehensam viam, at-  
que antiquorum sultam præceptis,  
longâque medendi experienciâ com-  
probatam semper pro voto meminisse  
respondisse.



*Hos Tibi labores, Illustrissime Comes, ideo dicavi, quòd nullum sentiam officii atque obsequii genus a me præteriri oportere, quo saltem aliqua fieret grati animi significatio, pro favore illo præcipuo erga me Tuo. Qui quidem favor, inter cætera sui argumenta verisimilia, vel ex eo quoquè perspicitur, quòd ab aliquot jam elapsis annis me Tuæ delegeris valetudinis custodem Medicum; ac libenter, multâque voluptate de naturalis sapientiæ studio, adeóque de rebus medicis audias differentem. Quâ in re, etsi plura mihi abs Te tribui, quàm merear, scio, pergratum tamen est tanto Principi nostra non displicere. Quid verò Te non tantum ego Principem appellem, qui maximis animi virtutibus pace, belloque probatis, qui heroici generis claritate, qui fortunæ dotibus es eminentissimus? His laudibus accedit, quòd non modò Te iis benevolum exhibeas Mecænatem, qui ingenio, professionéque liberalium*

*Studiorum sunt præstantes, verùm  
quòd ipse quoque bonas literas nôris.  
Quàm verò præclarum id demum vi-  
detur, ad nobilissimæ familiæ, impe-  
ratorio stemmate oriundæ, splendo-  
rem, itemque ad artis militaris glo-  
riam, rerumque fortiter gerendarum  
dexteritatem, studiorum quoquè cul-  
tum accessisse. His Te, Generosissime  
Comes, ornatum laudibus, tanquam  
perpetuis tui nominis insignibus, Deus  
Opt. Max. diu patriæ servet incolu-  
mem. Vale, ac tenue munusculum  
ab humili cliente, Medicoque profe-  
ctum Tuo, hilariter admitte.*

Bruxellæ Kalend.  
Septemb. An. 1562.



DE CURANDIS  
FEBRIBUS CONTINUIS,  
SECTIO PRIMA,  
*Quæ earum continet Principium.*



C A P. I.



Ngentium plenæ periculo-  
rum, vitæque hominum  
inimicissimæ febres sunt  
continuæ. Assiduus enim  
ignibus, atque symptomatum assulti-  
bus vim corporis laceffunt. Pluri-  
mosque mortales (ût si quod morbo-  
rum propè genus aliud) medio ætatis,  
atque



atque roboris vigore tollunt. Præceps etiam his est febribus impetus, adeoque errori parvis de causis exitioso vel medentis, vel ægrotantis patet. Scire autem licet, modò ex humoribus eas febres nasci simul omnibus, modò ex unico tantùm, intra maximas venas, atque arterias putrefactis. Prioris generis febres *Recentioribus* placuit continentes dicere, alterius continuas. Nos autem, quia utrimque febricitationis est continuatio, unicâ contenti voce, utrasque continuas appellavimus. Recta curatio est simul causam vitii abstulisse, simul excitatum inde calorem refrigerâsse. Ergo etiam succorum, quæ nunquam ferè non jungitur, plenitudo vacuando detrahenda est. Siquidem hæc ipsa, propter meatuum constipationem transpiratione redditâ incommodiore, & dare, & fovere putredinem potest. Qui verò jam computrescit humor, quantùm licet, corrigendus, concoquendus, commodæque opportunus excretioni pellendus est. Inter quæ tempora

pora ipsi quoquè morbo in primis succurrendum, refrigeriique præstandum est temperamentum. Impetus quoquè symptomatum, quæ morbum comitantur, quoniam effrænatus est, coercendus est.

Ut autem hæc ista præcepta, ex rebus petita valetudinem offendentibus, stabili medendi lege fulciuntur; ita penitus infirma, ne dicam, pernicioſa *In morbis agri vires spectanda.* sunt, nisi si par virium robur his respondeat capeſſendis. Solæ namque vires, & morbos, & morborum sustinendo remedia, vitam humani generis tutantur. Quapropter has etiam intueri, ac custodire incolumes oportet, ne vel immoderatis curationibus, vel ipsâ ægritudine debilitatæ collabantur. Servantur autem commodo cibo, portione, aëre. Visum est de his singulis, quæ suprà comprehendi, ordine dicere, omnemque rem ita oculis subſpicere legentium: ut quæ vera sit ratio atque via continuatas has febres sanandi, factis superque ſciri poſſit.



## CAP. II.

*De Missione Sanguinis.*

*Quando  
cognosca-  
tur Febris.*

**Q**Uoniam duo mittendi sanguinis capita, ac veluti scopi sunt, morbi magnitudo, viriumque robur, videtur profectò, si aliàs unquam, certè in continuâ febre tentandum id auxilii genus esse. Nam ut maximus per se est morbus, ita ferè proprius habetur adolescentium atque juvenum; quibus naturaliter sanguinis atque virium abunde est. Ergo etiam, ut primùm is ipse robore valentem aliquem invasit, ac cognitus (quod ferè secundo fit die) fuit, fas est sanguinem, nisi quid prohibet, incisâ venâ, confidenter detrhere, proque vi ægrotantis ac morbi vehementiâ fluere sinere. Levat hæc res, exoneratque corporis rectricem naturam; adeò ut ea faciliùs in posterum, quod reliquum est materiæ, vincat, & conco-



concoquat, quod concoqui potest, & id, quod alienum est, excernat. Nemo sanè id unquam genus remedii sine evidenti periculo in acutâ febre præteriit. Quos sine eo firmiores vires fortè servant, eos sanguis è naribus ubertim fluens, aut copiosæ sudationes vindicare ab ancipiti periculo possunt.

Sed in quæstione positum id esse video, debeatne per acutam febrem puero quoquè, vel senî, vel foeminæ gravidæ sectio venæ adhiberi? Puero *Galenus* infra annum ætatis decimum quartum sanguinem non mittit. Multi etiam id factum in senè, qui septuagesimum superavit, verentur. *Hippocrates* abortum etiam secuturum, si prægnanti sanguis mitteretur, affirmavit. Sed eximenda rei hujus controversia est. Antiqui magnas tentare evacuationes solent, quæ viribus parum firmis sunt inutiles. Itaque non immeritò has ipsas in iis fugère corporibus, quibus potens deficit robur, aut quibus

2

bus

bus alioqui firmis periculum abortûs ex detractô sanguine, matri foetuique alimento necessario, immineret. Id verò ut ipsi prudenter suis in evacuationibus caverunt, ita nos jure præterimus, moderatis contenti inanitionibus, quæ, viribus etiam subinfirmis, non omnino sic incommodent, quin pòst corrigi ea imbecillitas, servatâ hominis vitâ, possit. Dejectis superatisque viribus, cùm vacuatio omnis, tùm maximè missus sanguis officit. Verùm quæ subtenues quidem sunt, parumque firmæ, quid vetat, quò minùs respondentem suo modulo sustinere inanitionem possint? Planè quidem sic res se habet, ut qui graves morbos experiuntur, iidem possint & illorum quædam ferre remedia.

*An Pueris  
sanguis  
rectè mitti  
possit?* Sua pueris inest naturæ vis haud exigua, quæ etsi fluxo, raroque corpusculo indita facilè labascit, admittere tamen sub acutissimâ feбри qualemcunque sanguis missionem potest: maximè si ætas haud multò inferior anno est  
decimo

decimo quarto. Quæ hinc evenit imbecillitas, corrigi ea post alimento facile potest. Prorsus enim præstare videtur, præsentis mortis periculo, afflictis utcumque viribus, puerum eripere, quam febre superatum perire sinere. Quod quidem exemplum felicius, quam *Græci, Arabum* familia secuta est. Nam quod *Galenus* substantiæ puerorum uberem causatur fluorem, eumque abunde esse ad curationem proficitur, vicemque sanguinis missi gerere, nihil est. Debile enim id est, nimisque lentum præsidium, in acuto atque præcipiti morbo acceleratum efficaxque poscente remedium. Locus esse aliquis consilio *Galen*i potest, si de sanis audiatur pueris, quibus sui sufficit corporis fluxa resolutio ad insultus morborum avertendos. Quum autem febris hos acuta premit, permissum est sanguinem utcumque mittere, maximè si corpore viribusque sunt firmi.

De senibus autem firmis, quorum solidum corpus haud ita facile resolvitur, *An Senibus?*



vitur, quid attinet, dubitare, quin in-  
 noxiè, cum acuta id postulat febris,  
 sanguinem emittant. Hic verò *Razes*,  
 Auctor *Arabs*, adeò sectionem venæ  
 non horruit, ut vel ipsis etiam decre-  
 pitis, modò qualiscunque suppeteret  
 vis, eam confidenter bonoque successu  
 adhibuerit. Id quoquè *Galenus* fen-  
 tit: cum non modò numerum atten-  
 dendum esse scribit annorum, sed &  
 corporis habitum. Sunt enim, inquit,  
 qui sexagesimo ætatis anno missionem  
 sanguinis non ferant, utpote præsicci,  
 ac promptè inarescentes, paucique san-  
 guinis; cum quidam septuagenarii fe-  
 rant, qui nimirum sanguine pollent, ac  
 vires sortiti sunt haud impotentes. Id  
 certè modò intelligas licet, ubique cu-  
 rantis consilium non ad ætates certis  
 circumscriptas annorum finibus, sed ad  
 vires dirigi oportere. Si juvenis, in-  
 quit *Celsus*, imbecillus est, malè san-  
 guis emittitur. At firmus puer, & ro-  
 bustus senex tutò curantur. Quan-  
 quam meminisse convenit parcio-  
 rem

hìc

hîc esse debere inanitionem, minimum-  
que fiducia de viribus facilè collapsu-  
ris habendum. Quapropter is etiam  
ipse *Celsus* existimavit, maximè in his  
medicum imperitum falli posse, quia  
ferè minùs roboris illis ætatibus sub-  
est.

Jam verò mulieri quoquè prægnanti *An mulie-  
ri præg-  
nanti?*  
inimica videatur venæ incisio, quoni-  
am, erepto foetui alimento, proclivis  
est abortus, maximè per acutam fe-  
brem, quæ & ipsa quoquè sangui-  
nem incendio consumit, ac vires debi-  
litat. Scilicet hîc post venæ sectio-  
nem viribus, justoque sanguine est opus,  
cùm ad morbi residui depulsionem,  
tùm etiam ad foeminam, ejusque susti-  
nendam sobolem. Ut mirum non sit,  
facilè periculum ab inanitione sangui-  
nis esse, cum in unâ muliere duo cor-  
pora simul sustinentur. Speciosa qui-  
dem argumenta hæc, ut veri habere  
speciem videntur, sanguinisque dehor-  
tari missionem: ita prorsus debilia sunt,  
ubi pro nostri sæculi consuetudine mo-  
deratè

deratè sanguis mittitur, ad commodam virium prægnantis tolerantiam. Quid enim gravidæ offecerit, sub acutissimâ febre, quæ exitium, & matri, & foetui intentat, ad uncias quatuor vel quinque detractus sanguis? Quid contra immittius, quàm miseram mulierculam, salutaris cassam auxilii, proterviæ sævissimi morbi dedere, ipsumque foetum uterique clausum latebris, futuræ lucis spe destitui, atque emori finire? At magnis morbis magna convenire dices remedia, neque tantillo emisso sanguine acutè febricitantem mulierem juvari admodum posse. Verùm hìc respondeo: quoniam virium potior, quàm morbi est observatio, *Galenì* esse sequendum consilium: qui quidem, cum ingens ægritudo insignem detractionem exigit, quam tamen semel vires non ferant, iterari eam oportere scripsit; mediisque temporibus sic voluit sustineri alimento ægotantem, ut tutò secundâ sectione dematur, quod semel demi sine periculo nequivit. Quanquam tamen



unica ferè sufficiat missio sanguinis, quoniam multum detrahare in eâ fas non est muliere, quæ justum sanguinis modum & sibi, & foetui fervare debet : maximè si posterioribus temporibus in molem is foetus grandescit. Primis autem imprægnationis mensibus tutò licet, si acuta invasit febris, pro hujus exigente magnitudine, sanguinem emittere. Tum enim ipsi etiam in corpore redundant succi, menstruis compressis, teneloque foetu exigui postulante alimenti fomitem. Hanc propter abundantiam, vitio etiam humorum sæpe implicitam accidit, ut capitis oriantur dolores, itemque nausæ, & horrores, & febres, & hujusmodi incommoda ; quæ, uti primis mensibus urgent tribus, ita crescente in molem, & in quartum mensem foetu, sponte etiam cessare, quia majore opus est nutrimento, solent. Ad horum aversionem tædiorum, complures gravidæ (utique si his corpus naturâ succulentum est) primis mensibus venam sibi incidi curant, eâque provi-

dentiâ sese fervari incolumes, atque editum foetum manere fanio- rem, minús- que scabiei, ac similibus cutis vitiis op- portunum experiuntur. Quòd si sanè id genus auxilii rectè arripiunt, quid non faciant hæ, quibus atrocis morbi præsens necessitas id ipsum imperat? Neque verò par discrimen (ut quispi- am existimet) a misso primis mensibus sanguine incumbet, quod a purgatione tum esse *Hippocrates* scripsit. Nam antiquorum purgantes potiones tenelli foetus nova debiliâque vincula convellendo facilè dissolvunt, totumque simul corpus impensè exagitant, ut mirum non sit, ipsum subinde abortum sequi. At sanguinis missio, maximè etiam nô- stra, sine vi, sine corporis perturbatione, leniter id, quod superest, demit, matremque onere humorum, integris viribus, integrâque sobole levat. Quòd si, etiam mediis prægnationis mensibus tribus, purgantia medicamenta *Hippo- crates* indulgit, cur nefas sit tum quo- què sanguinem, incisâ venâ, moderatè trahere.

trahere. Adeò manet perpetua hæc, inconcussâque sententia: in gravidis acutâ occupatis feбри, non videri solam debere conceptionem, sed vires æsti-<sup>si vires</sup> mari, corporisque statum, & ex his <sup>sufficiant,</sup> conjecturam fieri, liceatne tutò peri-<sup>semper</sup> clitari, quod morbus postulat, auxilium. <sup>mittendus</sup> est.

Itaque ubi magna acutâque febris urget, semper emittendus est, si vires respondent, sanguis.

Porro hæ vires certis comprehensæ <sup>Quomodo</sup> sedibus hinc in omne corpus proficiscun-<sup>vires æsti-</sup> tur: animales, quæ sensum motumque <sup>mari pos-</sup> præstant e cerebro per nervos: vitales, <sup>sint.</sup> quæ calorem vitæ conferunt e corde per arterias: naturales jecori insitæ, quæ per venas nutritionis adjiciunt tutanturque beneficium. Hæ functiones atque hæc opera, si rectè fiunt, integras vires arguunt: sin imbecilliter atque malè, infirmas. Ergo tenax vigilia, delirium, sopor, distentio nervorum, virium animalium testantur imbecillitatem. Pulsus autem parvus, obscurus, debilis, spiratio parva, difficilis,



crebrâque, nisi pectoris pulmonisve sequantur vitium, infirmum ostendunt vitæ robur. Cruda autem excrementa, vel penitus vitiata, itemque parcè prodeuntia, vel retenta, naturalium virium imbecillitatis sunt argumenta. Per acutam itaque febrem, ut certè in omni quoquè morbo magno, siquidem hæ vires firmæ sunt, vena erit incidenda: sin morbi sævitiâ, aliisve ex causis dejectæ esse cernuntur, temperandum ab emittendo sanguine est.

*Cum languidiores sint, paucam detractionem iterare convenit.*

Cæterum ubi sic eadem sunt afflictæ, ut prorsus dejectæ non videantur, sed, attrito tantum robore solito, languidæ, morboque tum magno, ut continuâ feбри, si oppugnantur, nequaquam vel omittere sectionem decet, vel affatim multumque semel evacuare (hoc enim ægrum esset extinguere, illud sine ope libidini atrocis mali relinquere) sed paucam detractionem iterare convenit, medioque tempore vires reficere. Eam profectò secutus est viam, ut nuper dixi, *Galenus*, qui, cum parum firmus

firmus est homo, principio, quantum satis visum est, detrahit, & post, quod defuit, iteratione supplet.

At scire licet, hanc partitionem non esse in spatia rejiciendam complurium dierum, sed eodem tentandam die, modò aliquot interpositis horis, modò unicâ duntaxat: interdum & mox in ipso fluoris impetu, vel dissoluto vinculo, vel vulnere superindito digito. Inter quam moram, supinus decubitus, vini odor, vel mali punici degustatus succus vires refocillat. Intervalla etiam hæc pro viribus affectis præfiniuntur, quæ vires, crescente morbo, semper fiunt imbecilliores. Vehementer fractæ, longiora instaurationis spatia exigunt; paulò firmiores, contractiora. In acutâ tamen feбри, cui ceu totis corporibus inhærescenti, iteratio, non etiam revulsionis, sed unius vacuationis gratiâ adhibetur, non ultra diem posterganda est; id quod ideo præcipitur, ut ne effervescens intus sanguis, vel in viscus aliquod irrumpat.

*Partitis  
venæ secti-  
onibus,  
quodnam  
spatium  
interpo-  
nendum  
sit.*

præcipuum, vel majorem putredinem, nisi maturè dematur, contrahat. Ad hæc, posterioribus diebus vires redditæ sunt ex morbo imbecilliores, ipsâque materia, quia concoqui cœpit, atque a bonis succis separari, tum potius purgatione, quàm venæ sectione, tolli debet. Quæ res posterioribus abhinc locis patebit: arguetque gregalium illorum medicastrorum imperitiam, qui, febribus etiam vigentibus, venam tunc dunt.

*In summâ  
tamen im-  
becillitate,  
huic reme-  
dio omnino  
parcen-  
dum est.* Sed redeundum nobis ad quæstionem virium est. Controversum esse apud antiquos video: Sanguisne etiam tum debeat mitti, cum ingens quidem id desideret febris, eoque sine præsidio certa perniciēs sit, neque tamen id patiantur vires, vel ab ipso ægrotationis principio, vel incrementis, vigentisve morbi impetu (neglectâ per initia detractiōe) imbecillissimæ? *Cornelius Celsus* in ejusmodi re fatius putavit, anceps experiri auxilium, quàm nullum. Si nihil, inquit, aliud apparet auxilii, periturusq; sit



fit, qui laborat, nisi temerariâ quoquè viâ fuerit adjutus, in hoc statu boni medici est, ostendere, quàm nulla spes sine sanguinis detractiōe sit; faterique quantus in hâc ipsâ re sit metus, & tum demum, si exigetur, sanguinem mittere. Aliter verò *Galenus*, meque judice, rectiùs hanc rem judicavit, parcendum semper remediis esse censens, quæ & vitæ custodes vires delent, & medico pro gloriâ dedecus, calumniamque conciliant. Ergo etiam rectiùs præfagio usi, ab omni culpæ opinione conscientiam liberamus, & nominis existimationem, artisque nostræ venerabilem dignitatem tuemur. Crudelis hominis officium facit, quisquis morbum unâ cum vitâ ægrotantis aufert. Quamobrem semper vires, ubi quid exinaniendum est, intueri oportet; quæ si penitus invalidæ fractæque videbuntur, magna præsidia respuunt, blandioribus quibusdam, quamdiu supererunt, fovendæ rebus. Id profectò humanitatis est pium officium, deploratos etiam ægros aliquo saltem artis nostræ

nostræ beneficio consolari. Verùm excusandus utcunque (quantùm nobis videtur) *Celsus*, Auctor haud infimæ inter antiquos notæ; cujus præcepta, quoniam ubique artis magistrum sapiunt *Hippocratem*, fas non est temere repudiavisse. Locum esse suæ præceptionis præcipuum is Auctor scripsit, ubi nervi resoluti sunt: ubi subitò aliquis obmutuit; ubi anginâ strangulatur: ubi prioris febris accessio pæne confecit, parremque subsequi verisimile est, neque eandem videntur sustinere ægri vires posse. Hæc ista profectò satîs arguunt, oppressas copiâ humorum vires, non in sese dissolutas, a *Celso* intellectas esse. Oppressas nimirum intelligo eas, quæ propter affluentiam humorum complurium, calore atque putredine nimis effervescentium, vel periculoso impetu partem aliquam impetentium vel occupantium, momentaneam, veluti ab onere molesto gravatæ, speciem imbecillitatis falsam præbent. In eo autem rei statu, nisi detractiōe vires maturè subleventur

levantur, in multo versantur periculo.

Nondum de viribus sat. In quæ-  
 stione positum a nonnullis id fuisse vi-  
 deo : Omnesne corporis considerari vi-  
 res in acutâ febrî, ut certè in omni quo-  
 què morbo, ad missionem sanguinis de-  
 beant : an verò pleræque ex his duntax-  
 at ? *Galenus*, in acutis morbis, sat esse  
 putavit vitales tantùm intueri ; quarum  
 si robur valet, tutò secari posse venam  
 scripsit. Id præceptum rationes certè  
 non prorsus rejiciendas habet. Acutus  
 enim morbus, maximèque continua fe-  
 bris, quia brevi solvitur, haud magno  
 sanè incommodo solidas afficere partes,  
 ut longus, potest. Tum etiam, inte-  
 gro vitali robore, non usque ad eò me-  
 tuenda videtur virium animalium imbe-  
 cillitas, ut quæ, evictò morbo, sponte  
 paulò pòst cessat. Memini videre acu-  
 tè febricitantes haud parum multos,  
 qui sub ipsam judicationem, gravi op-  
 pressi primùm delirio, dein alto sopore,  
 similes moribundis, sine mentis usu, sine  
 motûs sensûsque certo imperio, alius

*In acutis  
 morbis, vi-  
 res vitales  
 sunt præ-  
 cipuè con-  
 sideranda.*

duas




duas tresve horas, alius diem, & quidam apud *Nervios* biduum decubuerint, firmo tamen stabilique pulsûs robore; quæ profectò res salutis rectique præfagii spem mihi verisimilem præbuit: id quod, profusis ortis sudoribus, atque dejectionibus alvi, feliciter secutum fuit. Prorsus quidem sic sese rem habere existimo: Per evacuationes acutis febribus accommodas, pulsui, ut magnam tribuere vim, ita non omnia medicum credere oportere, utpote rei multum ancipiti atque fallaci, quam facile mille res variant turbantque: ætas, sexus, corporum natura, infirmus stomachus, metus, ira, lætitia, ex improvviso ingressus medicus, similiæque sexcenta, quoniam spiritus afficiunt vitales, recta judicia pulsûs corrumpunt; ut imbecillus is homo videri possit, cui vires suppetunt, & valens rursus, quem deficient. Hujusmodi itaque remotis casibus, videre oportet, maneatne constanter firmi roboris pulsus; qui si sic est, confidentiùs per acutam febrem detrahi

*Quarum  
bonus in-  
dex est  
pulsus, sed  
interdum  
fallax;*

trahi sanguis potest. Illud quoque sequitur, ut omnibus in morbis, si quid vacuandum est, consulendas ex æquo vires omnes esse: ita in acutis præcipuè vitales, in vetustis naturales, in utrisque indifferenter animales. Acutæ siquidem febres, quoniam & exiguo tempore magnâ vi corpus oppugnant, & profusis inanitionibus finiuntur, robur spirituum vitalium, quod illa tùm efficiat, tùm sustineat, maximè requirunt. Longi verò morbi non tam effu- *In vetustis*  
 sis, vel tam evidentibus vacuationibus, *naturales.*  
 quàm vetustate, lentisque concoctionibus, vincuntur. Itaque in his ipsis vis potissimum naturalis, seu concoctrix requirenda atque spectanda est, si quid rectè atque tutò vacuatum velis.

Id postremum hâc in quæstione vi- *Et in acutis etiam aliquatenus hæc quoque, cumque his animales.*  
 rium concludam; quanquam vitale robur primas hîc partes habet: nequaquam tamen habere in universum omnes. Nam etsi maximè, ac primum vis vitalis profusâ detractiōne labefactatur, cæteræ tamen unâ etiam concutiuntur, quarum

rum casus æquè homini exitiosus, ut vitalis, esse potest. Porro, ut in acutâ febrî, pollentibusque viribus, mittendi sanguinis necessitas (quod hæcenus satis demonstravimus) certa est, incerta ejus effluentis incerta variâque servatur mensura: prout febris est magna, & alia atque alia corporis natura, itemque ætas hominis, & anni tempus, & hujusmodi non eadem. Quâ de re jam nunc agendum est: atque hinc idoneum tempus mittendi sanguinis præfiniendum.



## CAP. III.

*Quâ Mensurâ acutè febricitantibus Sanguis debeat mitti.*

**S**anguinem per acutas febres mittere, commune est; verum convenienti eum mensurâ, ac moderatione mittere, haud æquè vulgatum, æquève expeditum



tum videtur. Observationes enim haud *Conferenda est morbi, viri-*  
 leves habendæ sunt, quibus certa sangui-  
 nis detrahendi quantitas definitur. Con-*umque magnitu-*  
 sistunt autem hæ in collatâ morbi atque *do.*  
 virium æstimatione. Magnus enim ac  
 vehemens morbus, validæque si coëunt  
 vires, liberalem postulant vacuationem.  
 Febris verò continua (ut primùm de *Quousque in Febri continente*  
 morbi magnitudine, ac mox de viribus *mitti sang-*  
 agamus) quia in numero magnarum *guis debe-*  
 ponitur ægritudinum, ferèque bene ha-  
 biti est corporis, ac calentis ætatis pro-  
 pria, multam exigit detractionem, ma-  
 ximè si continens sit febris (*Κύνοχον*  
*Græci* vocant) quæ venas nimîâ  
 succorum pariter omnium mole di-  
 stendat. Sub quo casu *Hippocrates*  
 atque *Galenus* veriti non sunt, donec  
 etiam animus deficeret, semel trahere.  
 Quam ipsi rem ratione, experienciâ-  
 que ducti tentaverunt. Profusâ nam-  
 que hâc inanitione primùm homo in  
 contrarium agitur statum, celerrimè ex  
 defectu animi refrigeratus; pòst autem  
 alvus subinde prorumpit, vel bilis uber-

tim

tim evomitur, vel certè copiosis sudoribus corpus perfunditur, atquè hinc alios protinus contingit convalescere, alios plurimùm juvari. Quò minùs placeat, quòd *Avicennas* in Synocho putridam missionem sanguinis in vices partiatur; parum memor ejus præcepti *Hippocratici*, magnis morbis magna remedia conferenda esse. Porro, quod ad animi attinet defectum, scire licet haud semper eum esse expectandum, verùm citra hunc etiam semper à detractione desistendum, cum satìs pro morbi, viriumque ratione emissum est. Sunt enim, quibus ægrè animus deficit, quos si huc usque vacuare tentares, perderes. Si tamen linqui animo aliquem, dum adhuc sanguis intra modum fertur, continget, protinus comprimenda fluxio est, semperque antè inaniendi finis faciendus, quàm animus planè deficiat. Ergo etiam pulsui intentum esse medicum oportet, ut ne pro animi deliquio mors occupet, & quum is ex magno parvus fieri cœpit, ex æquali inæqualis,

lis, ex vehementi debilis & obscurus, a detrahendo protinus cessandum est; maximè, si sanguis haud pari impetu fertur, animoque languere is, cui mititur, cœpit. Hæc autem defectum vel antecedunt, vel comitantur, pandiculatio, tinnitus aurium, oculorum quædam quasi suffusio, & interdum (petente stomachum humore) singultus, atque nausea.

Haud æquè profusâ detractiōne hæc *Quo usque in continuâ.* febres gaudent, quas causâ discriminis, Græci *συνεχῆς*, nostri continuas vocaverunt, quoniam per has ipsas haud tantus, ut in iis, quas *ζυνόχης* atque continentes appellari volunt, affluit sanguis; sed aliquis per se solus in vasis majoribus computruit humor, qui moderatiore sanguinis detractiōne minuendus est.

Porrò de viribus sic habeto: Si po- *Virium magnitudinem colligitur ex tenuitate,* tentes quidem hæ sunt, liberalem inactionem admittunt, dejectæ verò penitus nullam, mediocres imperfectam quidem, sed tamen utilem. Variat earum

D

rum



rum robur, prout sunt hominis, temperamentum, constitutio, habitus, ætas, itemque anni tempus, regio, cœlum, consuetudo victûs, genus vitæ, incidens evacuatio, atque ea simul symptomata, quæ incidere graviora per acutas febres solent. Incipiam a corporis naturali vel ascritio temperamento, & qui ipsum proximè comitatur, habitu.

*Temperamento,*

Temperatum itaque corpus, justam, morboque respondentem detractionem sustinet. Calidum verò, ac simul solidis humidum fluxumque partibus, quale puerorum est, qui plurimùm indies a calore innato dissolvuntur, parciùs inaniri postulat. At si calidum, idemque non nimium solidis madens, multo sanguine affluit, quale certè Athletarum est, id omnium uberrimæ par est evacuationi. Calidum autem, ac modicè siccum ferè latas quoquè venas habet, ideoque magis licenter id inaniri, quàm frigidum humidumque, aut frigidum ac siccum potest. Utrumque enim

enim hoc exiguas possidet venas, & caloris haud æquè multum.

Habitus autem corporis densus, fir- *Habitus*  
mus, plenus, musculosus, liberaliter sanguinem mitti posse docet; minùs autem, qui mollis est, & rarus, & obesus, & albus. Tenuium enim index venarum est, ac sanguinis paucioris. Modicè gracilis habitus, si latis est venis, uberioris sanguinis argumentum est: si tenuibus, imbecillitatis. Itaque, ut ille plus mitti sanguinis permittit, ita hic, quàm fieri potest, minimum. Porrò scire licet, fallacem interdum esse habitûs notam, neque ex eo indicium semper haberi certum de sanguinis modo, atque de viribus corporis posse. Scilicet is ipse habitus certâ quâdam vitæ, victûsque ratione ascititiam constitutionem, amissâ naturali, acquirit. Labor, vigilia, sollicitudo, parvus tenuisque victus, habitum naturâ pinguem sæpe gracillimum fecere. Otium contrà, plenior somnus, animus tranquillus, plenus frequensque cibus,

ac potus, gracilem naturâ hominem multâ sæpe carne, & interdum adipe oneraverunt. Ergo vera discrimina rerum harum ex ipsis petenda sunt venis, quæ si latæ sunt, vel in habitu etiam pingui faciliùs missionem sanguinis ferunt: sin tenues sunt, quanquam forsan gracilè corpus est, ægriùs id genus, vacuationis ferunt. Adeò rectè *Cornelium Celsum* dixisse video, vim corporis meliùs ex venis, quàm ex ipsâ hominis specie, æstimari debere. Commodum sese nobis offert, habitum corporis versantibus, multorum imperitia medicorum, qui, ubi sanguis est emittendus, id habitûs præceptum adeò non intelligunt, ne dicam, contemnunt, ut sine discrimine per acutæ febris insultum, omnibus & mollibus, & firmis, & gracilibus, & obesis intemperanter sanguinem demant. Huic Medentium errori potissimùm expositi sunt *Germani, Britanni, Gallique Belgæ*; quoniam hi populi molliori, magisque inflato sunt corporis habitu, quàm vel  
*Græci,*



*Græci*, vel *Itali*, vel *Hispani*. Siquidem his gentibus, quia solidum musculosumque est corpus, ac venarum latarum, profusæ etiam vacuationes, ubi ingens urget morbus, non officiunt. Narrat *Galenus*, nonnullis se *Græcis* sanguinem, ad sex usque libras, magno successu, sine virium afflictione, misisse. Et *Itali* quidem *Hispanique* Medici sæpe suis prudenter atque tutò sanguinem, ad duas etiam libras, demunt. Horum exemplum quisquis in nostris imitari corporibus per acutam febrem volet, adeò vires debilitaverit, ut pòst vel morbo succumbant, vel certè, si sanitas redit, ita maneant offensæ, ut, complurium curriculo annorum, vix recuperare pristinum statum possint. Vidi equidem nostratium haud parum multos ita vacuatos inconsultâ temeritate Medicorum, alios præmaturâ coactâque judicatione labefactatos perisse; alios in hydropem, alios in aliud, atque aliud genus vitiosi habitûs conjectos. Cum synochus invasit, si cor-

D 3

poris

poris natura gracilis est, & spissa, & dura, & copiosi sanguinis (talis ferè est *Italorum*, atque *Hispanorum*) confidenter, ait *Galenus*, sanguinem mittes. At si triginta (inquit) annos is natus est, cui sanguis mittetur, sed laxus, mollisque sit, & pinguis, & albus, ac gracilibus venis, huic aut sanguinem non mittes, aut parum detrahes. Quòd si id tam religiosè in his *Græcis*, vel *Romanis*, qui fortè molles, albique sint, sub temperato coelo, *Galenus* cavet; quantò majore curâ in nostratitium sic affectis verendum est corporibus, quibus supra hujuscemodi habitum, coelum quoquè frigidum perpetuæque propter voracitatem cruditates incommodant, quò minùs ubertim, minùsque licenter exhauriri iis sanguis debeat. Quin nec ipsos etiam vel *Græcos*, vel *Italos*, sub febris quantumvis acutâ, ac gravi, adèò exinanire sanguine licet, quin ejus bona reponi pars ad spatium curationis debeat, idque, ne alere ægrum intempestivè cogamur. Nutrimus

trimentum verò omne, quia virium causâ datur, non usquequaque in febribus quæritur continuis, ut quæ breves sunt, & in imbecillum cadere hominem non consueverunt. Itaque ex cibo vel pleniore, vel intempestivo additur ad morbum. Adeò necessum est alterutrum sequi, aut febrem, si nutris, augere, aut vires nimiam sanguinis missione fractas, si non nutris, deicere. Commodè vetus ille, me iudice, *Hippocrates* scripsit, vasorum in extremum deductas inanitiones periculo esse opportunas. Præstare igitur *Galenus* existimavit, bonam partem sanguinis, qui proprium sit partium nutrimentum, relinquere, paucissimisque forbitionibus, ac poculis uti, quæ, per acutas febres, potius medicamenti vicem, quàm alimenti, gerere debent. Quòd si in his morbis solus superflueret sanguis, sine putredine, sine vasorum obstructione, fas utique esset, quovis in corpore, cujuscunque id habitus, atque naturæ fuerit, tantum auferre sanguinis, quantum pro modulo



virium liceret. Verùm, quia venæ sectio proprium remedium obstructionis, atque putredinis non est, servari etiam bona pars sanguinis debet, qui vires foveat, & in expugnationem morbi reliqui armet, atque tutetur. Id profectò fatius est sequi, quàm ægrum, semel omni vi effusâ, fortasse præcipitare. Nemo hercle, me propter hæc dicta, esse clamet αἰμοφόρον, & usque adeò malè peritum, ut necessaria morborum remedia contrahere velim, atque extenuare. Equidem modum horum propono legitimum, cujus efficacem auctorem habeo *Galenum*, ipsamque suffragantem cum experienciâ rationem. At enim dicet aliquis, ingentem esse in humano corpore sanguinis vim, sed & sponte naturæ quibusdam e naribus, ad tres usque libras, eum ipsum erumpere, nullâ virium calamitate, vel incommodo; itaque licere nobis, per necessitates morborum, arte quoquè naturam imitari. Scribit *Fernelius*, extitisse acutè febricitantem gravidam, cui,

die

diē septimo, tantâ copiâ è naribus sanguis promanârat, ut pelvim impleret, exæquaretque libras paulò minùs quatuor, superstitè matre, servatoque fœtu in maturum pariendi tempus vegeto, ac vivido. Porro hæc vera ut sunt, speciemque probabilis adversus nos rationis multam habent, ita nequaquam evertere sententiam nostram possunt. Scire enim licet (id quod ab aliis parum fuisse animadversum scio) longè magis virium substantiam debilitari atque disperdi, sanguine per grandiore cubiti venam confertim effuso, quàm, longo horarum spatio, ab exilibus narium reclusis venis stillante. Hic enim, haud ita multum spiritûs vitalis disperit; illic, grandi vulnerato vase, sanguis ubertim, copiosissimo cum vitæ spiritu, prorumpit. Visi nobis sunt acutè febricitantium nonnulli, quibus cum, morbo incipiente, sanguinem ad octo mississem uncias, protinus animis acciderit defectus, cum tamen progressu morbi, tres sanguinis libras, aut his ampli-

us

us fundentibus, ne quidem ullus animi languor, non dicam, defectus obrepserit. Quis non vidit, reclusis hæmorrhoidibus, aut mensibus foeminarum, per multas etiam septimanas, paulatim promanantem sanguinem? Aut denique ex vulnere aliquo (quod non grandem quidem venam vel arteriam violavit) eum ipsum intemperanter effluxisse, nullâ ortâ deficientis animi, aut syncopes notâ? Quod si iisdem in corporibus, sub acutâ febre, parem sanguinis portionem, imitatione propositæ ductus inanitionis, detrahère aliquis, aperto cubiti magno vase, tentaverit, is profectò, ortâ syncope, vires hominis, vitamque unâ cum morbo tollet. Quò magis constat, frustra id exemplum a multis etiam præcipuis viris arreptum esse, quin contrà potiùs spectari locum, unde sanguis emittitur, oportere, sitve is hujusmodi, per quem minimo tempore multum dissipari sanguinis spiritûsque vitalis possit; ex quo certè loco sanguis periculosè eâ mensurâ expromitur,



tur, quâ sæpe ab extimis corporis locis, per tenues venas, sine noxâ virium, manat. Et ut hæc parum, quod inficiamur, sufficiant, id certè vidissè eos oportuit, quod ratione fultum, quotidianaque comprobatum est experienciâ, haud æquè semper naturalem vacuationem, ut ea, quæ arte præstatur, viribus officere. Cognoscant hæc, expendantque velim omnes, quicunque, magnâ temeritate venerabilem illum vitæ thesaurum, sanguinem, præter modum, præterque necessitatem, intemperanter profundunt.

Proximum modò est de ætate dicere, *Ætate.* quæ si aut puerorum, aut senum est, largam missionem sanguinis respuit: faciliùs eam ipsam mediæ sustinent ætates, ut quibus cum virium robore, & corpore bene constituto, sanguis est affluentior. Quanquam autem naturæ vires satîs valentes pueris sint, ferrèque ob id detractionem posse videantur: quia tamen humido fluxoque corpore continentur, facilè missò sanguine colabuntur,

labuntur, ideoque modicas tantùm vacuationes, urgentibus morbis, tolerant. Senibus autem sua reverà deficit vis, præcipuèque decrepitis. Proin, ut ii, qui etiamnum sunt ὠμογέροντες, id est, qui crudâ, viridique adhuc senectâ sunt, profusam tantummodo vacuationem respiciunt, ita decrepiti, aut nullam, aut certè parcissimam admittunt.

*Ex anni  
tempore,*

Porro anni tempus, si verum est, liberaliùs vacuari sanguinem posse indicat: æstas, hiems, atque autumnus, contractiùs. Sed quæri potest: Quodnam ex his temporibus plùs minùsve respondeat detractiōni? *Galenus* parciùs emitti sanguinem, autumnō, oportere scripsit, eoque multò minùs, hieme, omnium autem minimùm, æstate. Id præceptum magno errore nostri secuti sunt, non quidem ullo *Galen*i eâ in re lapsu, sed quòd perperam id ad suos quoquè *Germanos*, vel *Belgas* detorserunt, quod de Græciæ tantùm gentibus, & in earum comprehensis circulo intellectum oportuit. Ea in universum  
lex

lex statui certa debet: eo semper tempore anni liberaliùs effundi sanguinem posse, quod maximè ad temperiem accedit. Hoc ipsum enim sanguinem adjicit, & firmiores corporis vires facit. In *Græciâ* itaque, *Hippocratis* quidem illâ, atque *Galenî* patriâ, quoniam corpora per hiemem, non admodum ibi asperam, moderatè coguntur, sanguinem, atque naturæ calorem sat pollentem habent, sic ut tum, sine periculi metu, per acutæ febris necessitatem, bona sanguinis pars demi possit. In nostræ verò regionis tractu, per durissimum hiemis gelu, nisi viscera justo sanguinis modo communiantur, in grave cadent refrigerationis, ac debilitatis periculum. Itaque tum longè parciùs sanguinem trahere convenit, quàm si æstas esset, quæ nobis satîs est tolerabilis, neque ardores æquè molestos, ut hiems algores, exhibet. Certè corpora nostra, cruditati opportuna, commodè excipiuntur ab æstate, quæ sæpe succos perfectiores, meliusque coctos reddit. Ipsa hiems,  
tùm



tùm ambientis nos cœli rigore, tùm voracitate hominum, succos antè naturaliter subcrudos, longè efficit crudiores; eique incommodo, qui versus Aquilonem propiùs incolunt, & orientem solem, magis patent: minùs autem hi populi, qui cœli temperato tractu sunt viciniore. In *Libyâ* autem minimum sanguinis æstate demendum, quoniam hæc illic torrentissima est, corporaque resolutione maximè debilitat. At mediâ hieme, quæ ei loco prorsus temperata est, tantum sanguinis auferre, respectu temporis, licet, quantum nostris hominibus, medio etiam vere.

*Regione,*

Adeò apparet, præceptum illud temporis perpetuè non esse uniusmodi ad sanguinis præfiniendam mensuram, sed variare maximè situ regionum, prout hæc magis minùsve ad exacti temperamenti mediocritatem accessere. Ergo *Scotis, Anglis, Livoniis, Danis, Polonis, Belgis, Germanis*, minùs adimere sanguinis, hieme, quàm æstate, decet; contrà, *Lusitanis, Mauris, Ægyptiis*

*gyptiis, Palæstinis, Arabibus, atque Persis, plùs hieme, quàm æstate. Galli autem Celtæ, atque Aquitani, Hispani, Itali, atque Græci, quia non ita duras, uti nos, experiuntur hiemes, & quidem æstates, etsi non æstuosissimas, paulò tamen ardentiores, majorem semper vacationem eo ferunt tempore, quo firmiora corpora sine periculo sunt refrigerii, quod ipsis est hiems, quàm quo laxata calore affatim diffluunt, quod æstas est. Post temperatæ regionis incolas, nostri certè *Belgæ* tolerare utcumque hoc auxilii genus posse videntur, quibus frigora accidunt moderatiora, quæ insitum naturæ calorem, atque succos intus includunt, minimumque viscera, si mediocriter sanguis trahitur, feriunt,*

De coelo illud quoquè, sicut de regi- *Caelo,*  
one, tenendum. Quod temperatum est, & nullâ vi tempestatum jactatur, largiùs docet licere vacuare; parciùs autem, quod frigidis horret Aquilonibus, vel Austrinis inflammationibus extorretur.

Aliquid

*Victûs ra-  
tione vita-  
que insti-  
tuto.*

Aliquid etiam in victûs ratione, atque in vitæ instituto est. Athletæ omnes, & quicunque indies cibis bonis, ac solidis aluntur, eosque probè concoquunt, liberaliùs emittere sanguinem tutò possunt. Contrà, qui parsimoniâ usi, tenuique contenti mensâ, multis sese laboribus, atque sollicitudinibus labefecerunt, his minùs sanguinis fuerit detrahendum. Illud quoquè scire convenit, plùs sanguinis ei auferre posse, qui venæ sectiōnem aliàs est expertus, quàm non experto.

*Acuta-  
rum febris  
um Sym-  
ptomata,  
que missi-  
onem san-  
guinis de-  
hortan-  
tur.*

Nunc ad symptomata veniam, quæ, per acutas exorta febres, largiorem sanguinis missionem dehortantur; ut sunt, immodica vacuatio, distentio nervorum, vehemens cum vigiliâ dolor, animi defectus: & hujusmodi posteriora quidem hæc, quia viribus multùm incommo- dant, parcìus esse vacuandum docent. Primum autem, quod immodicæ fuit inanitionis, symptoma, quia conficit id, quod arte quæritur nostrâ, meritò velle parcā, vel omnino nullam suscipi debere.



bere missionem sanguinis indicat. Er. *Immodica  
vacuatio  
per alvum.*  
 go etiam si per acutam febrem aliquibus  
 de causis venter nimium fluit, quidam  
 minus esse detrahendum præcipiunt.  
 Diligens virium custos *Galenus* peni-  
 tus supersedendum esse aliis vacuationi-  
 bus jubet, ubi alvi profluvium feбри ac-  
 cessit, ipsumque ait per se sufficere, e-  
 tiamsi non sit pro plenitudinis ratione;  
 quotquot autem ita constituti, tanquam  
 majoris egentes inanitionis, sanguinem  
 emiserint, in gravissima eos refert con-  
 jici pericula. Porro in aliis vacuatio-  
 nibus, cruentis quidem illis, sic habe-  
 to: Si natura confertim aliquid vi atq;  
 robore expellit suo, quod morbi præ se  
 materiam ferat, ægrumque levet, ac  
 commoda sequatur copia, non modò  
 non parum detrahere, sed desistere etiam  
 in totum a missione sanguinis licebit,  
 omnemque rem agenti naturæ permit-  
 tere. Exemplum esto: in mensibus fœ-  
 minarum, in hæmorrhoidibus, atque  
 in narium cruentis profluviis, in quibus  
 si per continuam febrem sic sanguis fun-  
 ditur

*Per san-  
guinis eru-  
ptionem.*

ditur, ut humor, qui morbum fecit, abunde tollatur, parcendum venarum sectioni est; sin verò parum id fit absolutè atque plenè, quæ deficere videbuntur, ea missò utcumque sanguine fas est absolvere.

Exposuimus hæcenus earum observationes rerum, quæ mensuram mittendi sanguinis præfiniunt, quæque non modò cum præsentibus sunt, hanc facultatem indicandi habent: verùm etiam ubi vel antecesserunt, vel imminebunt. Ingens profectò Medici quæritur solertia, quâ multitudinem, vim, ac dignitatem rerum harum intueatur, atque judicet, ut, quoad fieri potest, ubi sanguis per acutam febrem mittetur, legitimæ mensuræ ipsum veluti punctum attingat. Quòd si evadere eò ingenium hominis non potest, conabitur tamen accedere quàm proximè potest, semperque potius quid infrà, cum anceps incidit dubitatio, subsistere, quàm effusio in inanitione vires offendere. Etenim pòst, quidquid fortè defuisse vi-

sum

*Minor potius, quàm nimia sanguinis copia auferri debet.*

sum erit, pensari aliis vacuationibus, ut alvi ductione, ut sudore, ut urinis, potest. Neque enim pleniore cibo (ut fortè quis existimet) in posterum resarciri videatur, quod supra modum vacuando peccatum est. Nam quoniam cibus semper ad morbum addit, & tum quoquè alieno tempore, occupatis admodum in vigentem morbum viribus, datur, non potest quàm plurimùm noxæ atque periculorum non inferre.



## CAP. IV.

*Quo tempore per Febres Continuas sanguis mitti debeat.*

**Q**Uoniam hæ febres, quas modò versamus, in corpus ferè incidunt firmum, atque aliquâ succorum affectum plenitudine, inprimis ea postulare auxilia videntur, quæ copiam humoris, incisâ venâ, demant, ne is in-



intus relictus graviore putredine, atque incendio afficiatur, tùm etiam ut ventilatio, transpiratióque, per ademtam copiam reddita melior, temperiem conservet venarum, incrementáque putredinis, quantùm fieri potest, minuat. Quisquis hæc videt, facilè judicat primis quibusque febris temporibus accellerandum id auxilium esse. Non solum autem materiæ causâ, quæ febrem facit, id ita fieri debet, sed etiam virium, quæ, incipientibus morbis, sunt firmiores, utpote non admodum impares his, quæ secundam valetudinem nuperrimè tutabantur. Ferè autem ad id auxilii capeffendum genus aptissimus fuerit dies secundus, aut si quid prohibet, certè tertius. Supra hunc, atque etiam supra quartum, haud æquè vel utiliter, vel tutò sanguis mittitur, cum jam morbus multùm increvit, ac vires confumere, cumque ipsa febris materia concoqui, & separari a benignis succis coepit: quod naturæ institutum permotis confusisque per missionem sanguinis humoribus

*Incipiente  
febri ma-  
turanda  
est vena se-  
ctio, neque  
post ten-  
tanda.*

moribus labefactatur. Quibus rebus impulsus *Galenus* maturandam esse detractionem sanguinis judicavit, neque eam concocto, consistentique morbo, adhibendam. Hæc curandi via per acutas febres semper servanda est, ut, vacuatâ primùm per missum sanguinem plenitudine, quæ computruerunt, ubi concocta sunt, alvi ductione, urinis, atque sudationibus expurgentur.

*Arabs Avicennas*, & qui ejus sunt edocti præceptis, pessimo exemplo principis febrium justam detractionem denegaverunt, futilibus his impulsis causis, quòd bilis cum sanguine permissionem (quæ illis secundæ venæ est nota) nisi posterioribus diebus fieri non posse existiment; dein quòd ad sanguinis missionem opus esse concoctione judicent. Hic error, Auctore natus *Avicennâ*, & tot jam sæculis in suos sequaces derivatus, multos mortales neci dedit. Licenter enim ac facilè in vitam hominis gravis morbus sævit, præcipuo ejus auxilio idoneis neglecto temporibus. In-

*Refellitur  
contraria  
Avicen-  
næ, ejusq;  
sectatorum  
in hac re  
opinio.*

eptit profectò *Arabs*, quòd (cum oportunitatem fecandæ venæ captat) non potius morbi vim, atque robur ægrotantis, quàm bilis cum sanguine mixturem considerat. Ejus ipse judicium mixture in rubrâ ponit, crassâque urinâ; itaque, ubi ea quoquè flammea tenuisque mei itur, perquàm religiosè affectione venæ temperat: quasi tum adhuc per se bilis sola subsistat, ac nondum sanguini coërit, quæ, illo detractò, veluti suo, uti ait, fræno, effervesceret. Somnii potius vicem, quàm salutaris præcepti gerit, quod hic Auctor proponit. Apertâ enim venâ, non solus per se sanguis, sed cuncti humores (qui tamen sanguinis nomine continentur) effluunt: id quod in extracto sanguine, ubi vasculis exceptus refrixit, videre est. Quatuor enim distincti visuntur succi, amisso scilicet nativo calore, qui antè in corpore eos inter se mistos temperatosque tenebat. Jam verò, si continuæ febris materia in venis infidet, quid hercle prohibet, quò minùs, his incis-  
 sis,



sis, effluat etiam cum sanguine is humor, qui in eo quoquè ipso inest, & morbum creat? Æquè penè absurdum est, quod præparare concoctione sanguinem, antequam mittit, is Auctor velit. Siquidem, amplâ cubiti divisâ, uti decet, venâ, nunquam ita crassus est sanguis, quin protinus effluat. Scio *Galenum*, in magnâ venarum cruditate, priusquam sanguinem omnino mittat, concoctionem moliri solere incîdentium usu medicamentorum. Verùm ea res nihil nos quidem offendit, quoniam is corporis status viribus caret, quarum occasione unicarum, non autem sanguinis crassitie detractio procrastinatur. Itaque eandem curandi viam hîc sequitur *Galenus*, quam in iis servavit, qui propter imbecillitatem modicis, iteratisque detractiõibus egent. Scilicet, pauculo emissõ sanguine, moram interponit, mediisque temporibus, incîdenti usu medicamento, rursus venam incîdit, vel ipso eodem interdum die, vel postero; atque hinc similibus materiis

concoctionem molitus, iterum quid de sanguine demit. Constat autem, hujus curationis, infirmis aptæ viribus, exemplum ad acutissimam febrem cum fervidi sanguinis plenitudine, ac virium pollente robore deflecti non posse; quoniam subitò hîc, ac semel inanire convenit, id quod, & vires ferunt, & vehemens exigit morbus. Quò turpiùs idem erravit *Avicennas*, cum sic de *Syncho* scripsit: In febre autem sanguineâ minuere, inquit, oportet per principia, non tamen superfluè; at post copiosè, cum affuerit febris maturatio. Falsus opinor *Arabs* præcepto *Galen*i fuit, quod libro scribitur de curandi ratione per sanguinis missionem. Præstat, inquit, nisi quid urget, priore missione minus detrahere, iterumque eam repetere, immo, si libet, & tertio. Atque id parum animadversum est, quod scribitur, *nisi quid urget*: urget verò multò maximè ad acceleranda, ac protinus complenda remedia febris acuta. Quin etiam sui esse videtur

detur oblitus *Avicennas*, qui aliàs præcepit, partitionem quidem mittendi sanguinis optatiorem esse, nisi sit quod necessariam faciat festinationem. At verò *Galenus*, dum sic dividit detracti-  
onem, quantum ex prægressâ patet oratione, de præcautione loquitur earum ægritudinum, quæ quotannis solent recurrere, itemque ad impetum sanguinis alicunde fluentis aversione compescendum. Id certè artis est præceptum: In Revulsione, per incisionem venæ petitâ, quantò quis majorem in numerum particulares auxerit detracti-  
ones, tantò eam fecerit efficacior. Miror profectò, *Avicennam* ea parum vidisse, quæ post paulò apud *Galenum* sequuntur: Ubi fervere inest sanguinis plenitudo, acutissimam accendens febrem, subito inquit, ac semel evacuare expedit: eamque inanire plenitudinem tentandum, vel ad animi usque defectum, virium tantum consulto robore. Id verò ideo faciundum is Auctor censet, ut ne fervidus



vidus humor in princeps membrum irruat. Sanguinem potiùs turbat, quàm demit, putredinemque, & incendium exauget, quisquis hìc diminutè vacuat. Quod incommodum sensit quidem ipse sæpe aliàs *Avicennas*, at parum intellexit. Cum alicui, inquit, sanguis mittitur, cui succorum multa est in corpore redundantia, sectio venæ causâ fit ebullitionis istorum succorum, eosque permiscet, quare frequens ei necessaria incisio est. Apparet certè id ipsi imputatum sectioni ab hoc Viro fuisse, quod tribui diminuto ejus usui debuerat. Hæc ista, ut meritò dicuntur in *Avicennam* erroris Auctorem: ita, si is culpâ vacat, iniquè. Aliqua esse ejus rei videri possit conjectura. Nam etsi is libro Canonum suorum primo, perperam sic præcepit: In febre autem sanguineâ necesse est, ut evacuatio fiat minutione non superfluâ, in principio; & superfluâ, cum affuerit maturatio febris; ita contrà libro quarto verissimè dixit, Intentio in curatione febris sanguinis

sanguinis est evacuatio plurimi usque ad Syncopen; & pòst, Evacuationum autem alia haud æquè commoda est, atque venæ sectio in brachio, quâcumque etiam horâ fiat, & non expectatur vel Crisis, vel materiæ concoctio. Et ne cesses, inquit, sanguinem emittere, donec æger prope animi sit defectiōnem, aut eo jam ipso sit defecto. Quid quæso, his locis, qui ambo unâ de febre, unâque de missione sanguinis scribuntur, pugnantius? Servari *Avicennæ* præceptum posset, quo scribitur, primum parcè vacuandum, dein maturescēte morbo, liberatius, si hoc de *pur-gante* medicamine, illud de leniente intellectum velis; verum id ita non posse intelligi, penitusque Auctorem de venæ locutum fuisse sectione antecedens, sequensque commonstrat oratio. Erit itaque id, ceu plenum erroris, periculique, rejiciendum placitum. Ac semper, ubi ingens febris afficit, & vires ferunt, sanguis semel per initia mittendus, ne copia, protinus non adempta,  
maximis

maximis putrefactionibus, atque febricitationibus materiam suppeditet. Quod intuitus periculum incomparabilis ille *Galenus* diligenter præcepit, in Syncho, ardentissimâque febre, primis initiis, sanguinem ad animi usque defectum esse detrahendum. Scilicet tum onere humorum levata corporis vis agilior fit, promptiorque ad residui morbi depulsionem, quæ posterioribus diebus, quum venæ sectio inutilis est, futura laboriosa est.

*Periculosa  
est in fe-  
bris statu  
venæ secti-  
onis repe-  
titio.*

Quare etiam in reprehensionem haud levem quidam nostræ ætatis Medici incurrunt, qui etsi initio semel rectè sanguinem miserint, tamen cum, incremente jam morbo, ac pæne consistente, ingravescere symptomata cernunt, eorum territi sævitiâ, urinæque, si Diis placet, impulsî rubedine, iterum secare venam tum incipiunt, *octavo*, vel *nono*, vel *decimo* die. Quidam adeò sunt effrænatae temeritatis, ut vel *undecimo* febris continuæ die, vel *duodecimo*, vel *decimo tertio*, sub gravissimis



finis vigoris symptomatis, naturâque maximè afflicta, sanguinis missionem repetant. Sanguinaria mehercle, capita, quæ unâ cum atrocissimo morbo valetudinem hominis junctis viribus oppugnant. Primum enim in eo, quod maximè absurdum est, falluntur, cum secundæ venæ necessitatem ex vehementiâ symptomatum metiuntur. Scilicet his ipsis afflictae vires novâ debilitant inanitione, intentamque morbo naturam interturbant. Quòd si *Galenus*, per acutæ febris provectiora incrementa, in eo etiam homine, cui primis temporibus sanguis missus non fuit, non quidem hunc mittit, sed in frigidaë solo poculo reliquum præsidium ponit; quâ, quæso, ipsi confidentiâ, cum initio semel sanguinem traxerint, iterum juxta statum trahere audebunt? Quàm verò parum vident *Hippocratis* præceptum, quo summa quies, abstinentiâque momentaneorum remediorum, vigentibus jam morbis, imperatur. Scilicet tum omnia sunt maxima: ipsi febris

bris ardores, fites, inquietudines, vigiliæ, deliria, sopores, & hujusmodi, quæ sic naturam fatigant, ut si alia vis, turbatiõe imprudentiâ Medentis accesserit, haud difficillimè ea sit morbo succubitura. Accedit aliud incommodum in humore peccante longè maximum, quod a nemine puto fuisse animadversum. Scilicet, cum putris humor jam pæne totius vi naturæ concoctus, separatusque est, turbatis missione sanguinis succis venarum, cum benigno permiscetur, totumque naturæ subvertitur institutum. Profectò sic se res omnis habet. Ut primùm nata ex humoribus putrefactis febris est continua ; valens, sui que nunquam oblita muneris natura, corruptum humorem magnâ vi aggreditur, alterans eum ipsum, edomans, concoquens, atque a sincero separans, ut hoc scilicet conservato, illum, qui contra se est, pellat. Nihil enim rectè natura, quod spatio temporis antè non separaverit, excernit. Priusquam in hoc admodum incumbere opus coëpit, quæ

quæ materia venis superest, ea primis temporibus, sectâ venâ, demenda est. Sic enim faciliùs atque citiùs natura, quod reliquum est, vincet. Hoc remedii genere per initia administrato, posterioribus inde temporibus, cum invadere humorem putrem natura jam diu coëpit, summa postulatur quies, omnisque refugienda succorum agitatio, quâ, turbare concoctionis, atque separationis opus possit. Itaque etiam per hæc tempora, secundis venæ sectionibus fas non est corpus laceßere. Quinetiam, si evincendo, & ad statum concoctionibus promovendo morbo, pæne confecta natura fuit, quâ quæso sustineri eadem possit, cum primis labefactata separationis laboribus, novos, eosque prælongos aggredi cogitur. Vidi ego permultos ita intempestivè vacuatos, ingenti spiritûs exortâ difficultate, gravique delirio, & post hoc ipsum sopore, novissimum vitæ diem clausisse. Perturbationis, confusio-  
nisque humorum incommodum leve est



primis acutæ febris *quatuor* diebus;  
 cum nondum admodum profecit concoctione natura, neque symptomatis exercita multum fuit. Itaque *Corne-  
lius* etiam *Celsus*, ut primos morbi  
 quatuor dies sanguinis missioni idoneos;  
 ita posteriores esse inutiles scripsit; sic  
 ut detractio imbecillum corpus facere  
 possit, non possit integrum. Nostræ  
 quoque ætatis rarum decus, *Joannes  
Fernelius*, antiquorum secutus vesti-  
 gia, judicavit; ubi in morbis visun-  
 tur manifestæ concoctionis notæ, non  
 ampliùs venæ sectione, sed purgatione,  
 aliisque præfidiis reliquam curationem  
 esse transigendam, nisi, quod interdum  
 fit, cruditatis signa denuo se prodant. At  
*Galenus*, inquires, in mittendo sanguine  
 ipsas vires, non numerum spectari die-  
 rum oportere scripsit; adèò ut & sexto  
 febris die, vel septimo, vel octavo,  
 sanguinem miserit. Ejus præcepti lo-  
 cus esse potest in febribus intermitten-  
 tibus, naturâ diuturnioribus, in quibus  
 & lentæ sunt concoctiones, & lentæ  
 vires;

vires efficiuntur, ut his de causis differri venæ sectio in paulò longiora spatia tutò possit. Potest & de Syncho non putridâ id præceptum videri intellectum, quoniam de eâ ipsâ febre *Galenus* eo loco differit. Nimirum curatio hujus, utpote ferventis sanguinis secutæ copiam, ac putredine carentis, perficitur; cum misso sanguine tollitur plenitudo, & refrigerantibus materiis ferventes succi temperantur. Ut autem nulla hîc subest putredo, sic nulla quoquè requiritur materiæ concoctio, nullâque est eximia virium afflictio. Itaque quovis die mitti sanguis potest. At in putridâ, eâdemque continuâ febre, habenda ratio virium, est atque concoctionis, quæ, posterioribus hujus morbi temporibus, venæ sectionem, utî nuper docui, averfantur. Quòd si quæ Synochus, quatuor diebus non putrida, neglectâ inanitione, fiat putrida, etiam sanguis mitti poterit quarto post coeptam putredinem die, qui tum numeratur octavus ab ortâ primùm febre.

Adeò verò id firmum est, in continuâ feбри, ex quo tempore putredo esse coepit, nunquam tutò supra quartum diem venam secari ; idque non modò virium causâ, quæ tum fiunt symptomatum insultu infirmiores, sed etiam materiæ, quæ, procedente tempore, multùm concoqui coepta, atque separari, novâ sanguinis fusione turbatur, permisceturque. At dicet aliquis, purgantium medicamentorum potiones, provectioribus febris incrementis fas esse dari ; ideoque tum etiam mitti sanguinem posse ; ùt quæ res multò minùs, quàm medicamentum turbet corpus, atque humores permoveat. Verùm, ô bone, non miscet humores hâc turbatione medicamentum, sed coctos separatosque extrahit, ac naturæ juvat institutum ; venæ verò sectio, quia omnem pariter sanguinem, non humorem solùm peccantem fundit, parum ejus, quod contra naturam est, emittit, separatumque excrementum benignioribus cum succis fusione miscet. Id quoquè  
nobis



nobis objici a quopiam possit. Si iterari sanguinis missionem interdum *Galenus* voluit, cum imbecillæ vires unicam, eamque plenam non ferunt: cur id quoque nobis non imitari liceat, cum vires ferunt; siquidem, minore harum incommodo, pluribus diebus sæpius sanguis trahitur, quàm protinus semel effunditur? Atqui hoc ipsum, ut in sanis hominibus, & in longis naturâ morbis locum habet, ita in acutè febricitantibus non habet, ut qui profusas per initia postulant detractiones. Quod si in his quoque vires (quod rarò fit) parum respondent, arripienda quidem vacationis partitio, at non in plures dividenda est dies. Scilicet eodem die fieri ea debet, aliàs unicâ, aliàs duabus interpositis horis, medioque tempore refici æger alimento potest. Jam autem ne id quidem etiam in continuis febribus imitatione dignum est, quod *Galenus* in multos dies partitionem rejicit, cum humor pertinaciùs insedit, ut in viscerum scilicet interiorum tumori-

bus. Nempe dispar omnino est ratio  
vacuationis inter ægritudines, quarum  
materia per universi corporis diffusa est  
venas, ut in assiduis accidit febribus, &  
inter eas, quarum humor extra venas  
lapsus partem corporis aliquam pertina-  
ciùs occupavit. In acutâ quidem febre,  
morbo certè universalì, priusquam ar-  
dores, atque putredines invalescant, san-  
guinem per initia demere convenit; id-  
que universè, atque confertim, sæpe  
ad animi usque, si vires ferunt, defe-  
ctum. Subitò enim corpus in alium  
demutari statum postulat. Quòd si quis,  
initio febris hujus, aliquid detraxerit  
sanguinis, ac duobus, tribusve pòst die-  
bus, iterum tantundem detrahat, is  
profectò, ut nullâ id facit necessitate,  
ita parum commodat, & tracto in spa-  
tium morbo, nocet. Contrà autem,  
in partium morbis, ac præsertim in-  
flammationibus, quoniam humor extra  
venas est, ac fixiùs insidet, id genus i-  
teratæ vacuationis haud inutile est.  
Nam hoc intervallo parti impactus hu-  
mor

mor remigrat in venas, secundâque tum  
sectione utiliter extrahitur. Ea itera-  
tio, ubi inflammationes urgent inter-  
næ, primis fieri debet diebus tribus, in  
aliis autem tumoribus inflammatione  
carentibus, posterioribus sæpius diebus.  
Sic, in curando lienis scirrhus, *Galenus*  
majore intervallo repetendam venæ se-  
ctionem docet. Id imitari studere in  
acutâ feбри, nil nisi hominem esset ex-  
tinguere. Ergo etiam *Avicennas*, ubi  
de curatione loquitur febrium putrida-  
rum, exitiosam sententiam protulit,  
maximè si hanc de continuis quoquæ  
febribus voluit intellectam. Et consi-  
lium quidem, ait, meum in venæ sectio-  
ne est, ut quantum fieri potest, ea o-  
mittatur; si verò fieri non potest, au-  
ctæ sectionis vices præstant semel a-  
demptæ copię. Adeò verò jam nunc  
constare ex iis, quæ diximus, potest, sem-  
per maturandam per acutarum febrium  
initia sanguinis missionem esse, rarò  
partiendam (ubi nimirum tenuiores id  
postulant vires) nunquam in posteriora



morbi rejiciendam tempora. Quo magis dolenda, ne dicam detestanda, est complurium cæcitas Medicorum, qui neque commissum hâc in re cognoscere errorem, neque, eo cognito, tutiorem curandi viam, sequi sustinent. Vidi ego haud parum multos ita temere ab aliis Medicis habitos periisse, quorum exitium multis mihi antè diebus licuit præfagire, tum vehementis morbi, viriumque non usquequaque valentium intuitu, tum ex malè conciliatâ hâc, atque alienis temporibus usurpatâ, sanguinis missione. Scio equidem, per febres accidere interdum, vel negligentia ægrotantium, vel timiditate; aliisve de causis, ut ne ante decimum quidem quartum diem, immo ne ad vicesimum sanguis sit missus; qui tamen tum mitti utiliter possit; siquidem plenitudinis, atque cruditatis morbi signa immorentur, ac simul ipsæ etiam permittant vires, neque vetustate ægritudinis sint collapsæ. Verùm scire licet, hæc intelligi non posse de morbis pro-  
 sum

sum acutis, tantâque symptomatum, tamquam fluctuum, agitatione continenter afflictañtibus, utpote quorum velocior est & concoctio, & resolutio. Neque enim extremè gravem morbum sustinere diu natura potest, quin huic vel succumbat, vel dominetur. Quò fit, ut differre hìc missionem sanguinis periculosum sit. At in iis febribus continuis, quæ vicesimum fortè diem, aut eò superiorem attingunt, utique pituitosæ, vel melancholicæ, ut neque celeres sunt concoctiones, neque symptomata (quibus certè vires offenduntur) æquè atrocia, ita & tardior venæ incisionis carere periculo memorabili potest. Eaque differendi auxilii licentia longè est in his febribus major, quæ intermittunt, & in multam ex naturâ incidunt vetustatem; cujusmodi est quotidiana, & quartana. Eò spectare id *Avicennæ* potest, utilem die etiam quadragesimo venæ sectionem esse. Id certè ubique perpetuum est, quod suprà etiam proposui, non numero die-

rum hanc vacuationem primùm, ac per se prohiberi, sed quòd longiore spatio temporis, vel concocta sit morbi materia, vel vis ægrotantis resoluta.

*Quædam  
tamen res  
sunt, quæ  
sanguinis  
missionem  
in principio  
Febris  
remorari  
debent;  
ac primùm  
cibi  
cruditas.*

Porro hæcenus quanquam satis superque demonstratum sit, venæ sectionem incipientibus his morbis protinus destinari; res tamen quædam sunt, quibus nisi antè consultis, atque provisus, neque commodè, neque tutò sanguis mittitur. Ex illarum numero cruditas est cibi nuper sumpti, neque penitus adhuc in ventriculo confecti, maximè, si simul etiam alvus excrementis impedita est. Nimirum si tum vena secaretur, facilè crudi aliquid ex ventriculo, vel fordidum quid, atque putre ab alvi oleto in venas traheretur, vacui sequelâ inanitas, atque indigentes. Quod incommodum eò fuerit majus, quòd profusior adhibetur vacuatio. Itaque gravissimum in ipsâ fuerit Synocho, in quâ sanguis ad deficientem quoquè annum mitti debet. Ergo etiam rectè Veteres, tùm in hâc febre, quæ tamen



acceleratam postulat hujus opem vacuationis, tùm in quâvis aliâ continuâ, tantisper hujus auxilii usum distulerunt, donec & cibus intus concoctus, & venter suâ esset saburrâ exoneratus. Id si sponte naturæ non fit, morâ atque quiete juvanda epularum est concoctio, & alvus clystere, vel glande, aut si hæc æger recusat, cassiâ, mannâ, decocto prunorum, similibusque lenientibus, per os sumptis, solvenda.

Præter hanc cruditatem, quæ sola *Deinde, impurus in Ventriculo humor.* ab Antiquis ante secandam venam animadversa castigatâque fuit, in febribus potissimum acutis, quæ improbis deductionibus gaudent, quædam etiam alia observari par est, ita missionem sanguinis remorantia, ut præterire tamen eadem subinde fas sit, si continuæ febris urgens necessitas cunctationem respuit. Quanquam optatissimum sit, eadem quoque ante sectionem videre, atque tollere, si qualemcunque pati morbum morbus potest. Ergo impurus aliquis humor, bilis referens naturam, si in

in ventriculo, aut in affidentibus ei venis continetur, utiliter ante sectionem blandiore extrahitur medicamento, ita ut putrem id tantummodo materiam venarum exigat primarum, sine vi, sine corporis, sanguinisque exagitatione. Ad eam rem (me iudice) facit duarum plùs minùs drachmarum macerati rhabarbari, dilutum in prunorum decocti juris, aquæve hordeaceæ unciis tribus & semis: additâ diacatholici semunciâ, ferapiique ex multis rosæ macerationibus unciâ. Si pituita quoquè bili miscetur, agarici, atque rhabarbari, singulorum plùs minùs drachma maceratur; ac reliqua, quæ modò pro poculi formâ composui, miscentur. Quòd si humor, communibus contentus ductibus, sursum ad stomachum vergit, eliciendus vomitione est, aquâ tepidâ serapio acetoso mistâ, & ad duas potui datâ libras. Post hæc, micâ panis, punici mali imbutâ succo, reficiendus stomachus, corpusque aliquantisper in quiete habendum, ac tum protinus vena tundenda est.

est. Hæc curatio, cùm aliàs semper, si fieri licet, tùm eo potissimum tempore servanda est, quo flava bilis (quæ tædia atque incommoda, præcipuè si quis jejunos est, exhibet graviora) ventriculum occupavit. Jam etiam tum periculosè sanguis mittitur, cum stomachus (quem os dico ventriculi) nimium est vel sentiens, vel imbecillus. Tanti refert hoc vitium ante sectionem venæ sustulisse, ut, ni id sit factum, sæpe grave inde periculum, atque ipsa quandoquè mors, auctore *Avicennâ*, sequantur.

*Maximè  
verò Sto-  
machi vel  
nimius  
sensus, vel  
imbecilli-  
tas.*

Proximum nunc est, horam præscribere, ipsumque temporis articulum, quo rectè mitti sanguis possit. In quâ re delinqui indies a multis video imperitissimis hominibus, quibus tempus pomeridianum, atque nocturnum adeò est formidabile, ut, etsi mitescere tum maximè febris videatur, malint tamen marutinum arripere, quanquam gravissimâ (ut interdum incidit) febricitatione molestum. Alii, sinistro territi aspectu a-

*De Horâ  
sanguini  
mittendo  
maximè  
idoneâ :  
eâque est  
illa, in  
quâ Fe-  
bris ma-  
xima est  
remissio.*

strorum,



strorum, occasionem salutaris remedii in aliena morbi tempora periculosè rejiciunt. Res autem sic se habet. Astra quidem haud parvi judico facienda, verùm potiora his esse censeo momenta ægritudinum, quibus exigentibus, suo quæque tempore reperienda, expediendâque sunt remedia. Quæcunque itaque febris totius est hora mitissima, ea maximè accommodata venæ sectioni est. In ipso febris vehementis impetu sanguinem mittere, hominem, inquit *Celsus*, jugulare est. Ergo etiam vespere, ipsâque intempestâ nocte, si remittere maximè febris deprehendetur, ac manè atrocissimè affligere, huic certè tempori illud antefereendum est. Matutinum enim hoc ipso pejus est, quòd cum naturâ levius esse debeat, morbi vitio non sit. Ea observatio in iis febribus utilis est continuis, quæ per tertium quemque diem ingravescent, itemque in quotidianis, ac quartanis continuis; in quibus, quia gravior exacerbatio non in idem semper incidit

incidit diei tempus, variè secare venam oportet, modò manè, modò ipso meridie, sæpe vespere, & altissimâ etiam (quod interdum fieri necesse est) nocte.

Quòd si in his febribus bis uno in die, manè scilicet, ac meridie, vel vespere, vel etiam noctu, par incidit remissio; aut si Synochus sit putrida, quæ idem robur accessionis, donec solvatur, retinet; vel continenter declinando, vel semper increcendo movetur: tum profectò tempus est arripiendum matutinum, ut quod ante omnia ægrotis mite, atque tranquillum est. Temperiem enim meliorem, ac sanguinem solis exortu vegetum, ipsoque diei lumine fufum, serenum, ac fluxui opportunum exhibet. Quò autem commoditas sit ea cumulatior, non statim experrectis aperienda est vena, sed horam unam, & item alteram vigilibus. Simul etiam tum alvi excrementa, atque vesicæ, uti superioribus locis præcepi, antè vacuari necesse est, maxime,

*Ubi nulla,  
vel par est  
remissio,  
matutinum tempus eligendum est.*

mè, si profusior secutura est detractio. Matutino autem tempori, si ad benignitatem spectas, vespertinum succedit. Ipse meridies suo æstu, intempesta nox ambientis cœli rigore, minùs tutum id genus remedii reddunt.



## C A P. V.

*Quæ Vena per Febres Continuass  
secanda sit, quidque inter Se-  
ctionem, & pòst agendum.*

*Sectioni  
Cubiti ve-  
na maxi-  
mè oppor-  
tuna est.*

**D**ATA jam nunc mittendi sanguinis opportunitate, videndum erit, quæ maximè secari debeat vena. Quoniam febris assidua ferè in corpore incidit plenum, ac bene habitum, profusamque ac celerem detractioem postulat, unde mox & copia demi humorum, & refrigerescere affatim corpus mutarique in alium statum possit, videtur profectò omnium esse commodissimum

simum



fima ad hanc rem incisa dextri cubiti interna vena, ut quæ directo tramite ex jecore, tamquam scatebrâ, atque origine sanguinis propagatur. Quod si ea parum in conspectum datur, tundenda erit media. Plexum autem cubiti arripere, non manum oportet, quoniam hîc ut sunt venæ angustiores, illic admodum latæ, & trunco corporis propiores, accidit, ut in cubiti flexurâ missus sanguis, celeriter atque impensè (id quod in hujusmodi febribus apprimè requiritur) corpora tùm vacuet, tùm alteret, supra manum contrà tardiùs, ac minùs. Quò magis rejicienda sit quorundam immoderata timiditas, qui, sub acuto morbo, grandiore cubiti venam ferire detrectant, jecorariæ supra manum venæ incisione contenti. Quos timidior animus, aut innata quædam proprietas, aut afflictæ vires, vitiumve stomachi proclives ad animi defectum, vel ad eo graviolem synco-  
pen reddunt, iis tutiùs vena manûs inciditur, aliis rectiùs ex cubiti vase san-  
guis

guis mittitur. Infulsè admodum *Avicennas*, si venam in cubito ferire non licet, eam præcipit secandam, quæ in fronte est. Siquidem humores copiâ lascivientes, putredinèque fervidos, ac mobiles, versùs partem trahit principem, metumque eâ curatione insanix, quam *Φρενίτιν* vocant, facit. Hæc verò vena capiti vacuando, non toti corpori inservit. Quapropter *Galenus* ejus incidendæ usum ad capitis commendat gravitates, & ad ejus inveteratos ex plenitudine dolores. Cæterùm prævacuatum esse, inquit, universum corpus oportet.

*Cautiones  
quedam  
adversus  
animi de-  
fectum;  
ejusque  
prænotio-  
nes, & re-  
media.*

Porro in acutâ feбри, quæ affluentiore latura est inanitionem, quò minùs anima deficiat, rectè *Avicennas* præcepit, supinum cubare ægrum oportere: nam is corporis situs vires hominis minùs lassat, quàm si vel is ipse staret, vel federet, quâ in re opus est connixu virium animalium majore. Sed & ipsa intestina, atque viscera, quoniam stanti, altèque sedenti pen-

dent

dent ex præcordiis, vitalem, ac naturalem vim molestant, promptumque animi reddunt defectum, utique, si plaga etiam venæ largior inflicta est. Talis enim plûs spiritûs vitalis fundit, strictior minûs. Si animi in proximo est defectio (quod coloris, ac pulsûs mutatione, itemque oscitatione, pandiculatione, aurium tinnitu, oculorum caligine, ac fluentis sanguinis labascente impetu deprehenditur) laxato protinus vinculo, pressâque pollice venâ, detrahere cessandum est, ne, vel pro animi deliquio, mors occupet, id quod *Galenus* tribus accidisse Medicis, quos ipse noverat, refert; vel certè, ne noxam, vix multis recuperabilem annis, vires incurrant. Simul etiam tum resupinus æger ad sese revocari, frigidâ in os sparsâ, & extremis tùm convulsis, tùm perfrictis debet, ac dein vini, aut aromatum odore, itemque mali punici succo, aut capi jusculo refici.

Jam verò postquam sanguis pro viribus, ac pro febris magnitudine est emissus, *Quid agendum sit, post sanguinis missionem.*

G



missus, quies corporis imperanda est, per quam amissi spiritus, ipsaque hominis vis recreentur; id quod felicius quoque per decubitum fiet supinum, cunctis visceribus in spinam dorsii suaviter reclinatis, eaque sitis æquabilitate plus sibi caloris, ac spiritus mutuo imperientibus. Ea verò quies citra somnum esto, nisi tamen improba, multumque profusa antecesserit detractio, quæ vires impensius labefecit. Sub quo casu *Galenus*, dato primum facili cibo, ægrotis somnum indulgit. Facilis cibus ptisanæ est cremor, aut pulli jusculum. Sed tempestivum modò videatur, quoniam de febricitantis inanitione per sanguinis missionem satis superque dictum est, ut de sustentatione virium agamus, quæ sic semper habendæ, tractandæque sunt, ut ne proposito genere vacationis, aliisve necessariis curationibus sed & ne vel ipsius quoque morbi sævitiâ collabantur. Sustinentur vires commodis cibis ac poculis, de quibus in genere quædam proposui dicere, si mulque

mulque hinc quæ ea ipsa administrandi debeat esse lex, atque ratio, per morbi principium, quod jam versamus, adjicere.



## CAP. VI.

*Quæ Victûs ratio in genere Febrium Continuarum servanda sit.*

**H**AUD levis cura victûs, cùm aliis in morbis, tùm præcipuè in acutis febribus esse debet; quæ, si ita ut æquum est, adhibetur, magna ægris affert commoda, si negligitur, maximis eos sollicitat incommodis. Ciborum, inquit *Galenus*, concoctioni magnopere prospicere in omni febre oportet; quoniam ea, si in ventriculo, vel in jecore improspera est, febres intendit, ac fucci vitio exacerbat. Quàm verò commodè id a *Celsò* de febricitantibus

*Optimum medicamentum est opportune cibus datus.*

G 2      dictum

dictum est? Optimum medicamentum est opportunè cibus datus. Quò magis stuporem admiror quorundam, magnum sibi medendi usum vindicantium, qui hanc curationis partem adeò parvi faciunt, vel, quod magis credam, ignorant, ut tum nutrant, cum exitio est alimentum; tum fame pugnent, cum vita ægrotantis unico sita in oblato cibo est. Quare operæ pretium facturus videor, si primùm in genere omnem victûs rationem proponam, febribus idoneam acutis; scilicet, cujus isse debeat materiæ, itemque qualitatis, quâ dein mensurâ, quo tempore, atque modo sumi. Quâ in re, doctis hominibus, ac legitimum cibandi usum cognoscere volentibus spero me satîs esse facturum.

*victûs  
partitio in  
diversa  
genera.*

Ergo *Hippocrates*, primus atque exactissimus diætæ præceptor, victum partitur in crassum & in tenuem. Sub hoc ea sunt, quæ vel sorbentur, vel bibuntur; sub illo, quæ comeduntur. Crassum longis destinat morbis, tenu-



em acutis. Verùm, ùt morborum acutorum par neque vis, neque duratio est omnium, ita alia, atque alia in iis forma tenuis victûs esse debet. Commodè itaque idem Auctor victum hunc proposuit, modò tenuem, modò exactè tenuem, modò supremè tenuem. Triplicem alimenti materiam tribus his tenuis diætæ generibus *Hippocrates* in eo volumine, quod de victu composuit morborum acutorum, aptavit: Totam ptisanam, cremorem ptisanæ, & aquæ mulsæ potum. Tota ptisana, quæ nimirum omnem hordei substantiam habet, vicem crassæ forbitionis gerit, victumque constituit tenuem. Ptisanæ cremor, sive succus percolatus, tenuis forbitio est, & victum refert exactè tenuem. Mulsam verò victum summè tenuem *Hippocrates* dixit, *Galenus* absolutam quoquè cibi, ac potionis abstinentiam.

Ut igitur probè constet, quod genus victûs tenuis singulis conveniat febribus acutis, scire licet, rationem atque

*In Victu  
instituen-  
do, spe-  
ctandum  
est praci-  
puè viri-  
um robur.*

scopum totius rei propositæ, uti hîc, ita aliis quoquè in morbis a virium peti robore, non præsentium modò, sed & futurarum. Itaque etiam videre, quantum summus distet morbi vigor, convenit. Pro eo enim spatio, variè vires afficiuntur. Harum ipsarum causâ unicarum, alimentum ægrotis datur, non item morbi, qui non modò non indicat, exigitve cibum, sed semper dehortatur. Quare tum præcipuè necesse est ægris cibo subvenire, cum vires sunt imbecillæ; tum rursus abstinentiâ pugnare, cum febris, symptomatum magnitudine atque atrociâ, maximè afflicta vires non admodum infirmas. Rectè sic loquitur in *Aphorismis Hippocrates*: Quum morbus est peracutus, extremos protinus labores habet, summéque tenui victu est utendum. Item de viribus paulò post: Sed & ex ægro, inquit, conjecturam facere oportet, num is cum præscripto duret victu ad morbi usque vigorem, anne priùs deficiat, imparque cum tali victu priùs succumbat, quam cedat.

cedat morbus, atque obtundatur. Scire verò licet, si vehemens febris, vehemensque simul virium est imbecillitas, potiore esse virium, quàm morbi dignitatem, ciboque facili ægrotis tum esse succurrendum. Quod & ipsum lego factitasse *Hippocratem*, qui interdum, in acutæ febris vigore, ubi alicujus interventu symptomatis vis hominis insigniter periclitaretur, confidenter cibum dedit. Id verò nobis quoquè sequendum est, maximè, si effusa aliqua corporis incidit inanitio, quæ, interposito tempore, metum afferre certum possit. Tales sunt quibusdam in febribus malignis inexhausti sudores. Tale per liquefactivas febres assiduum est alvi profluvium, vires, consumpto corpore, resolvens. Non rarò etiam, per febrium judicationes, sanguis e naribus tanto impetu, tantâque copiâ fertur, ut exitii periculo vitam exponat. Atque vera hæc, & discriminis plena (cui supra curationem symptomatis, cibo quoquè succurrendum) virium est im-

G 4

becillitas,



becillitas, non itidem ea, quæ morbi secuta acumen, nequaquam autem corporis inanitionem, imbecillitatis speciem falsam præbet. Ejus rei ignorantio multum erroris inter curandum nonnullis exhibet : qui cum, sub ipsas febrium judicationes, torqueri ægros dolore, inquietudine, siti, atque vigiliâ cernunt, viribus quasi in sese infirmis opem, si Diis placet, laturi, magno periculo cibum offerunt, qui cibus quia non concoquitur, addit ad morbum, & impetum symptomatum adauget. Atque ita de virium affectione statuendum est.

*Et quantum distet morbi vigor.*

De vigoris etiam distantia diligenter videndum, ut idoneum victus genus instituat. Sicut enim iter confecturus aliquis, prout longum id, aut breve est, viaticum sufficiens comparat, quo sustineri vires ad proficiscendi finem possint, ita corpus quoque ægrotantis variè, pro spatio morbi, ne vis concidat, alendum est. Eaque observatio non modò in alimenti materia, sed in quantitate

titate etiam locum habet. Scilicet quò vigor latius abest, eò magis, ac plenius alendus homo est, quò propinquor, eò minùs crassè, atque contractiùs.

Sunt autem conjecturæ haud infidæ, *Quomodo cognosci possit futuri vigoris tempus.* quibus prænosci tempus futuri vigoris potest. Ipsum nempe febris genus (quod ejus quoquè comprehendit materiam, atque motum) & quæ febri pòst accedunt symptomata, concoctionis item celeritas, vel tarditas, atque anni tempus. Ergo febris ardens, *Καυσώδης* Græcè dicta, quam sincera bilis, æstivis horis, excitavit; itemque Synochus putrida, ubi protinus velociter moventur, molestissimisque symptomatis, & præcipuè ingenti inquietudine ægrum lacerant, præcipitante jam tum etiam materiæ concoctione, ut plurimum, *quarto* die, solvuntur, maximè, si apparere concoctio, *primo* die, coëpit. Jam autem, si multa quidem deest inquietudo, perseverant tamen ardores, cum vigiliâ, ac capitis dolore, si ipsa quoquè concoctio primùm *quarto* visa est

est die, expectari morbi finis *Græcis* atque *Italīs*, die *septimo*, nostratibus *nono* potest. At hæc febres continuæ, quarum alter semper quietior dies symptomata exhibet mitiora, ferè *undecimo* die (si *quarto* coepta evidenter concoctio est) ad vigorem, & ad iudicationem perveniunt. Sed & si, inclinato febris impetu, quietiori die symptomata gravia intermittunt, ut plurimum, die judicantur *decimo quarto*, qui terminus est morborum verè acutorum. Quamquam non desunt interdum acutæ febres, quæ ad *vicesimum*, immo ad ipsum etiam *quadragesimum* perveniant, in quibus longè semper liberalior instituetur victûs ratio. Prætenuis enim cibus, tanto morbi spatio vires non sustinet. Utut autem continuæ febres cadant in vetustatem, nullam tamen harum est, quæ non magnam *quarto decimo* mutationem, ad salutem vel mortem, aut certè ad melius, vel pejus experiatur. Refert *Galenus*, nullum unquam morbum, qui quidem al-

initio



initio vehementer moveretur, cum ipsum diem sine aliquâ mutationum harum transiisse. Loquor hæc *Hippocratis* causâ, qui acutos morbos diebus *quatuordecim* finiri scripsit. Siquidem fieri posse *Galenus* existimavit, ut acuta febris *quarto supra decimum* die, ad melius, aut ad pejus judicetur, apud *viceſimum* autem, aut *quadragessimum* ad salutem, aut in exitium destinat. Sub hujusmodi casu, rectum instituendi victûs consilium est, durante continuæ febris impetu, cibum offerre acutis accommodum morbis, mitescente autem post decimum quartum diem ægritudine, duobus eodem in victu diebus persistere tenui, atque hinc paulatim ad pleniorē transire.

Explicatis jam abunde victûs scopis, proponendum est quod genus alimenti, quæque id mensurâ, prout quæque febres durant, offerri debeat. Quidam antiquos secuti Medicinæ Auctores sic præcipiunt: Si febris continua primo *quatrīduo* cessatura est, viribus in

Victûs  
præcepta in  
febris,  
quoad ciborum  
genus, ac  
mensuram.

2

denſo

denso corpore satîs firmis, utilem omnimodam abstinentiam cibi ac potionis esse, id quod ultimum esse contendunt tenuissimi victûs, aut certè sola, si quid vires laborent, licere dari pocula. Ubi *septimo* die fiet judicatio, locum in eâ febris habere tenuem forbitionem, hoc est, ptisanæ cremorem. Nec inidoneam hanc quoquè esse, si *undecimo* febris solvetur, nisi, virium causâ sustinendarum, crassam æger forbitionem, totam scilicet ptisanam requirat. Sin autem in *decimum quartum* diem rejicietur morbi finis, crassâ forbitione esse utendum. Verùm hæc cibandi præcepta, ut *Græcis*, atque *Italîs* conducunt, ita Septentrionalibus gentibus, ceu multùm aliàs edacibus, ac sæpius uberiûsque esse solitis, ad imitationem sunt inutilia. Quis enim acutè febricitantem nostratam tutò sub quatridianâ cibi potionisque continuerit abstinentiâ, aut septem dies nutritionis cassam unicis reficere poculis, sine virium jacturâ, atque periculo, possit? Omit-

to calumniam vulgi, qui fame sitique e-  
nectum hominem, non morbo supera-  
tum, si mori eum contingit, clamat,  
ingenti Medentium dedecore. Et ut  
quàm fortissimè populi contemnamus  
voces, artem sæpe iniquè culpantis,  
ratio tamen monet, ipsèque docet *Hip-  
pocrates*, prætenuem nimisque seve-  
ram victûs rationem esse inutilem, ac  
periculo opportunam. Errata enim, si  
quæ ægrotantis culpâ, vel Medentis  
fiunt, molestiùs feruntur ab homine  
propter immodicam debilitato inedia.  
Id si suis in *Græcis Hippocrates* servari  
præceptum voluit, multò magis nos  
sequi in nostratibus æquum est, quos  
ad paulò pleniorē victum ipsa quo-  
què natura, coelum, atque consuetudo  
cohortantur. Illud certè ubique viden-  
dum est, ne æger, vel supervacuâ mate-  
riâ oneretur, vel multam imbecillitatem  
fame contrahat. Ergo etiam, me ju-  
dice, ubi *Græci* inedia imperant, nos  
pocula damus; pro illorum poculis,  
nos sorbitiones; ac pro his, etiam ea,  
quæ



quæ comedantur, indulgemus. Tanti est consuetudo, hominumque natura. Id sic scriptum apud *Hippocratem* invenio: Conjicere, inquit, oportet, & robur, & modum cujusque morbi, itemque hominis naturam, & ægri in victu consuetudinem, non tantum in cibis, verum etiam in poculis. Idem aliàs sic: Quod etiam semel, aut bis, & plùs, minùsve, & minutatim alere conveniat, spectandum est; dandum verò aliquid tempori, regioni, ætati, & consuetudini. Scire tamen licet nimios nos esse non oportere in nostratibus alendis, ceu quibus propter voracitatem, atque crassæ materiæ alimentorum cruditas ferè adest semper aliqua, quæ tempestivâ inediâ, incipientibus potissimum febribus, corrigi tutò potest. Id opinor censisse *Celsum*, cum principia scriberet morborum famem sitimque desiderare.

*Quales cibi febribus utiles sint.*

Diximus hætenus de genere, ac mensurâ ciborum, qui continuis utiles sunt febribus; adeoque proximum est qualitatem

tatem

tatem adjicere, quam haud dubiè decet esse humidam, ac refrigerantem. Vi-ctus, ait *Hippocrates*, humidus febricitantibus confert. Scilicet cum febris omnis calida, siccaque sit affectio, & idcirco frigidum postulet, humidumque victum, multò quidem maximè id ipsum fiet in continuis, quas modò ver-  
samus, febribus, quarum non modò summi cum ariditate calores sunt, ve-rùm etiam assidui. Humidus quoquè victus sicco citiùs concoquitur, ùt qui faciliùs liquatur, ac distribuitur. *Tral-lianus*, Auctor *Græcus*, in his febribus victum commendavit, qui pariter, citra omnem excalfactionem, extenu-  
andi (multam enim, crassamque ait hìc esse materiam) nullas inspissandi, sed humectandi quoquè vires obtineat. Ci-bus, inquit *Celsus*, febricitantibus hu-midus est aptissimus, aut humori certè quàm proximus, utique ex materiâ quàm levissimâ, maximèque forbitio: eaque, in magnis febribus, esse debet tenuissima.

Nunc

*Quodnam  
tempus sit  
sumendo  
cibo oppor-  
tunum.*

Nunc, quando cibus dari debeat, proponam. Quæ hora febricitationis mitissima est, quoniam corpus exhibet magis integrum, eâ ali homo debet. Illud certè consilium aptissimum est, cibum quàm maximè semper ab impetu accessionis reducere, & dare corpori, quantùm fieri licet, integerrimo. Itaque in continuâ tertianâ, cum alter dies sit remissior, alter atrocior, rectè cibus remissione datur. Idem in quartanâ facere, duobus diebus mediis, licet, nisi orta imbecillitas, gravioris quoquè accessionis die, cibum desideret. In quotidianâ autem continuâ, ubi febris remisit, alendum est. Quòd si Synochus sit putrida, quæ pari semper impetu afficit, aut paulatim vel increfcit, vel decedit, commodum aliquod diei tempus legendum est. Id *Celsus* esse dixit mediam noctem, finito jam, inquit, gravissimo tempore vespertino, quo ferè pessimi sunt, qui ægrotant, eodemque longissimè distante: secuturis verò horis antelucanis, quibuss



Н

sunt, vel debent, ea certè, non nisi post cibum, atque somnum, experientis esse exponenda.

*Modus cibi sumendi quis esse debeat.*

Porrò, in cibi sumendi modo, quædam etiam quæri possunt. Ac primum, variusne in acutè febricitantibus is esse debeat, an verò simplex. Varietas quidem, ut appetentiam invitat, ita deteriore exhibet concoctionem. Quinetiam plus sumere ægros, quàm par est, facit, ideoque minùs etiam concoquere. Quare nusquam ei locus esse potest, quàm ubi ingens est fastidium, neque satès vires valent. Scilicet, paulùm ex singulis degustando, has æger tuetur. At si neque respuit penitus cibum homo, neque pessimè fert, nullâ epularum diversitate sollicitandus est. Simplex enim materiæ genus magis intra modum sumitur, melioresque succos concoctum adjicit. Illud quoquè de cibandi vicibus, quod ad sumendi alimenti pertinet modum, adjiciam. Ferè quidem, ubi vires sunt, a primo die præcipuè nostra-

nostratibus, semel quotidie dandus ci-  
bus est. Ac bis etiam, si imbecillitas  
timeri coepit. Quod si eò res rediit,  
ut penitus venæ conciderint, visque  
hominis multum infirma sit, eodem sæ-  
pius die parum offerendum, arreptis fe-  
bris temporibus magis pacatis, nimi-  
rum, ut eâ semper horâ minus cibi de-  
tur, quâ, si per corpus liceret, omnino  
nihil daretur.



## C A P. VII.

*Genera quædam, itemque formæ  
Alimentorum, quæ acutè Fe-  
bricitantibus dari possunt.*

**Q**Uoniam fatiis modò supérque de  
generali victu febrium continua-  
rum dictum est, commodum videatur  
in eorum gratiam, qui medendi usum  
quærunt, aliquot ciborum, qui dari fe-  
bricitantibus utiliter solent, formulas,  
H 2                      tanquam



*Ptisana  
hordeacea  
in febribus  
eximia fa-  
cultates.*

tanquam exempla, proponere. In quorum numero Ptisana hordeacea, atque ejus cremor facilè primas tenent, ob eximias facultates morbis conducibiles acutis, quas *Hippocrates* diligenter intuitus litteris mandavit. Ptisana, inquit, frumentaceis eduliis rectè prælata esse videtur, in hisce acutis morbis, eosque qui eam præferunt, laudo. Nam viscositas ipsius levis, continua, jucunda, lubrica, & mediocriter humens, sitim minimè infert; &, si quid ablutione indiget, probè abluit; non astringit; non malè turbat; neque in ventre intumescit, nam inter coquendum, quantum maximè potuit, intumuit. Quæcunque ad acutorum morborum sanationem Ptisanæ insunt bona, nulli, inquit *Galenus*, alteri inesse comperies. Primum enim humectat, atque refrigerat, ac mediocriter absterget, quæ facultates in curatione febrium harum maximè conducunt. Viscida ea, simulque levis, ac continua est, asperitudinis expers, quæ acrium est, & acido-

acidorum, & astringentium. Magni verò est, jucundam Ptisanam, ac gustu pergratam sumentibus esse: quoniam eò faciliùs, & concoquitur, & per corpus distribuitur. Quòd si paulò deteriores cibos, vel potus, suaviores tamen, melioribus quidem, at minùs gratis, ipse prætulit *Hippocrates*, quidni Ptisanam summopere probemus, quæ suprà quàm, quòd salubris est, suavitatis etiam adepta est prærogativam. Jam verò, etsi viscosa esse cernitur, lubrica tamen est, nequaquam vel hærens in itinere, vel obstruens, quod commodum soli Ptisanæ, præ cæteris viscidis, peculiare est. Id autem vis ejus abstergens facit, quæ facilem ubique transitum præstat, & primas venas infartu liberat excrementorum. Quæ facultas nostris est apprimè utilis hominibus, ceu aliquo ferè semper cruditatis, vel obstructionis vitio, in primâ regione corporis, affectis. Atque, hâc de causâ, si quid ablui in ventre debet, probè Ptisana abluit, nullamque fortita

astriktionem, quæ febrientibus (nisi propter effusæ symptoma vacuationis periculum incumbat) inimicissima est. Ad hæc, humectationem quidem habet, at moderatam, quâ sitim arcet, quæque humiditas stomachum, si per multa esset, subverteret, quali certè vitio Ptisana caret. Itaque ne turbare quidem, vel intumescere, dum in ventre concoquitur, potest. Longiore enim supra ignem decoctione, quantum maximè potuit, intumuit.

*Ptisana  
prepara-  
tio.*

Ptisana sic a multis paratur: Sumunt hordei selectissimi, extimo exuti cortice, quantum videtur satîs. Id tantisper cum aquâ coquunt, donec jus pulticulæ tenuis repræsentet speciem. Post hæc in pilâ tundunt, & tenui incerniculo percolant, additoque zaccharo, hordeaceam componunt, exhibentque Ptilanam. *Galenus* hordeum in aquâ, dum coquitur, quàm plurimum dicit intumescere debere, posteaque lento igne per multum otium in lentorem redigi.

Ptisana



Ptisana autem colata, quam etiam *Ptisana*  
*cremor.* Ptisanae cremorem vocant, fit, cum tan-  
tis per hordeum coquitur, donec hujus  
flavescentem quendam accipiat colo-  
rem aqua, hinc ab igne tollitur deco-  
ctum, & interpositâ aliquantâ morâ,  
percolatur, inditoque zaccharo, fit for-  
bitio Ptisanae colatae, ægrisque, cum o-  
pus est, datur.

Hordeacea Ptisana impensius alit,  
quàm ejus cremor; quare hîc magis  
vicem medicamenti, illa magis nutri-  
menti gerit. Refrigerantiores reddere  
licet, additis melonum, cucumeris, cu-  
curbitæ, ac citruli seminibus.

Cæterum haud rarò, propter virium *Firmiora*  
imbecillitatem, ad plenioris, quàm hæc *quadam,*  
ipsa sunt, materiae alimenta transeun- *in virium*  
dum est, in septentrionalibus utique *imbecilli-*  
populis, qui voracitati, crassæque ma- *tate, ali-*  
teria cibus insueverunt. Ergo etiam *mentorum*  
carnes interdum sunt concedendæ, sed *genera.*  
volatilium, non item quadrupedum, ni-  
si ad hoedum, & ad vitulum pervenire  
necesse sit. Inter aves acutè febrici-

H 4

tantibus

tantibus aptas, firmissimæ materiæ sunt capi, hinc gallinæ, mox phasiani, post perdices. Singulæque aves sui sequuntur ordine substantiæque conditione pulli. Perdicum autem pullis succedunt, aviculæ montanæ, atque campestræ, quæ in arboribus, non in aquis degunt, quæque colli, ac rostri sunt, quàm minimè longi. Cocta hæc genera alimentorum cum succo apparantur, fumunturque mali punici, aurantii, citrii, limonii, & hujusmodi. Frequentiùs, ac rectiùs ex his coctis, & suo cum jure contusis ac percolatis nutritoriæ fiunt sorbitiones, hoc modo. Decoquitur pullus gallinaceus, vel capus tantisper ex aquâ, donec muscoli discedant ab ossibus. Tum capus, pullusve tunditur, huicque affunditur sæpius paulatim decocti jusculum, pinguedine remotâ, ac sic per incerniculum manibus, aut cochleari, musculos conterendo, fit percolatio, atque tum, adjecto zaccharo, aquæque rosaceæ momento, componitur sorbitio, vel,  
ut

ut vulgò dicunt, contusum tenuis consistentiæ, vel, crassioris, prout lubitum erit, certam decocti juris partem, dum terendo fit percolatio, affundere. Porro sæpe haud incommodè hujusmodi sorbiunculam, additis quibusdam rebus, alterantem, ac medicinalem reddimus. Id fit, vel unà coctis primis siccis, itemque feminibus frigidis majoribus, ad hæc lactucâ, cichorio, endiniâ, buglossò, hordeo, & hujusmodi. Vel cum post concoctionem, atque percolationem ipsi contuso quidam adduntur refrigerantes succi, ut limoniorum, auran-  
tiorum, citriorum, ipsa item aqua ro-  
facea, vel cardui, uti vocant, benedi-  
dicti. Hujusmodi certè cibandi genus  
continuis in febribus semper efficacissi-  
mum fenssi, cum ad hominis susten-  
tandas vires, tum ad ardores mitigan-  
dos.

Cum tanta est inappetentia, ut nihil  
horum admittat æger, concreti ex de-  
cocto jure carniū commemoratarum  
liquores fiunt, additis fantalis, coral-  
liis,



liis, pauculoque vino aquoso, & aquâ rosaceâ, & zaccharo, & cinnamomi momento. Grati hi succi palato, cum fumuntur, liquefcunt, & sic in ventriculum facilè, multâque descendunt jucunditate.

Inter firmioris materiæ alimenta panis bis terve in aquâ lotus, & cum jure pulli, vel capi mistus acutè febricitantibus datur. Sæpe apud nos cum tenui cervisiâ tritus, panis leniter decoquitur, fitque sorbiuncula, addito zaccharo, ac pauculo butyro.

Alia fit nutritoria sorbitio, ex fontis, & succi uvarum immaturarum partibus æqualibus, quibus ovi luteum commiscetur, hinc simul coquuntur, inditoque zaccharo, ægris & sorbendum dantur.

Amygdalatum, atque hordeatum, uti vocant, sæpe locum in his febribus habent, maximèque sub noctem, somni quoque causâ conciliandi, qui si minùs commodè venit, semina etiam adduntur lactucæ, melonum, cucumeris,

cucur-

cucurbitæ, & albi, cum ita necesse est, papaveris. Tum quoquè coenæ vicem lactuca cocta, sumtâque cum aceto, ac butyro, gerit.

Marcipanes omnes ex contusis volatiliū facti carnibus, atque amygdalis, fugiendi sunt. Nam & nimis crassæ præbent materiæ alimentum, & difficilem admittunt concoctionem.



## C A P. VIII.

*De Potionibus acutè Febricitantium.*

**Æ**QUE magna potionum, per febres continuas, atque ciborum, habenda cura est. Nam hos ferè ægri averſantur, ac inviti ſumunt, illas toto expetunt animo. Quæ fanè cauſa eſt, cur liberalior in his, quàm in illis concedendis, Medicus eſſe debeat. Quod eò magis fieri poteſt, quòd ex ſum-

*Ægrisma-  
gis indul-  
gendum  
eſt in po-  
tionibus,  
quàm in  
cibis.*

to cibo semper aliquid ad calores, & ad morbi accedat materiam: ideoque cibum morbus omnis, sui ratione, numquam non recusat. Ex potione autem refrigerante, mitefcit ardor febrilis, corrigitur siccitas, materiæque ebullientia refrænatur impetus. Ergo etiam supra hæc commoda, sicuti sani molestius sitim, quàm famem ferunt, ita multò difficiliùs ægri, maximèque acutè febricitantes, quibus cum morbo perit appetentia, crescit sitis: ideoque plùs in potione indulgeri, quàm in cibo potest. Quinetiam faciliùs cibis concoquantur pocula, celerius reficiunt, ac minùs naturam infirmam gravant. Verùm modus adhiberi aliquis debet, ne nimio humore, qui febricitantibus est alienus, eoque præfrigido, cruditas morbi in spatium trahatur, minor materia accedat alteratio, separatióque, quam hìc impropriè concoctionem appellamus. Cæterùm primo acutæ febris die nullus humor rectè datur, nisi protinus ita viribus imbecillus homo sit, ut ei-

bus



bus quoque debeat dari. Posterioribus temporibus, cum incendia, sitis, atque ariditates invalescunt, ipsaque virium crescit imbecillitas, plus dare, quod bibatur, licet. Quâ in re falli multos etiam peritos Medicos constat, qui ægro propter ardentissimam acutæ febris exusto flammam, liquorem, quantumvis avidissimè petenti, ac per omnia sacra postulanti denegant. Itaque fit, ut eliquesçens nativus humor dejectionibus, urinisque ubertim efferatur, & arefactis solidis, simulque, superato naturæ calore, homo pereat. Ego verò his ipsis sic affectis frigidissimam potionem dare soleo, utique si materiæ multa accessit concoctio; eâque re, tùm siccum ardorem tempero, naturamque reficio, tùm materiam morbi, si parata excretioni est, sudationibus, alvo, aut vomitu excutio. Neque verò hîc observandum, quod in febrium intermittentium accessione est; quâ immorante, quantum fieri potest, præcidendus est omnis humor, abstinendique etiam ægri

gri sunt, quanquam vehementer sitiant, ac monendi, ubi febris quieverit, sitim quoquē quieturam, longioremque ex potione fore accessionem; ita celerius, ut ille ait, desinere sitire cum, qui non bibit. Extenuatione enim opus est multâ, ut quod, a materiâ antecedente febrium intermittantium admodum impactâ putrefactum, discedere debet, discedat, excludaturque, quam extenuationem multus humor remoratur. In continuis verò febribus, materia in venis continenter manens, gravi incendio, atque assiduo corpus urit, quod nisi, opportunis temporibus, refrigerio poculorum reficitur, periculo sit obnoxium. Ut hoc apprimè verum sit, in intermittentibus febribus, magis causam, hoc est, materiam peccantem spectari oportere; in continuis, magis morbum, calorem scilicet febrilem; in utrisque, neutrum esse negligendum.

*Quanam  
potiones,  
et quando  
febricitan-  
tibus da-  
ri debe-  
ant.*


Porro, quod ad opportunitatem dandæ attinet potionis, scire licet, ea huic idonea esse tempora, quæ cibo sunt, si

sine

sine hoc illa interdum dari debet. Sub  
somnia humor apprimè est conducibi-  
lis. Quietem enim sitis interpellat.  
Potiones acutè febricitantium hæ ferme  
sunt omnes: Decoctum jus hordei, a-  
qua cum zaccharo cocta, ac refrigera-  
ta. Zulapium violaceum, tenuissima  
cervisia, crudus fons. Eo fonte, non  
nisi post concoctionem, & magnâ se-  
mel copiâ, uti licet, veluti suo loco  
post docebitur. Aliis, quovis morbi  
tempore, est locus. Quæcunque pocu-  
la mellita sunt, quia calefaciunt, ac  
promptè bilescunt, inimica sunt. Vi-  
num, quoniam calet, semper est fugi-  
endum, nisi cum præcipua virium est  
imbecillitas, consentiente consuetudine,  
simulque admodum appetente homine,  
indulgeatur, idque paucum, dilutum,  
ac minimè potens. Idem semper tole-  
rabilius, sed & interdum necessarium  
in declinatione est. Hactenus in ge-  
nere dixi, quæ edulia, poculâque his  
febribus conducant; posthac, quæ cui-  
que



que morbi tempori victûs ratio sit utilis, proponam.



## C A P. IX.

*Quæ Victûs ratio Principio Febris acutæ conveniens sit.*

*In principio febris, tenuissimè alendus est ager.*

**I**Mbecillæ vires alimentum solæ considerant : morbus, copia humorum, cruditas, symptomata, respuunt. Ea res superioribus locis satîs demonstrata est. Itaque principio febrium continuarum alienus esse cibus videtur, partim, quia corporis ferè adest quædam repletio, quæ detractionem, non adjectionem postulat ; partim, quia febris materia est cruda, in quam satius est naturam agere, quàm in oblatum cibum. Quin etiam eadem natura, isthoc ipso tempore, minùs affligitur, tum, quia a morbo nondum vehementer pulsatur, tum, quia haud plurimùm

ab

ab eo abest robore, quod secundam valetudinem nuperrimè tutabatur: quare non admodum etiam cibo opus habet. Id profectò sensisse *Celsum* existimo, cum initia scriberet morborum famem sitimque desiderare. Ergo etiam, si primâ septimanâ resolutum iri morbum verisimile est, nec vires desunt, primis diebus duobus, continentissimè æger habendus est, oblatis poculis, aut certè tenuissimâ sorbitione Ptisanæ colatæ, aut pulli jusculo. Quòd si ad undecimum diem febris durabit, primis diebus itidem duobus, parcendum quoque utcumque cibo, ac dein ad prætenue pulli contusum, Ptisanamque hordeaceam, quàm minimæ participem crassitudinis. Vel si decimus quartus dies excipiet febris finem, ad pulli mediocri contusum, totamque Ptisanam consistentiæ mediocris paulatim est transeundum; semperque, si supra hæc tempora, febricitare homo perget, eâdem ciborum, atque durationis morbi proportionem utendum. Id sic expref-

I. fit

fit *Hippocrates*. Quibus vigor statim est futurus, tenuiter statim habere oportet; quibus autem posterius, & ipso tempore vigoris, & paulò sub ipsum cibum adimendus, antea verò plenius alendum, ut ægrotus perferre queat. Neque autem (quod fortè quis existimet) nobis refragatur, tenuissimum victum initio febris imperantibus, *Hippocrates*, qui per principia plenius esse alendum præcepit. Nam latè is Auctor principium accipiens, sub ipso habet, includitque incremento. Scilicet nulla, eo in *Aphorismo*, incrementis ægritudinis facta est mentio, sed principium contra statum distinguitur. Id aliàs sæpe usui venit *Hippocrati*, ut secundo libro *Aphorismorum*: Incipientibus, inquit, morbis, si quid movendum videtur, move; vigentibus autem quiescere multò præstat. Et post, Circa initia, & finem morborum remissiora sunt omnia, in vigore, vehementiora. *Galenus* quoque ad *Glaucanem*: In febribus, inquit, continuis, quibus

vigor



vigor septimum non excedet diem, viribus firmis, neque ætate repugnante, exquisitus omnino, ac tenuis victus institutuendus est. In quibus autem febribus, *septimum* diem status superabit, aut homo imbecillus est, per initia, inquit, liberaliùs, sub ipsum statum parciùs, in ipso tenuissimè alere necesse est. Ipse etiam *Avicennas*, si carere reprehensione volet, omnino sic accipere principium febris debuit, quum ita loquitur : Dignius liberalioris victus tempus est, quo vires non admodum occupantur in materiâ : estque id morbi principium. Et, dignius tenuissimi victus tempus, est status : hinc enim, in evincendâ materiâ quàm maximè natura occupatur. Ergo id modò perpetuum præceptum esto : ut in incremento liberaliùs, ita semper in principio contractiùs alendum esse. Quin etiam vel inedia semper convenire principio videatur, plenitudinis intuitu, ac virium non imbecillum, ni faceret nimis repentina victus in incre-

mento permutatio, cui incremento liberior diætâ conducit, ut sic firmatæ vires vigorem, qui abſtinentiam exigit, ſuſtineant. Jam autem, incipiente morbo, famem paſſus homo, ne increſcente, noxam liberalioris menſæ, ſubitò arreptæ, incurrat, tum ne ſi hanc noxam effugere ſtudens, increſcentéque morbo tenuiter victitare incipiens, intempeſtivè circa ſtatum propter defectas vires, principio quidem febris nequaquam, incremento autem, juſto tenuiùs altas, cibari cogatur: præſtiterit utique protinus, incipiente morbo, contractiùs alere incipere, victumque paulatim ad incrementum pleniorẽ facere; hinc verò rurfus, quò magis ad ſtatum acceditur, minuere, ipſoque in ſtatu, & paulò ante eum penitus ſubtrahere. Scire autem licet, haud ſemper, a primo ſtatim die, cibandum tenuiter ægrotum eſſe, ſed prout febres ſunt, atque corpora, adminiſtrari, ac variare ea res debet. Quæ febris plus virium aufert, in eâ celeriùs cibus dandus eſt,

item-

itemque in eo cœlo, quod magis corpora resolvit. Maturiùs etiam puero, quàm juveni: æstate, quàm hieme: in summâ, citiùs imbecillo corpori, quàm solido, firmoque dari debet. Atque hic finis, modusque esto de victu dicendi, qui primùm in genere febrium acutarum, ac dein, qui in earum principio locum habet: proximumque adeò nunc est, de concoctione dicere materiæ, quæ febrem facit.



## CAP. X.

*Quomodo Materia Februm Continuarum concoquenda sit.*

**D**Uplex est concoctionis apud Medicos acceptio. Prima eorum est, quæ facultate partium solidarum, atque caloris naturalis alterantur, & in idoneum vertuntur corporis alimentum. Eam concoctionem solus admittet sanguis,

*Concoctionis significationes  
diversæ: de quâ hic  
agitur.*



guis, qui nos alit, & quicquid aptum est, ut in sanguinem verti possit. Alterum concoctionis genus, quod improprium est, atque universalius, in humoribus versatur præter naturam affectis, ac morbosis, quum hi caloris innati viribus ita alterantur, vincunturque, ut (maligni cum sint, neque ullo modo salutare fieri queant) mox a benignis separentur, ac vacationi reddantur opportuni. Estque profectò ea concoctio nihil aliud, quàm materiæ febrilis præparatoria ad commodam purgationem alteratio; scilicet, cum natura, uti *Galenus* dicit, causis morborum fortior facta fuerit, eviceritque eas suo robore. Itaque ab eâ quoquè concoctione, quodammodo ad primum genus referendâ, differt, quæ in materiâ fit haud prorsus inutili, sed in vitiosâ, ac semicorruptâ, quæ postquam commodè fuerit correctâ, intus manet, estque corpori, multâ sui parte, non inutilis. Quamquam in eo hæc a primo concoctionis dissidet genere, quòd non in benigno

nigro penitus humore fiat, naturæque familiari, ac pergrato; dein quòd nulla hìc, aut saltem modica fiat substantiæ immutatio. Est enim interdum incipiens quædam corruptio, atque mutatio humorum haud insignis, quæ correctionem accipit, ac pristinæ naturæ benignitatem. Quod etiam *Galenus* vini exemplo declarat. Id enim si subacidum redditum est, redire ad naturam potest, sin prorsus acetum sit, non potest. In hâc verò concoctione, *Galenus* temperamentum fieri debere humorum, quod ἐπίμεσσις vocatur, præcipit, oblato uberiore alimento, sic ut nova materia misceatur corruptæ. Cibus contrà averfatur is humor, qui penitus est corruptus (nam impura corpora quantò magis ales, tantò magis lædes) ac præparari ad commodam purificationem debet: estque ea, quàm secundo loco proposuimus, concoctio.

Præparatoriam autem alterationem istam in humore crasso, vel tenaci apud omnes in confesso est incidendo,

*De modo  
conco-  
quendæ bi-  
lis diversæ  
opinionēs.*

atque abstergendo perfici. At in bile flavâ major dubitatio, majorque curantium dissensio est. Alii hanc extenuantibus, iisdemque acribus incidendum censent, serapiumque exhibent acetosum compositum, *Galenum*, uti videtur, secuti: qui primo libro *Aphorismorum*, origano, tragorigano, atque hyssopo aquæ mulsæ incoctis, priusquam materiam acutorum purget morborum, utitur. Sunt qui contrariam sequantur viam, incrassandam esse bilem professi, quôque minùs diffluet, inductâ spissitudine, cogendam. Quidam neutrum accipiunt istorum, ac bilem, utpote per se tenuem, ita uti est, sine ullâ præparatione, purgationibus opportunam esse contendunt. Adeò variè, hucusque de re tanti momenti inter eruditos, incerto ægrotantium discrimine, certatur.

*Authoris  
in hac re  
sententia.*

Quid verò ego hîc sentiam, proponam; ac post opiniones aliorum refellam. Quoniam cujusque humoris morbose concoctio, uti proposui, nihil aliud



liud est, quàm quædam præparatio ad commodam, atque tutam purgationem, latè atque universaliùs accepto concoctionis significato, videndum utique est, quidnam id sit, quod, in quâque materiâ, hanc vacuationem vel remoretur, vel faciat periculosam. Id verò tollere studere, concoctionem juvare, atque promovere est. In melancholico itaque humore, crassities, in pituitoso lentor, in bilioso neutrum admodum horum, sed quidam ardoris fervor, dum febris ex eo est assidua, faciunt, quò hìc minùs tutò, illic minùs commodè purgatio instituatur. Ergo crassum humorem extenuare, lentum tergere, utrumque incidere, ne tentati medicamentis impingant, minimeque sequantur, oportet; ipsius autem biliosi humoris incendium atque furorem refrigerio temperare, ne si sine hoc purgetur, internis visceribus exitialem noxam inferat. Ad hunc modum præparatis humoribus natura faciliùs dominatur, alterando eos, & vincendo, & sepa-

separando, & ad utilem instituendo inanitionem. Cum itaque per febres tertianas continuas, adeoque per arduas flava bilis in grandioribus venis, ac cordi propinquis computrescit, magnisque perurit ardoribus, nemo profecto hanc ita flammeam unquam tutò movit, quin periculum proclive attulerit nascituræ in viscere præcipuo inflammationis, aut torminum (quæ *Græci* δυσεντερίας vocant) aut insanix. Scilicet concitatur humor immaturus, minimèque totus sequitur, quoniam nec dum separatus, aptatusque ad vacuationem est. Siquidem incendio atque fervoris impetu etiamnum indomitus, ac naturæ rebellis est. Hujusmodi permotus incommodis *Hippocrates*, simulque purgantium calore medicamentorum in morbis dixit acutis (quorum ferè materiam flava exhibet bilis) & in principiis raro purgare licere. Ergo etiam nos rectissime prius biliosum humorem quàm ducimus, ita quibusdam frigidis materiis temperamus, ut, qui primùm calore

lore fervens corpus turbabat, refrigerio mitescens, ac velut edomitus, naturæ manus det, ut sic tutò, sine febris incremento, sine metu inflammationis, expurgetur. Sed ne commodum subinde amittamus extenuationis, quæ certè, cum ad faciliorem purgationem, tum ad meatuum, quibus humor ducetur, apertionem est utilis, rectè eas adhibemus materias, quæ simul refrigerent, simul extenuationem, levemque præstent absterfionem astrictione carentem. Id quod ab ipso quoque præceptum video *Avicennâ*. Cum in his, inquit, febribus refrigeras, ne id per eas res agas, in quibus astrictio inest, atque siccitas, unde prohiberi materiæ resolutionem contingit. Utiliter itaque nobis sumuntur radices boraginis, buglossi, cichorii, endiviæ, itemque hordeum, ac semina refrigerantia, quæ dicunt majora & minora: quæ omnia, pro partium varietate, non unis prædita viribus, cum refrigeratione abstergunt, modicèque attenuant. Incoquuntur



tur hæc aquæ, póstque decocti jusculli adduntur ferapia, ex endivia, ex cichorio, e succo citreorum, vel limoniõrum ipsumque ante omnia ferapium acetosum: ex quibus conficiuntur quæ vocant *Græci ἀποζέματα*, id est, decoctæ ægrisque *bis* per diem bibenda dantur. Miscentur etiam utiliter cum ferapiis loco decoctorum, stillatitii ex iisdem simplicibus liquores, fiuntque, uti vocant, Zulapia. Verùm meminisse convenit, decoctis plùs inesse facultatis præsertim abstergentis, distillatis autem aquis unicam obtrigisse refrigerandi vim abstergendi nullam, aut certè perexiguam. Ex his, quæ comprehensa sunt omnibus pocula fiunt limpida, quæ promptè in venas proficiscuntur, ex æstuantemque ibi bilem refrigerio temperant, & ne quid ea nimii crassamenti (quod & ad separationem sui, & ad purgationem inutile est) vel horum usum frigidorum, vel suâ ipsius tostione contrahat, extenuatione, tersionéque præcaveant.

Quò magis ab *Arabe* deficio *Avi-* Refellitur  
Avicen-  
nas, qui  
Aqua frigidâ bilem  
concoqui  
vult.  
*cennâ*, qui crudum fontem sufficere ad-  
bilem concoquendam censet, quique  
parum intelligit, refrigerare quidem a-  
quam posse, extenuare autem humo-  
rem, aut meatus, quibus is effertur,  
tergere, ac patefacere non posse. Quin  
etiam hæret ea ipsa diu in ventriculo,  
ut affirmat *Hippocrates*, neque urinas,  
neque difflationem, quæ per cutim fit,  
promovet; ad hæc in calidis corpori-  
bus bilefcit, ac sitim movet. Sed & ip-  
se sese contradictione confundit *Avi-*  
*cennas*, qui aliàs rectiùs dixit, metum  
esse in aquâ frigidâ, ne inferat obstru-  
ctionem meatuum. Neque verò nobis  
refragatur *Galenus*, cum duo esse ait  
continuæ febris præcipua remedia: San-  
guinis missionem, & frigidæ poculum.  
Eo enim loco frigidam is auctor impe-  
rat, sub ipsam morbi judicationem, con-  
coctâ jam tum febris materiâ: eamque  
vult non nisi semel magnis haustibus  
esse bibendam: unde mox pulso foras  
calore febrili, effusissimus insequitur su-  
dor,

dor, vomitióve, vel alvi fluxio biliofa  
ipséque his intervenientibus protinus  
resolvitur morbus. At verò *Avicenna*  
*nas* toto morbi decursu crudum præ  
scribit fontem, non causâ promovenda  
judicationis, sed materiam febris com  
coquendi; id quod magno fieri error  
demonstratum est.

*Refellun-  
tur alii,  
qui idem  
calidis  
materiis  
moliun-  
tur.*

Nunc iis respondendum, qui contra  
riam viam secuti, hyssopo, origano  
similibusque rebus concoquere bilem  
student. Hi autem ideo falluntur, quòd  
humorem & naturâ, & putrefactionem  
calidum, materiis calidis extorreat  
quémque fructum, extenuatâ affectam  
bile, eum, nimis eâ exardescente, con  
rumpant. Itaque hinc febres ingra  
vescunt, vigiliæque, & dolores, & sic  
citates, & inquietudines, cæteraque  
symptomata comitantur graviora, ex  
quibus & ipsa quoquè ægroti vis con  
sumitur, principiâque maximorum dan  
tur periculorum. Nec dubium esse vi  
detur, multos ita curatos, vel contr  
cto marcere, vel, gravi ortâ infan

fui



fuisse periclitatos. Cùm verò mulsâ, cui incoctum sit hyssopum, *Galenus* priùs utitur, quàm bilem purget, non tam humoris id causâ facit, quàm me-  
atuum, quibus is ipse educetur, ob-  
structorum.

Paulò similior veri, non tamen re-  
cta eorum est sententia, qui bili, quò  
commodiùs purgetur, crassamentum  
adjiciunt. Hos certè sputi per tuf-  
sim expectoratio in errorem conje-  
cit. Scilicet hìc, si nimiùm est te-  
nuis humor, spiritu elidi, quia diffluit,  
non potest; quare ut gravem tussim,  
ita & penitus siccam facit. Rectâque  
curatio est, humorem frigidis lentisque  
delinctibus ita inspissasse, ut ab aëre,  
extra pectus erumpente, intercipi, com-  
modèque efferri possit. Id adeò ex-  
emplum, ut in sputo respondet excre-  
ando, ita venarum purgandis humori-  
bus accommodari nullo modo potest.  
Neque enim aëre hi incitati a naturâ  
vacuantur, sed occultâ medicamanti  
tractrice

*Itemque  
alii, qui  
bilem ut  
purgetur  
incrassant.*

tractrice potentiâ; eâque in re tantò  
quidque facilius sequi par est, quantò  
tenuius, & ad sequelam magis oppor-  
tunum est. Quòd autem tenuia com-  
modiùs, atque faciliùs attrahantur cras-  
sis, non solùm quotidiana rerum docet  
experientia, sed ex ipsis etiam colligi-  
tur medicamentis: quæ mitiora esse  
debent, cum bilis purganda est; effræ-  
natoria, cum pituita, vel bilis atra. Ex  
quibus licet colligere omnibus, frustra  
bilis concoctionem usu inspissantium  
quæri.

*lique de-  
mum, qui  
ad bilem  
purgan-  
dam nullâ  
opus esse  
concoctio-  
ne dicunt.*

Superfunt modò hi, qui nullâ opus  
esse concoctione hâc universall  
sumptâ, ad purgandum bilem contem-  
dunt, utpote naturâ suâ, novæque pur-  
tredinis ardore fluxibilem. Illi fanè *bil-*  
aberrare videntur; primùm, quod hu-  
morem incendio fervidissimum furere  
finunt, nullo frigidorum usu temperan-  
tes; dein, quod extenuationem humoris  
contemnant, quam semper utilem esse  
professus sum ad commodiorem purga-  
tionem

tionem. Atque hic finis esto eorum auxiliorum, quæ principio febris accommodantur. Adeóque tempestivum est, ad ipsum progredi incrementum, quæque fieri in eo debent singula, proponere.



K

D E





DE CURANDIS

FEBRIBUS CONTINUIS,

SECTIO SECUNDA,

*Quæ earum continet Incrementum.*

CAP. I.

*De Materiæ Purgatione.*

Oncocta febris acutæ materia,  
 nisi si sponte naturæ abunde  
 pellitur, purgari debet. Ve-  
 rùm, quâ id fieri moderatio-  
 ne, aut quibus temporibus debeat, non  
 fat bene inter Professores Artis conve-  
 nit.

nit. Scribit *Hippocrates* purgantium medicamentorum potiones, in morbis acutis, raras esse oportere. Quò magis falluntur, qui in his febribus, penitus (ut si quid aliud) acutis, vix unum intermittunt diem, quo non ægrum medicamentis, vel per os sumptis, vel alvo injectis, sollicitent; quæ res, ut hodie inter triviales illos, naturæ motuum ignaros, est usitatissima, ita maxima secum pericula trahit. Siquidem vires exhaurit, corpus assiduis afflictum ardoribus labefactat, materiam morbi neque concoctam, neque separatam lacerat, ejusque maturationem (quæ certè quiete gaudet) impedit, omne denique naturæ institutum, in propulsando morbo, subvertit. Atque hinc sequuntur, cruditates, dolores, sitis, inquietudines, vigiliæ, deliria, distentiones nervorum, singultus, similiæque periculorum plena symptomata. Per febres, inquit *Celsus*, medicamentorum dari potiones, & alvus duci, non nisi rarò, debent. Et id non ideo tamen agendum,

*Notantur  
isti, qui  
multâ  
purgatione  
in febribus  
utuntur.*

dum, ut ægri vires convellantur, existimat: quoniam ex imbecillitate summum periculum est. Quare meriti sunt incusandi, qui hîc ita licenter in temperatis vacuationibus in salutem ægrotantium grassantur. Scilicet in eâ febre, quæ nono die desitura esset, *secundo die, ventrem cassiâ, fortè etiam concitatiùs, movisse, eoque vix dum quiescente, sanguinis libram, aut etiam amplius misisse, tertio, injecisse clysterem, quarto, perpurgâsse, quinto vel sexto, crescente febricitatione iterum secuisse venam, octavo, rursum purgâsse, quid hercle aliud est, quàm hominem per assiduos acutæ febris ignes fatiscentem perdere. Nihil mirum haud rarò usu venit, ut post hanc excarnificandi libidinem, victi naturæ viribus morbus dominetur, oriturque continuato delirio, & post hoc sopore, simulque difficillimo spiritu hominem, ante diem *decimum quartum*, tollat.*



Æquè etiam turpiter a multis, in Notantur alii, qui in purgandi tempore, delinquitur. Alii purgationis tempore delin- enim præparationem bilis omnem reji- quant. ciunt, primis temporibus purgantes.

Alii autem, qui nimirum concoctiones curant, & cruditatem maximè horrent, ipsum arripiunt morbi statum, paucissimi declinationem expectant. Omnes profectò in errore versantur. Primi enim præter naturæ faciunt institutum, quæ nunquam rectè humores (cum quidem non turgent) nisi concoxerit, pellit. Id quod studiosè ab *Hippocrate* video fuisse observatum, qui concocta duci medicamentis, non cruda oportere scripsit. Quoniam autem cruditas principia definit morborum, constat profectò nunquam sub his tutò dari medicamentum posse. Nec refragatur *Aphorismus*, qui sic habet: Per principia morborum, si quid movendum videtur, move. Nempe, latè hìc accepto principio, ipsum etiam includitur incrementum. Id adeò apparet ex eo, quòd a principio protinus sta-

tum proponat : In statu, inquit, qui  
 etem habere præstat. Propiores verò  
 sunt, qui per vigorem continuæ febris  
 purgant, absolutis nimirum jam tum  
 concoctionibus. Cæterum in eo fallun-  
 tur, quòd parum curent symptomata  
 quæ eo sunt tempore gravissima, quæ  
 que quietem, Auctore *Hippocrate*, pos-  
 stulant, nullumque medicamenti insigni-  
 norem motum ferunt. Prorsus inepti-  
 tiunt, qui priùs declinationem febris  
 universalem, quàm purgent, expectant.  
 Nam gravem morbum in vitam homi-  
 nis, necessario suspenso præsidio, sævi-  
 re permittunt, eoque tempore medici-  
 nam adhibent, quod, si verum habeat  
 morbi decrementum, semper, ut testatur  
*Galenus*, periculo caret, quòdque  
 corpus materiâ morbi tantum non omni-  
 exoneratum exhibet.

*De idoneo  
 purgandi  
 tempore in  
 diversis fe-  
 bribus.*

Verum, ut hanc rem expediam omni-  
 nem, dicam id, quod in totum sentio  
 de purgandi temporibus, quòdque a ne-  
 mine (utì equidem puto) sat plenè an-  
 notatum fuit, multorumque ingenia a-

cerrimè

cerimis altercationibus inutiliter fatigavit. Per febres omnes natura corruptum humorem spatio superare, atque concoquere indefinenter nititur, in idque opus calorem expedit naturalem, qui in materiam incumbens, alterat eam, subigit, sequestrat, & excretioni opportunam facit. Ea excretio non antè incidit, quàm illud operis prioris sit penitus absolutum, quod concoctionis nomine comprehendimus. Id verò tempus, quo ea fit excretio, status ægritudinis appellatur. Jam autem, si Medicus naturæ, ut ille ait, minister est, ejusque per omnia insistere vestigiis (modò commodis ea ductibus moveat) debet, videtur profectò, non nisi vigentibus morbis, tutò purgare licere. Estque illud reverà præceptum stabile, atque inconcussum, nisi aliud quid incidat, quod, causâ securitatis, mutare hanc purgandi legem universalem cogat, ut in febribus contingit (quas modò versamus) continuis, per quarum statum, impetus symptomatum



purgandi locum tollit. De hisce nempe febribus acutis suum istum *Hippocrates Aphorismum* expressit. Per principia morborum, si quid movendum videtur, move: vigentibus autem quiescere multò præstat. Febribus intermittentibus ad vigorem jam provectis suum, tutò licet, quo die intermissio est, concoctum humorem medicamento tollere, naturâ jam tum nullis impeditâ symptomatis. In his etenim febribus, quia certus circuitus, & finis integer, & liberaliter quietata intervalla sunt, perpetuum esse præceptum temporis potest. At in continuarum statu, vigiliæ, deliria, ardores, sitis, inquietudines faciunt, quò minùs liceat his ærumnis afflictam, ac pæne succumbentem naturam medicationum irritamenti laceßere. Ergo fugere ista tempora, atque purgatione antevertere convenit, & in ipsius incrementi provectiore parte medicamentum dare. Id enim tum neque materia morbi dehortatur, quæ plurimâ parte maturuit, neque

que symptomata impediunt, quæ nondum sunt maxima. Scilicet quæ juxta jecur, eique assistentes venas biliosa, utcumque extenuata, coctaque sunt, ductâ alvo subtrahuntur, reliquis intra remotiora contentis vasa, ac fortè nondum prorsus coctis, ipsi relictis naturæ, per proximam semel vacuandis judicationem. Commodèque *Celsus* dixit, minui tantùm materiam superantem oportere, quæ naturaliter digeritur, ubi nihil novi accedit. Id quoquè sapuisse *Avicennas* videtur, cum sic scribit: Scito minùs noxæ fore, cum residuum materiæ, quam necesse est evacuare, dimittitur, quàm cum exquisitissimè vacuatur, eoque pervenitur, ut vires periclitentur. Nam sæpissime natura hoc resolvit residuum.

Ergo etiam (me judice) ante omnia mite esse decet, quod per acutas febres datur, medicamentum, ut sunt myrobalana, & rhabarbarum, &, inter composita, electarium ex prunis solutivum, itemque e succo rosarum, & e psyllio, ejusque

*Mitia purgantium medicamentorum genera febribus conveniunt.*

ejusque generis aliis, quæ cum fero lactis, vel oxyphoenici decocto miscentur, additâque cassiâ, vel mannâ, vel electario lenitivo, tum etiam fero pio ex multis confecto rosæ macerationibus, ad formam mista potionis dantur. Rhabarbarum autem, itemque myrobalana rectius macerantur, quàm trita sumuntur. Sunt autem causæ, uti videtur, duæ, cur non liceat, acutâ in feбри, effrænatoribus medicamentis uti: primùm, quòd hæc ista caleant, vel certè calorem corpore vehementer permoto excitent, ac, consumptis vitæ spiritibus, vires supra modum extenuent: secundò, quòd morbi incremento (in quo certè per has febres purgandum esse præcepi) ea sint inidonea medicamenta, quæ materiam morbi ex toto corpore radicitus extrahunt. Semicruda etenim ea ductum medicamenti non sine summâ sequitur naturæ molestiâ, ac febrilium ardorum incremento. Quinetiam violentiore medicinâ interrumpitur materiæ instituta concoctio,

con-



confusis, qui jam vinci, atque separari a benigno sanguine cœperant, humoribus. Id, puto, cogitavit *Avicennas*, cum scriberet evacuationem maturitati officere, misceréque cum benigno malignum, quoniam hoc ipsum concoctionis cassum moveretur. Adeò verò apparet, non nisi lenibus medicamentis in hoc morbo locum esse posse, quorum vi non omne perpurgetur corpus, sed prima ejus regio, itemque secundæ ea pars, quæ jecoris convexa, venamque Cavam, atque illi comitem arteriam majorem continet, biliosâ colluvie exoneretur; idque non nisi in ipso fieri debere postremo incremento, cum tolerabilia utcunque sunt symptomata, & quæ lædere videtur, materia, tantùm non omni parte, concocta.

Atque hæc quidem purgandi tempora certa sunt, nisi materia protinus turgere cœperit, id est, effervesce, ac de loco in locum mobilis rapi. Tum enim quàm primùm humor, quamvis nondum coctus, Auctore *Hippocrate*, auferri

*Ubi effervescit materia, quàm primùm purganda est.*

ferri purgatione debet : idque, ne vel in partem delatus principem, lethalem ibi excitet inflammationem, vel repente, si venenatus est, naturæ calorem opprimens, occîdat. Illud quoquè scire licet, interdum, & declinante febre, iterari purgationem posse, cum per imperfectam judicationem natura majorem quidem materiæ partem exclusit, reliquam verò excludere potis non fuit, quæ ipsa jam tum (ne pòst iterum morbum faciat) rectè medicamento ducitur. Nam quæ post judicationes (ut diligenter observat *Hippocrates*) relinquuntur in morbis, recidivas facere consueverunt. Adeò verò demiror inconsulta complurium judicia Medicorum, ex quibus cum multi, incipiente morbo, purgent, haud pauci etiam consistente, nonnulli quoquè declinante, paucissimi tamen sint, qui incrementi provectiorem partem arripiant. Quasi, certè, datâ operâ, id tempus præterierint, quod ad hanc curationem in acutis febribus est aptissimum.

Porro,

Porro non loquor hæcenus id medicamenti genus, quod passim lenitivum appellant, sine vi, ullâve corporis turbâ, fordes intestinorum expurgans. Id enim quibulvis utile est, cum alvus parum respondet, morbi temporibus. Datur autem modò per os, modò alvo injicitur. Simplicissimum ejus generis propinavit *Avicennas*, ex aquâ hordeaceâ, & serapio acetoso. Alii ex cassiâ parant, vel mannâ, vel diacatholico, vel electario, uti vocant, lenitivo, vel diapruno simplici, cum decocto hordei, aut prunorum, aut oxyphoenici. Clyster paratur ex malvæ, lactucæ, violarum, mercurialis, & hordei decocto, adjectâ cassiâ, oleoque violaceo. Haud leve commodum acutè febricitantibus ex hujusmodi accedit alvi ductionibus. Nam ficcum oletum vacuatur, putredine offendens suâ, ardor febrilis mitefcit, corruptæque bilis colluvies, quæ juxtâ est, eluitur. Verùm mitia planè hæc esse debent, sic ut alvum semel, aut, ad summum bis, non ampliùs, si fieri

*Lenitivum, quovis tempore, potest esse utile, si moderatè adhibetur; maximeque alvo injectum.*



fieri potest, moveant. Inutilia penitus sunt, ubi in tantam evadunt dejectionis frequentiam, ut corpus turbent, naturæque munus, in concoquendâ materiâ, remorentur. Quem errorem indies a multis committi video, qui nullum operæ pretium fecisse se putant, nisi crebris illis dejectionibus, vel quotidie repetitis, ventrem acutè febricitantium sollicitaverint; quâ in re ideo periculum vertitur, quòd virium inde contrahatur ingens imbecillitas, quæ ut semper aliàs, ita, in hisce continuatis febribus, maximè reformidanda est.

*Quænam  
dies, atque  
hora dan-  
do Medi-  
camento  
sit oppor-  
tunum.*

Proximum nunc est, diem, horamque definire, quâ utiliter dari medicamentum possit. In quâ re, haud levis observatio est. Nam cum, in his malis, assidua sit febricitatio, neque antè ad integritatem (*ἀπυρεξίαν* Græci dicunt) perveniatur, quàm per judicationem semel resolvatur morbus: quæri non sine causâ potest, quæ diei tempora opportunissima medicinæ sint. Ergo genera febrium intueri oportet con-

tinuarum.

tinuarum, sintne hæ, vel quotidianæ, vel tertianæ, vel quartanæ, an demum continentes, seu sanguineæ; idque ideo videndum est, ut cā semper die, eâque horâ, medicamentum detur, quâ maximè sese febres remittunt, quâque corpus tam integrum est, quàm maximè esse, in eo genere valetudinis, solet. In impetu enim febricitationis, quod datum est medicamen, corpus turbat, vires frangit, alvoque subinde, uti *Celsus* scribit, continetur, ac regeſtum in caput multò gravius periculum efficit. Jam itaque, si quotidiana urget continua, quæ certè brevissimo remittit tempore, præſtare judicamus, principia medicinæ a mitescēte febre excipi, quàm ab invalescente. Quòd si tertiana est continua, quæ altero die lenior est, altero gravior, dandum medicamentum post gravioſem est. Semper autem gravioſem febricitationem exhibent hi dies, qui judicandi vim habent (*μετὰ τὴν κρίσιν Græci* vocant.) Itaque tum maximè temperandum quoquē a medi-

medicamento est. In continuâ etiam quartanâ, duo medii dies purgationibus sunt aptiores. Porrò, si sic movetur perpetuò continens febris, ut maneat prorsus æqualis, aut si majore usque impetu, sine ullâ inclinatione crescit, aut paulatim decrescendo vim amittit suam (primam *Græci* ὁμότρονον, alteram ἐπακμαστικὸν, tertiam ἀδυναμωτικὸν appellaverunt) arripiendum id fuerit diei tempus, quod naturâ suâ levissimum est. Tale matutinum esse constat, ipso jam micante diluculo. Quòd si idipsum, alicujus interventu rei novæ, aut morbi vitio, gravius est, post mediam noctem utiliter medicamentum datur. Meridies, ipsèque vesper (quantùm in se est) nequaquam purgationibus sunt opportuna. Adeò ex his apparet comprehensis omnibus, temporis præceptum, quod intermittendum non est, minimè perpetuum, in rebus multùm differentibus, esse posse.





## CAP. II.

*Quid a Purgatione agendum, & quomodo fervor acutæ Febris temperandus sit.*

**D**UCTA jam sat abunde alvo, dejectioneque conquiescente, multijulculum pulli, aut tepidum hordei decoctum, addito zaccharo, ægrotis propinant, ut scilicet intestina, transfluxu bilis siccata, humectentur, simulque tenuiores medicamenti partes, si quæ fortè ductibus inhæserè communibus, eluantur. Ea res quamquam magis necessaria violentioribus est medicinis, tamen hîc quoquè minimè contemni debet, humectationis potius gratiâ, quàm sumpti medicamenti, quod, in acutâ feбри leve esse debere ostendi. Insequentibus hinc diebus, donec morbus

*Post purgationem corpus refrigerandum est.*

L

con-

consistat, ardores imprimis febriles (quò minùs affligatur natura) mitigare refrigerio convenit, cujus usus refrigerii ab iis petetur materiis, quæ vel foris incidunt, ut aër, & quæ extrinsecus corpori applicantur, vel intrò per os sumuntur, ut cibi, atque potus, tum alentes, tum medicinales.

*Aër.*

Aër itaque, si vel temperatus est, vel calens, refrigerandus est, humi delecto quam maximo conclavi, quod non modo situ, ac mediocri perflatione auræ sit frigidum, sed & arte reddatur nostrâ frigidius, pavimento aquâ, cui mistum sit acetum, asperso, ac vitium capreolis, salicisque frondibus instrato. Manibus etiam tractari febricitantium, & vitem, & salicem, conducit. Turba item hominum ingredi prohibenda est. Ea enim domum quoque calefacit. Nonnulli, *Galenum* secuti, aquam frigidam de vasis in vasa transfundunt, quæ res ad somnum etiam conciliandum facit. Porro ita refrigeratus aër, ut intrò spiretur, non ut in corpus incidat, quæ

quæritur. Inspiratus enim cordis temperat incendium: at foris in corporis incumbens habitum, meatus claudit, parumque diffilari materiæ febrilis per transpirationem finit. Cutem enim densando ipse sibi viam, quò minùs ad viscera penetret, præcludit. Itaque hìc semper vitandus aër est frigidissimus, ut qui plus constipatione offendat cutis (nisi diligenter homo operimentis integatur) quàm cordis proffit refrigeratione.

Post aërem arte castigatum, quædam *Epithematis* etiam foris imponuntur (*ἐπιθέματα Græci* dicunt) cordi potissimùm, præcordiis, atque jecinori, ubi plurimùm scilicet fervoris subesse deprehendetur. Accipiuntur liquores stillatitii, rosæ, & buglossi, & cardui benedicti, his acetum additur rosaceum, itemque pulveratum fantalum, corallium, margaritæ, & quod ex his componitur margaritis electarium frigidum, ad hæc momentum spodi, ac boli Armenii: fitque mistis omnibus Epithema, quo pannus madefa-

L 2                      ctus,



ctus, atque imbutus, modicéque expressus admovetur. Subtepidum id medicamentum esse decet, ne subito frigore meatus claudat, coactoque, atque in corpus retruso febris calore, partium incendia internarum adaugeat. Utile etiam est, post Epithemata, *Galenii* ceratum humidum, quod decimo libro *Methodi medendi* proponitur: fitque ex ceræ albæ lotæ parte unâ, rosacei ex oleo immaturo citra salem confecti partibus tribus, aut quatuor: utrumque hoc mistum duplici in vase liquatur, factoque humido cerato, ac post refrigerato, miscetur paulatim in mortario tantum aquæ, quantum in se, dum cum eâ emollitur, accipere possit. Ad di etiam momentum tenuis, atque clari aceti potest. Aquam autem frigidissimam esse oportet, & ceratum quam maximè antè refrigeratum, quod fiet cum vas, in quo illud inest, in fontem gelidissimum demittitur.

*Quando, & in quibus refrigeratio non satis tuto est.*

Scire autem licet, tutius semper refrigerationis quæri beneficium intrò sumptis.

pti

ptis materiis, quàm foris admotis, maximè, cum plenum corpus nondum vel misso sanguine, vel purgatione fuit exinanitum. Facile enim hęc materia, usu foris refrigerantium, in viscera, magno periculo, impellitur, cohibitaque transpiratione, occasio maximæ putredini, maximisque febricitationibus datur. Itaque tutius semper hęc ipsa localia, post corporis vacuationem, posteriore incrementi parte, admoventur, cum gravius subest incendium, & bona materiæ pars exhausta est. Præcipuus his ipsis est locus, cum maximis, ac periculum minantibus ardoribus homo perurit, qui ardores sat commodè, per ea, quæ intrò sumuntur, extinguere nequeant, vel quia stomachus hęc ipsa respuit, vel quia ægri sumere detrectant. Eadem in corpore admodum extenuato, quoniam viscera promptè frigido offenduntur, inutilia sunt. Æquè etiam nocent, ubi commodus aliquis emergere sudor incipit, maximèque per statum judicatorius, qui febrem

esset finiturus. Hic enim usu foris refrigerantium impeditur.

*Cibi, ac  
pocula op-  
timè refri-  
gerant.*


Utilis apprimè refrigeratio est, quæ cibis, ac poculis quæritur refrigerantibus, quorum materiam superioribus locis proposuimus. Maximè etiam portiones valent medicinales, quæ Zulapia vocantur, ad mitigandam febris acutæ flammam. Accipiuntur stillatitii liquores, omnium intybi generum, buglossi, violarum, carduique, uti nominant, benedicti: his additur oxyzacharum, vel serapium acetosum, vel violaceum, vel ex intybo factum, fiuntque portiones refrigeratoriæ clarissimæ, gustui, atque aspectui ægrotantium gratæ.

*Nimia cavenda est refrigeratio.*

At meminisse convenit, moderationem his aliquam esse oportere, ne nimia refrigeratione vel stomachum offendamus, vel materiæ remoremur concoctionem, secretionem, atque resolutionem. Proclivius nimiae frigiditatis periculum est in corporibus naturâ frigidis, in stomacho infirmo, in senes, in hieme,



hieme, & in cœlo frigido. Vidi equidem nostratium complures ita Zulapiis istis assidue fartos, atque faginosos, temeritate Medicorum, alios difficillimo fuisse affectos singultu, alios, post curatam febrim, hydrope consumptos, omnes certè longâ febricitatione, atque difficili fuisse impeditos.



## CAP. III.

*Quomodo gravioribus Symptomatis acutæ Febris occurrendum sit.*

**Q**Uoniam naturæ vis maximè symptomatis sollicitatur, & in hujus imbecillitate summum periculum est, non sine causâ infringere, atque coërcere istorum impetum symptomatum, quantum fieri licet, convenit. Ea autem ferè hæc sunt. Sitis, linguæ asperitas, tussis, singultus, appetitus ca-

ninus, capitis dolor, vigilia, delirium, sopor, animi deliquium, vacuatio aliqua præter modum, præterque tempus effusa.

*Sitis remedium.*

Sitis pellitur usu refrigerantium, atque humectantium, quæ superiùs proposui. Singulare est Zulapium, ac zaccharum violaceum. Conferunt etiam succi pomi limonii, & aurantii, addito zaccharo, itemque succus medicatus e ribes, ex oxyacanthâ, & hujusmodi. Siccata etiam pruna, fonte perfusa, ac macerata, juvant. Illud verò semper fervandum, ut ne potitet æger, neve nimium siti crucietur. Quâ in re, a multis delinqui video, quorum alii indulgenter ægros habent, biberéque ad voluptatem, quantum lubet, sinunt; alii durissimi tortoris vicem exhibent, ne guttulam quidem humoris, tum, cum is necessarius est, concedentes. Prior error ægrotationem longiorem facit, alter ardoris affert incrementa, & corporis liquefactiones, ac vitæ summa pericula.

Porro

Porro si, cum bibere inutile est, fauces admodum inaruerunt, elui humore possunt. Commodèque *Erasistratum* dixisse *Celsus* refert, sæpe inferiore parte humorem non requirente, os & fauces requirere. Sicca lingua prunis corrigitur, aquâ maceratis, atque in ore retentis. Confert os eluere aquâ per se, vel cum hordeo coctâ. Si viscido humore lingua, tanquam limo onusta, asperatur, aquæ hordeacæ unicæ quatuor miscentur unicæ aceti mulsi, & sic os colluitur, post linteolo, vel spongiâ, quæ hunc liquorem acceperunt, lingua repurgatur. Quod si scabrities multa eam occupat, detergere primùm penicillo oportet, ex aquâ calidâ, ac dein psyllii mucagine ungere.

Porro tussis interdum sicca per acutitas febres incidit, arefactis nimium pulmonibus. Eam humectantibus, ac refrigerantibus licet corrigere, ut Zulapio violaceo, electario diatragacanthi frigidi, aquâ hordeacâ, cui mistum sit zaccarum



rum, catapotiis bechicis ore retentis, & hujusmodi. Utile etiam est, pectus foris perungere oleo violaceo, adipéque gallinæ, cum albâ cerâ mistis.

*Singultus.* Singultus autem modò summam sequitur corporis, maximéque ventriculi (cujus is est affectus) siccationem, ab urentissimâ contractam feбри, quæ certè lethalis est, & extra omnem posita medicinæ opem, modò ab humore fiat acri, quo ventriculus est imbutus, contra quem casum medicamentum ex aloë factum valet. Non nunquam intertemperatum sequitur Zulapiorum refrigerantium usum, quomodo affectos, inconsultâ temeritate Medicorum, complures vidimus, idque symptoma, contra omnium opinionem, vini potu sustulimus.

*Appetitus  
canini.*

Porrò appetitus, qui dicitur caninus, interdum nobis visus est per continuas febres, maximéque per inveteratas incidisse, adeò ut ægri unico subinde prandio integrum devoraverint capum. Gignitur is affectus, cum longæ febris calor

calor corpus nimium resolvit : quò fit, ut avidæ, propter fomitis indigentiam, partes continenter alimentum trahant, cumque ejus tractionis stomachum pulsavit sensus, effrænata excitatur appetentia. Resolvens hic calor, non solum extimis in membris, verum etiam in ipso simul ventriculo subindeprehenditur, ex quo is intemperanter redditur famelicus. Remedium est, corpus foris astringentibus oleis, vel lotionibus, ne nimium diffluat, durasse; ac pingues, lentos, ac frigidos, succi tamen non mali, cibos sumpsisse. Efficaces esse comperi vitulinos pedes, cum semine portulacæ, vel lactucæ, in aquâ coctos.

Cæterum, si caput propter febris *Doloris in* magnitudinem, aspirantibus eò fervidis *capite.* halitibus, aut humoribus, dolet, post convenientes corporis exinanitiones, firmandum, ac temperandum est perfusione oxyrrhodini, vel olei crudi, cui incoctus sit polygoni succus. Fronti etiam hæc ista panno excepta applicantur

tur, sciréque licet, actu quoquè frigida ea esse debere, maximè per æstatem : Hieme tepida esse licet, utique, si mitior subest febris. Inter hæc tempora avertere impetum humorum convenit, clysteribus, vinculis, ac frictionibus infernarum partium, quantum per febrem licet, idoneis. Si corruptus in ventriculo humor dolorem capitis vel creat, vel auget, citâ vomitione expellendus est. Quòd si ex succorum multitudine, aliisve de causis, dolor in caput incidit, ejus protinus cognoscenda, tollendâque occasio est. Nulla verò curatio capiti debetur, quod, propter instantem judicationem permotis ad excretionem humoribus, dolet. Id enim salubre potius signum, quàm symptoma fuerit reputandum, estque inseparabilis nota fluxuri per judicationem e naribus sanguinis, aut vomitionis futuræ.

*Vigilia.*

Haud leve tædium a vigiliâ febricitantibus oritur. Nam, resolutis spiritibus, vires ea consumit, tandemque inquietudinem, delirium, vitæque periculum



culum affert. Sequitur autem vehementem cerebri ficcitatem a flavæ bilis contractam vaporibus. Itaque iis rebus corrigitur, quæ simul humectent, atque frigefaciant. Inter has res pulicula est hordeacea, seu Ptisana non colata, adjectis feminibus refrigerantibus, tum majoribus (ut vocant) tum minoribus. Non sæpe autem cubituris, ubi pertinax vigilia insaniam minatur, serapium damus ex albo factum papavere. Quidam ad hanc rem haud incommodè tempora, frontem, nares, & interdum pedes quoquè oleo nymphææ, vel unguento, quod ex populo fit, imbuunt. Alii papaveris lævigant capita, mistaque cum pane, ac rosaceo, fronti applicant. Nonnulli hyoscyami, atque mentæ illitis succis somnum provocant. Verùm scire licet, hujusmodi soporiferis cautiùs utendum esse, maximè, si caput naturaliter imbecillum est, aut humore intus aliquo, qui subinde distillet, grave. Tutiùs alii decoctis quibusdam refrigerantium rerum brachia, atque

atque pedes lavant, eâque re somnum conciliari posse contendunt ; verùm hæc ista sunt subtepida, ne ascititio calore fervidum incendio corpus turbent, inflammentque. Magnas vires contra vigiliam aër cubiculi refrigeratus habet. Id fit sole excluso, ipsoque pavimento aspergine oxycrati, aut aquæ rosaceæ, cui mistum sit acetum, refrigerato. Quin etiam frondibus salicis, aut vitis, aut nymphææ, area insternitur, eademque utiliter manibus tractantur ægrotantium, & per omnem lectuli partem sparguntur. Sonitus etiam scaturientis fontis, si quis commodo loco esse possit, itemque fusæ perpetuo supra pelvim undæ propensiores hominem ad somnum reddunt. Non alienum etiam est, crura manusque vinculo aliquantisper excipere, colloquioque amicorum, ac mediocri strepitu vigilem ægrum distingere : idque eo tempore facere, quo maximè dormire is, & solet, & cupit, ac dehinc, subitò resolutis vinculis, sublatâque luce, altissi-

mæ cum quieti relinquere, ac sic dormire finire.

Porro delirium (quod ferè pertinax *Delirii.* antecedit vigilia) si per acutam febrem oritur, grave est, præcipuè, cum diutius id immoratur. Avertere ad inferiora biliosos halitus, atque humores caput tùm occupantes, tùm petentes oportet, perfrictis subinde pedibus, & cucurbitulis primùm supra nates, dein supra scapulas defixis, maximè autem injecto clysterio, quod libram accepit decocti lactucæ, violarum, mercurialis, althææ, hordei, semenque frigidorum, uti vocant, majorum, adjectâ cassiæ uncia, diapruni solutivi drachmis admistis, quinque, aut sex, itemque olei violacei unciis tribus, salisque scriptulis duobus. Jam verò id delirii genus, quod sub judicationem, vel per ipsam incidit, sequens nimirum materiæ mox exituræ permotionem, nullâ curatione sollicitandum est, utpote suapte sponte post absolutam vacuationem desitutum.

Gra -



*Soporis.*

Gravissimum est, in acutâ febre, soporem delirio succedere, in quo casu vix ullum auxilii genus efficax deprehenditur. Quidam hîc, magnâ temeritate, ad validas properant purgationes, quæ imbecillam vim prorsus dejiciunt. Itaque fit, ut jure dicatur homo medicamento periisse, quem pòst paulò tollere morbus debebat. Alii gallinaceos pullos, per medium dissectos, capiti a vitâ calentes admovent. Quod utique remedium nequaquam rejicerem, nisi plùs trahere materiæ in caput, quàm ex eo resolvere videretur. Rectiùs (me judice) hi pulli plantis subduntur pedum: quoniam sic efficaciter trahendo materiam a parte superiore revellunt. Itaque possunt ea etiam omnia tentari, quæ adversùs dolorem capitis, causâ aversionis, suprà proposui.

*Animi defectionis.*

Nunc de animi defectione dicam, quæ nunquam sine gravi metu incidit, maximè, si immoderatam secuta est vacuationem. Tum vinum, aquâ frigidâ dilutum, dari potest, nisi si vel nimius

ex

ex febre subest calor, vel ingens urget capitis dolor, vel delirium, vel aliqua viscerum inflammatio internorum. Itaque tum quoquè odorari vinum æger potest, bibere non potest. Frigida quoquè aqua utiliter in vultum spargitur, itemque nares, ac aures manibus veluntur; os denique ventriculi perfricatur, ac vomitus infertis in gulam digitis, vel pennis cietur. Vinciri autem manus debent, si quid inferiore parte corporis præter modum effunditur, aut pedes, si superiore. Cum sanguis e naribus nimium fluens animi defectum intulit, vel cita alvus, vel copiosus sudor, ea conferenda præsidia sunt, quæ mox, ubi de intemperatis agetur vacationibus, proponam. Interdum impetente, atque rodente stomachum bile, deficere anima incipit: quod symptoma haud juxtà grave est. Ejecto enim humore, protinus homo ad se redit. Ergo oleum aquæ miscere convenit, eoque affatim hausto, vomere. Huic etiam intinctus digitus, & in gulam da-

M

tus,

tus, vomitum, qui, sumpto hydrelæo, non sequitur, ciet. Post hæc, si stomachus admodum manet imbecillus, corroborandus est, micâ panis devorata, quæ mali punici succo sit imbuta, itemque foris admoto cataplasmate, quod ex palmulis, oleoque cotoneorum conficitur, cui succus etiam intybi, cucurbitæ, uvarumque acerbarum addi potest, si æstu aliquo præcipuo stomachus uritur. Porrò, ubi ita maligna est febris, ut animi inferat crebram defectiorem, multaque extremorum frigora, validis uti oportet frictionibus, atque vinculis, hominemque nequaquam multum dormire sinere, nec cibo repleari. Cum ingens propter febris ardorem siccitas defectum animi attulit, protinus afferendum humidum, frigidum, coctuque facile, ac sæpius paucum alimentum: quod quanquam mitioribus temporibus tutius datur, ita tamen, re cogente, mediis etiam febri ardoribus dari potest. Utile quoque fuerit, frigidam tum inspergere, tum potu



potui dare, itemque ægrum ventilabro reficere, atque auræ exponere.

Nunc de vacuationibus agendum est, quæ intempestivè, ac præter modum incidunt, meritóque sisti, ne naturæ perdant vires, debent. Ac primùm *Sanguinis fluxus præter tempus, ac modum.* quidem, si sanguis e naribus fertur, non judicatoriè, sed propter ingentem succorum ebullitionem, cucurbitulæ, aversionis causâ, oppositis corporis locis sunt affigendæ. Crura item pluribus, ac valentioribus vinculis stringenda, homóque collocandus est rectus atque sublimis. Cervices quoquè, proximasque iis partes circumdare linteis oportet, oxycrato, aut solâ frigidâ imbutis aquâ. Id quod tunc minùs licenter faciundum est, cum imbecillitas capitis, vel destillatio, vel angina metum facit. Uti- liter intra nares attrahitur aqua frigidissima, itemque sempervivi succus, aut hyoscyami, cui mistus fit bolus Armenius, aliufve, qui admodum astringat, pulvis, ut qui ex balaustio fit, acaciâ, cortice mali punici, hypocystide,

& hujusmodi. Ad eandem rem quidam succo stercore asinini, aut ipso pulverato stercore, cum sanguine draconis utuntur. Cæterùm intrò fumentum da sunt, quæ sanguinem ferventem refrigerio temperent, eumque moderatâ quâdam inspissatione, ne ita sit fluxilis, cogant. Quales lactucæ sunt coctæ, itemque ex hordeo forbitiones, quibus violæ, seminâque lactucæ incocta sint. Serapium autem violaceum, cum succo lactucæ, ac portulacæ sumptum juvat.

*Vomitûs.*

Proximum est de vomitu dicere, quî, nisi judicatorius sit, sæpe reprimi debet, ac tum maximè, cum, propter ventriculi imbecillitatem, continenter eò bilis influit. Corroborare itaque hanc partem, post rejectum humorem, convenit, usu astringentium, tùm foris, tùm intus adhibitorum, itemque corruptam bilem, subdito subinde clystere, in alvum avertere. Quòd si humor aliquis in ventriculo gignitur, vomitumque crebrum facit, primùm is expellen-

dus

dus est, epotâ aquâ tepidâ cum serapio acetoso, dein ventriculi vitium idoneis materiis corrigendum.

Jam etiam fluens præter modum al-<sup>Dejectionis.</sup>  
vus multum incommoda febricitantibus esse solet. Crebro enim desessu, multâque inanitione vires consumuntur. Quin etiam vigiliæ comitantur, lethaliâque interdum tormina, exulcerante tunicas intestinorum bile. Sistere hanc fluxionem, si neque temperata sit, neque judicatoria, convenit, aquâ hordeaceâ, in quâ candens ferrum extinctum sit, ac post decocta sit pyrola, intybus, plantago, myrtus, aut hujusmodi. Inutilia sunt omnia pingua, atque acida, ipsumque in primis acetum. Aër etiam cubiculi plurimum refrigeratus nocet.

Persæpe copiosus sudor, qui judica-<sup>Sudoris.</sup>  
torius non est, peracutè febricitantes magnâ virium jacturâ laceffit, ideoque modis omnibus is est comprimendus. Primum densare, ac refrigerare extremum corpus oportet cubiculi aëre refri-



gerato, virgultis falicis, vitium capreolis, ac rosis humo, quæ oxycrato madeat, instratis. Perungere quoquè oleo corpus, ex myrto, aut salice, aut rosis factò confert. Quæ ungi debent loca, hæc sunt, frons, tempora, arteriæ juxta carpum manûs, spina dorsalis. Cum verò effrænata sudatio istis invicta remediis persistit: *Avicennas* etiam nivem extremis admoveere membris non dubitavit. Nos easdem partes frigido fonte perfundimus, aut in eo ipso diu teneri deberi præcipimus. Abstergere autem sæpius sudorem prorsus inutile est, inde enim is ipse magis fit copiosus. Nullus, qui judicatorius sit sudor, sistendus est, nisi immoderatè fluens vires exhauriat ægrotantis, ex quo animi deliquia consequantur. Qui per principia febrium acutarum venit, quamquam est illaudatus, nequaquam tamen comprimi debet. Copiam enim sequitur materiæ, cujus si, propter stipatam cutem, prohiberetur difflatio, majoris putredinis ansam daret.



## CAP. IV.

*Quæ Viētūs ratio per Incrementum Continuæ Febris servanda sit.*

**P**AULò liberalior viētus incremento febris acutæ, quàm principio convenit. Nam viribus prospicere maturè oportet, ad summum morbi sustinendum vigorem, judicialibus notis, atque symptomatis gravem, cui vigori cibus est omnis inimicus; qui ideo rectè incrementi morbo tribuitur, quoniam tum symptomata haud ita gravia sunt, ut in statu, neque tanta adest virium facultas, vel materiæ cruditas, vel plenitudo, quanta in principio. Siquidem alimentum hæc omnia recusant, Symptomata (nisi cum evidenti virium periculo sæviant) materiæ cruditas, vel re-

*Ut vigor morbi sustineri possit, in incremento viētus liberalior rectè datur.*

M 4 pletio,

pletio, virium per morbos robur. Symptomata statui assunt: reliqua principio. Itaque commodè dixit *Hippocrates*: Ubi morbi consistunt, gravissima esse omnia: ideoque tum subtrahi cibum oportere. Itidemque *Celsus* principia scripsit morborum famem, ac sitim desiderare. At verò incrementum, quia notam evidentis exhibet concoctionis, neque corpus æquè præstat plenum, utpote misso sanguine per initia vacuatum, neque prorsus symptomatis afflictum, summo jure liberaliorem cibum admittit. Quò fit etiam, ut cum principio abstinencia convenit, hìc pocula rectè dentur: ubi illic pocula, hìc tenues sorbitiones: ubi illic tenues, hìc utiles sint crassæ. Meminisse tamen convenit, sub hâc crassiusculâ victûs ratione, partiri sæpius cibum exiguum in multas vices oportere, ut ne is ipse, semel datus, naturam acutissimo afflictam morbo gravet. Id quod prudenter monuit *Avicennas*, noxæ illius crassiusculi victûs succurrendum




dum esse partitione, ita nimirum naturam melius tolerare. Scire autem licet, eò semper magis extenuari cibum debere, quò propiùs acceditur ad statum, occasione symptomatum alimentis respicientium, quæ symptomata, incrementum ad vigorem morbo, semper crescunt.





DE CURANDIS  
 FEBRIBUS CONTINUIS,  
 SECTIO TERTIA,  
*Quæ earum complectitur Statum.*



CAP. I.

*De Vacuationibus Judicatoriis.*

*In statu  
 Febris, ad-  
 juvanda  
 est natu-  
 ra; at-  
 tenden-  
 dum au-  
 tem, qui-  
 bus ea  
 viis mor-  
 bum ex-  
 pellere mo-  
 liatur.*



OMNIBUS, ita uti præcepit  
 diligenter per febris principium,  
 incrementumque provisum,  
 ubi ad statum ventum est  
 videre imprimis oportet, quibus natura  
 viis corruptum humorem pellere in-  
 stituatur.

stituat, eamque convenit parum firmam  
juvare. Neque verò reclamationat, quod *Hip-  
pocrates* scribit. Quæ judicantur, vel ja-  
dicata sunt integrè, ea nullis medica-  
mentis, aliisve irritationibus laceſſenda, sed  
ſinenda eſſe. Scilicet hîc non laceſſi-  
mus, ſed quò materia vergit, eò leni-  
ter impellimus, laborantique naturæ  
tamquam manus auxiliares damus, re-  
bus uſi moderatioribus, nec quidquam  
naturæ opus, more purgantium medi-  
camentorum, turbantibus. Ut enim  
naturam rectè omnia per ſe abſolven-  
tem attingere neceſſe non eſt, ita fas  
eſt, laborantem, conatuque vacuantem  
difficiliore adjuvare; id quod in noſtro  
potiſſimùm cœlo obſervandum eſt fri-  
gidior, ſub quo judicationes lentiùs,  
imperfectiùſque procedunt.

Ergo etiam ſi profluxurus e naribus  
eſt Sanguis, id quod interdum fit, pro-  
movere hunc, ſetis intra nares datis,  
licet. Fluxuri Sanguinis hæ notæ ſunt.  
Quidam veluti ſplendores obverſari vi-  
ſui incipiant, cum oculorum quâdam  
hebe-

*Quomodo  
ſanguinis  
e naribus  
fluxus  
promoveri  
poſſit; e-  
juſque  
profluxuri  
ſigna.*



hebetudine, atque lacrymis. Ipsæ quoque malæ, atque nares rubent, auresque obsurdescunt: hypochondria sine dolore intenduntur: spiritus difficulter trahi repentè incipit: caputque insolito, pulsante, atque distendente affectum dolore, exardescit. Nares quoque, sanguine jamjam fluxuro, pruriunt. Frequens est hæc vacuatio viscerum inflammationibus internorum, febribus autem simplicibus non item.

*Quomodo  
Vomitum  
provocan-  
dus est;  
quaque e-  
um ante-  
cedunt  
signa.*

Porro, si Vomitu materia excludi velle videtur, isque haud promptè sequitur, provocandus etiam est, atque incitandus, pingui digito intra gulam dato, aut certè hordei epoto decocto, quod olei, atque serapii acetosi bonam partem accepit. Inutilia sunt effrænata vomitoria, quoniam ventriculum labefactant, nimiâque corporis agitatione mobilem humorem inflammant, atque febrem augent. Vomitionem hæc antecedunt: Stomachi morsus: capitis dolor: vertigo: tenebrosa oculis objecta simulacra: nausea: labii inferioris tremor,

mor, saliva multa, tenuisque ex ore defluens.

Ubi cum Urinis materia morbi effluet (id quod per continuas febres interdum incidit) medicamentis has ci-  
entibus utendum est. Longi enim hi, angustioresque itineris ductus omnino opem hanc Urinariam postulant. Quapropter potui datur calens hordei decoctum, cui semina incocta sunt melonum, & petroselini radix. Purgari autem incipere humorem per vesicam, ex eo constat, quòd cæterarum corporis vacuationum judicia nulla sint, sola autem sæpius reddi urina multa, crassaque cernitur.

*Quomodo  
Urina ci-  
eri possint;  
& purga-  
tionis per  
Vesicam  
futura  
Signa.*

Cæterum si in alvum propensus humor dejectione reddi coepit, temperandum profectò ab omni medicamento purgante est; primum, quòd id adeò necessarium non sit, quoniam hæc itinera intestinorum ita latè patent, ut commodè his perpurgari materia sponte naturæ possit: dein, quia Hippocrates quoque præcepit, per acutæ febris

*Si per de-  
jectionem  
Crisis fit,  
a medica-  
mentis  
temperan-  
dum est.*

bris vigorem, penitus a medicationibus esse temperandum, ut quæ vi, atque calore, tùm proprio, tùm eo, quem propter corporis excitant turbationem, hominem debilitant, incenduntque. Quin etiam, per medicamentum incitâtâ nimium vacuatione, probos etiam exire succos contingit, dissiparique præter modum spiritus vitales, quâ ex re quantum periculi sit, fatîs apparet, utique in eo corpore, quod assiduo, acutissimoque exercitum morbo, vix vires conservavit suas. Ut ne dicam interea metum lethalium torminum (*δυσεντερίας* *Græci* vocant) quæ ex medicamento, in ventrem biliosum fluentem dato, haud difficillimè nasci consuevere. Addeò verò constat, ut nunquam per vigorem febris acutæ, ita minimè perfluente etiam jam tùm alvo, medicamentorum dari poriones licere. Quòd si parum sufficienter (quod sæpe sub nostri coeli incidit tractu) natura humorem exclusit, id quidem non in statu, sed



fed ipsâ in declinatione, corrigi purgationibus debet.

Nunc de judicatoriis Sudoribus dicam, qui cunctis febribus, ac præcipuè acutis sunt propriissimi. Hos jamjam imminentes aliquis antecedit rigor, nunquam antè per totum animadversus morbum. Simul etiam tum vesica, atque alvus parum reddunt: ipsaque increfcens febricitatio delirium ingens movet. Ad hæc extimæ corporis partes magis calent, magisque rubent, & ex his calidus, & insolitus quidam vapor emergit. Ipse arteriarum pulsus undosus est, & insigniter mollis. Sudores autem jam ortos tantisper excipere, donec sat multi promanaverint, convenit, & promovere etiam parum fluentes fortu tegumentorum mediocri, calido clystere, quiete, ipsoque, si fieri potest, somno. Eisdem etiam, si subinde tepefacto linteo absterges, adjuvas. Alius enim alium absterfus provocat. Si nimius Sudor est, protinus cohibendus est, ne periculum incidat animi deficientis.

*Sudorum imminetium signa; & quomodo promovendi sint, & coercendi.*

entis. Itaque corpus, operimentis partim demtis, partim sublevatis, exoneratur, reficiturque ad mediocris refrigerii temperamentum. Nudare quoquè brachia, ac pedes utile est, totumque cubile suspensis vitis, aut falicis frondibus adornare, ac modis omnibus, uti superius præcepi, aërem ægro circumfufum frigidiorē facere. Facies quoquè rectè permadefcit ſpongiâ poſcæ plenâ; inutile eſt Sudorem ſæpius abſtergere: relictus enim, ac foris in cute refrigeratus, ejus obſtruit ſpiracula, exitumque ſecuturi novi Sudoris impedit. Cibus autem tum ægro detur ſiccior, viteturque potio multa, & creber clyſteriorum uſus. Et quidem, ſi vires permittunt, geſtari etiam homo in loco ſubfrigido poteſt.

*Quid agendum ſit poſt Criſin.*


Finitis Sudationibus, ubi jam venæ penitus conquieverunt, integerque ſine febre redditus homo eſt, aut tantum ſanè, quantum minimùm poteſt, febricitat, refici alimento humido, boni ſucci, ac mediocris materiæ debet, atque  
hinc

hinc duabus, tribusve interpositis horis, somno se dare. Sunt nempe hæc efficacissima contractæ ariditatis remedia, & debiliû adjumenta viriû, quæ sub assiduâ ægrotatione afflictæ, ac pœne oppressæ fuere. Quæ etiam præceptio, post alias judicatorias inanitiones, servanda est.

Porro, ut optatissimum est, hæc genera vacationum ex voto incipere, atque absolvi: ita non usquequaque perpetuum est. Natura enim, etsi humorem concoctione vicit, haud æquè tamen facilè expellit. Concoctio namque multo perficitur tempore: expulsio, brevissimo; unde fit, ut quæ illic vis hominis valuit, hîc laboret, adjumentumque, tamquam exordium vacationis, arte præstitum nostrâ, requirat. Id adjumentum in aquâ positum est frigidâ, maximè ad vomitûs, dejectionis, atque sudoris provocationem. Quæ res quomodo fiat, jam nunc proponetur.

*Quid agendum, si nulla sit Crisis.*





## C A P. II.

*De Aquæ frigidaë potione.*

*Varii in  
exhiben-  
dâ Frigi-  
dâ errores  
recensetur.*

**V**Entum nunc est ad frigidaë poculum, quod quidem *Galenus* alterum esse scripsit ex præcipuis continentium febrium remediis. Id alii aliis modis, atque temporibus exhibent, nec parum multi ex toto prætereunt. Quid quisque erraverit, & quis verus sit Frigidaë bibendaë usus, proponam. *Avicennas* adversus sitim, ac materiaë biliosæ concoctionem, continenter esse bibendam frigidam, toto morbi decursu, jubet. Id jure, ut vanum, nobis licet repudiare. Cruda enim aqua maturationi officit humorum, ideoque non rectè dari, nisi in statu, qui absolutam exhibet concoctionem, potest. Alii in ipso quoquè modo exhibendi, non solum in tempore peccant. Scilicet paucis sæpe portionibus aquam potui-

dant :

dant: vim nimirum frigidi fontis, ne quid is intus lædat, veriti. Næ isti hâc re parum proficiunt in temperandâ febris acutæ flammâ; quin potius eam accendunt, superatâ aquâ caloribus, & in horum, ut sic dixerim, conversâ alimentum. Neque enim sine causâ *Hippocrates* dixit, in corporibus calore æstuantibus bilefcere aquam solere, ac majorem sitim facere. Quæ profectò res eò est proclivior, quò paucior aqua maximis ignibus faciliùs superatur. Timidiores his sunt, qui aquam omnem rejiciunt (*ψυχροφόβος Galenus* vocat) cruditatem horrentes, ac principum offensam viscerum. Primum, hi ingrati esse in rerum videntur naturam, quæ efficax, quod ipsi prætereunt, remedium adversus humanæ vitæ inimicissimum morbum suppeditavit. Dein, ineptè meticulosi sunt, quoniam parum vident, nihil læsionis ab aquâ oriri frigidâ visceribus posse, ceu maximo occupatis ardore, qui vim frigidi æquet elementi, aut certè ita ab eo

vincatur, ut hujus tamen robur, facultatemque refrigerandi simul fregerit; neque tam victus esse a gelidâ aquâ dicatur, quàm simul cum eâ, dum contrariis pugnabatur viribus, concidisse, atque perîsse.

*Refelluntur aliqua in eâdem re Authorum opinioniones.*

Quoniam ergo salutare illud aquæ frigidæ præsidium negligendum per acutas febres non est, certumque videtur *Galenî* placitum, duo in his morbis esse maxima remedia, missionem sanguinis, & aquæ frigidæ potum; tùm etiam, sanguine per initia non misso, quia unicuique, quod restet, auxilium in aquâ is Auctor ponit frigidâ, operæ præteritum me facturum putavi, si ejus legitimum usum, atque effectum omnem proponerem. Aqua, frigida est, atque humida, partiumque crassarum. Ea itaque, cum intrò sumitur, difficulter concoquitur, diuque in ventre, antequam per corpus digeratur, inhærescit. Quare neque incîdit quidquam, neque terget, sed neque alvum ducit, neque urinam ciet, aut transpirationem, quæ per cutem fit, impellit.



impellit. Hæc cum aqua habeat, videtur profectò pro materiâ concoquendâ dari nunquam posse; adeóque nullum locum, incipientibus, incrementibusque febribus, habere. Neque enim refrigerii causâ (si non ob materiæ concoctionem) tum rectè frigida datur; quoniam hic refrigerationis fructus meliùs ab iis petitur rebus, quæ simul refrigerent, simul incîdant, ac meatus abstergendo aperiant, quales superiori-  
bus locis proposui. Quin etiam ne refrigerare quidem aqua, exiguis data portionibus, potest, ùt quæ protinus a calore vincitur, & in ejus tum vertitur fomitem. At verò affatim sæpe multum frigidi fontis, comprehensis temporibus, aliquis infundet, & sic calorem febris superabit. Næ ille parum intelligit, qualecumque forsan refrigerium visceribus sese præstare: verùm materiam morbi incrassando, atque intus includendo, longè facere concoctioni rebellio-rem, itemque meatus, quibus ea tandem vacuari debeat, obstru-

ere; ad hæc, urinas, dejectiones, atque corporis coeca spiracula astringere, totum denique morbum, inductâ cruditate, pejorem, longioremque facere. Rectè enim *Hippocrates* judicavit, tardam morbi solutionem lentis concoctionibus significari. Itaque mirum non est, in exitii discrimine versari cum, qui diu, assiduèque ab atroci morbo pulsatur. Et quanquam, propter pollentes vires, interdum febris non occidit, sed utcunque forsan segnescit, longa tamen, dubiâque ægrotationis tædia, quæ vel ad quadragesimum etiam durent diem, acquirit. Quò magis improbanda est *Razis* sententia, qui nunquam desistere debere ægrum ab usu aquæ frigidæ scribit, eamque bibendi licentiam, quamquam judicationes remorantem, longè tamen censet esse abstinentiâ tutiorem. Id verò sese experimento ait comperisse, plures servatos esse qui biberint, quàm qui abstinuerint. Ego verò haud tanti puto *Arabis* experimentum, exemplis nixum parum  
fidis,

fidis, quanti duco *Hippocratis*, *Gale-  
ni*, *Æginetæ*, *Ætii*, *Tralliani*, *Cel-  
si*, similiumque virorum, ratione, vero-  
que usu comprobata sententiam. O-  
mittere, inquit idem *Razes*, extinctio-  
nem, est proculdubio finire ægrum ad  
mortem tendere. Atqui, ô bone, ea  
extinctio tutius per ea perficitur, quæ  
præter quàm quòd efficaciter refrige-  
rant, ad materiæ faciunt etiam conco-  
ctionem, incisione, atque abstersione,  
quarum utraque frigida aquæ deest.  
Jam verò sæpius hæc ipsa per totum  
morbum sumpta Frigida, non solùm ma-  
turationi officit materiæ, verùm etiam  
ita naturæ fit familiaris, ut in vigore  
minùs efficaciter agere possit; cum,  
utì mox ostendetur, liberaliter potari,  
ut humorem impellat ad excretionem,  
debeat. At enim, dicet aliquis, inge-  
stâ affatim aquâ sudores moveri posse,  
vel incipiente etiam, increfcenteve  
febre: pulso nimirum versus extrema  
corporis, propter frigida occurrentis  
impetum, calore, ejusque subjectâ si-



mul sequente materiâ. Atqui id cogere penitus est naturam invitam ad humoris expulsionem nondum cocti, aut separati. Quæ res, ut longè abest ab ejusdem instituto naturæ (quæ suapte sponte nunquam quidquam, nisi concoxerit, movet) ita adeò non respondet, ut contrà potius cuncta sisti contingat corporis effluvia, coeptamque tardari concoctionem, atque universum denique naturæ opus interturbari.

*Danda est  
in ipso vi-  
gore morbi  
frigida,*

Quid ergo? Quibus demum febris continuæ temporibus, & in quem finem propinanda frigida aqua est? Id verò jam nunc sic expediam, ut doctis hominibus debeam, nisi fallor, videri satisfecisse. Quoniam cruditatem Frigida adauget, principio, incrementoque febrium inutilis est. Nam, iis temporibus, nondum absoluta maturitas humori accessit. Sed ne declinatio quidem exigere Frigidam ullo jure potest, cum morbi exhausta est materia, ac viscera, ægritudine debilia, neque ingentibus ampliùs affecta, munitaque ardoribus,

ribus, frigidi fontis occurſu haud diffi-  
cillimè læduntur. Itaque unicum ſupe-  
reſt, quo dari utiliter aqua poſſit, vigo-  
ris tempus, non quidem cauſâ conco-  
ctionis promovendæ, quæ tum abſolu-  
ta eſt, &, ut minimè ſit, juvari tamen  
a Frigidâ nequit; ſed ut hæc ipſa Frigi-  
da principium faciat alicujus judicato-  
riæ vacuationis, cùm vomitûs, atque  
dejectionis, tùm maximè ſudoris.

Quod ſi ita ſit, videtur proſectò tum *Ut conco-*  
danda aqua eſſe, cum maximè materia *cta mate-*  
concocta eſt, in ipſo ſcilicet ægritudi- *ria excer-*  
nis ſtatu: minimè autem, vel principio, *ni poſſet.*  
vel incremento convenire, quòd tum  
nequaquam tutò pelli humor (quoniam  
concoctione caret) vel a naturâ, vel  
ab arte poſſit. In exhibendâ, inquit  
*Ætius*, Frigidâ, cavere principium, at-  
que incrementum febris oportet, ſed  
totius morbi, particulariſque exacerba-  
tionis vigorem deligere. Siquidem cum  
vigoris articulum judico Frigidæ idone-  
um potandæ, qui febrem, ebullitio-  
nem, ſitim, inquietudinem, cordis, ar-  
teria-

teriarumque pulsationem, omnia exhibet vehementissima. Ita enim minùs læduntur frigido viscera, & acrior fit inter febrem, aquamque gelidam pugna; unde certior, pleniorque pòst insequitur vacuatio. Ergo etiam quò hæc ista fiant feliciùs, atque impensius, provocare etiam bibendi cupiditatem oportet, ut, cùm æger admodum exarserit, avidusque ostensum pellucido in vase fontem concupiverit, eo primùm aliquantisper denegato, donec anhelus toto corpore, totoque animo in aquam inhiaverit, tandem, quantùm haurire fontis volet, permittatur, ad ipsam usque satietatem. Post hæc, si venter fluere coepit, aut vomitus erumpere, excipere convenit. Dein, stragulis diligenter intecto corpore, sudor oritur, qui semper, donec abunde fluxerit, abstergendus est.

*Ratio, cur  
Frigida  
vacuationes  
promoveat.*

Jam autem quæ ratio sit vacuationis hujus, a gelido fonte introductæ, dicere non alienum est. Cum febris vigorem adepta est suum, sicuti materia,

quæ



quæ lædit, concocta est, ita symptomata sunt gravissima. Vehementes dico corporis exustiones, capitis dolores, fites, vigilias, deliria, inquietudines, & hujusmodi. His ærumnis supra modum afflicta natura pulsatur, atque distrahitur, adeò ut subinde non commodè auspicari judicationem possit. Quin etiam interdum hujusmodi succumbit assaultibus, cum viscera caloribus usta immodicis, munus, roburque amittunt suum: ipsèque furens humor mobilis, atque ad vacuationem paratus, cum dirigi ad commodum exitum a naturâ, tot, tantisque symptomatis exercitâ, ac pæne victâ, haud satîs commodè potest, impetum sæpe in principem partem facit, ac mortis causam præbet. Ut eo quoquè nomine *Hippocrates* judicaret, in morbis acutis, non esse omnino certas salutis, vel exitii notas. Ergo etiam, ut hujusmodi pravos humoris cocti, & ad exeundum parati, impetus præcaveamus, simul, ut undique afflictæ naturæ, dato bonæ vacuationis exordio,

ordio, salutarem opem præstemus, utile fuerit frigidissimum fontem maximâ copiâ ingerere, cujus appulsu hæc oriuntur commoda. Viscera ardentissimæ febris tosta caloribus, temperamentum refrigerii sine noxâ accipiunt, eoque modo nativus solidarum partium calor, recreatus novis jam quibusdam viribus, peccantem humorem aggreditur ad expellendum. Quâ re accidit, ut protinus is humor, jam tum coctus, & evacuationi opportunus, vomitu, vel alvi dejectione, maximèque sudationibus affatim excludatur. Ad quem naturæ motum haud parum etiam juvat Frigidæ vis, quæ naturaliter calorem pellit, fugatque. *Avicennas*, etsi hæc ipsa parum intellexit, usu tamen comperit certo, scripsitque, frigidam aquam, consentientibus reliquis, rem optimam adversus has febres esse: eamque sæpe ad materiæ expulsionem juvare, cum solutione, ut ejus loquitur interpret, naturæ per vomitum, alvi ductionem, aut sudores. Scire autem licet, modò aliam,

liam, atque aliam vacuationem solam, modò duas, & non rarò omnes simul contingere. Vomitus dico, dejectionem, sudores. Curavi equidem hanc viâ ægros haud sanè paucos, qui, cum ad statum pervenissent continuæ febris, ac summâ siti, summisque ardoribus affligerentur, rogati biberene cupiant, ostensum (quò crescerent bibendi desideria) fontem, ipsi in lympham intensissimi, ubi semel, atque iterum, ad libras tres, quatuorve, avidè hausissent, paulò post deicere, vel evomere coeperunt flavissimam cum epotâ aquâ bilem. Post quæ reclinati, ac probè operiti, mox uberrimis sudoribus, totas noctes, vel etiam altissimè dormientes, defluerunt, quibus finitis, omnem in posterum amiserunt febricitationem. Adeò verò apparet, frigidam aquam, ut potum medicinalem, semel dari oportere, non item, ut *Arabes* profitentur, tum adversus sitim, tum ad bilis concoctionem, quotidianæ vice potionis, frequenter sumi licere.





## CAP. III.

*Quæ observationes bibentibus Frigidam sint necessariae.*

**F**Rigidam dare acutè febricitantibus, pæne vulgatum est: verùm commodis id temporibus, & corporibus, & modis dare, haud juxta proclive. Magni ea operis res est, summamque postulat observationem. Bibiturus itaque frigidam, non antè id facere potest, quàm ipsa febris, concocto humore, vacuationique idoneo, ad statum accesserit suum: jamque ipse homo, maximis affectus caloribus, summâque siti, die judicatorio, summum febricitationis impetum experitur. Scilicet tum maximè a naturâ oppugnatur humor, sollicitaturque ad excretionem, quem naturæ conatum ipsa adjutans Frigida vacuationis felicitis dat principium. Minimè

mè etiam per hæc tempora Frigidæ vis, ut ne quid intus lædat, metuenda est : visceribus nimirum febrili ardore exæstuantibus, qui ardor, tanquam propugnaculum, contrario occurrens elemento, impetum ejus omnem debilitat. Quantùm enim, inquit *Galenus*, calor a frigore patitur refrigeratus, tantùm rursus calefaciendo in ipsum agit. Jam verò eâ copiâ bibi aqua debet, quâ potis sit calorem febris superare, materiamque morbi, unà cum naturæ ope, extra corpus fugare, atque propellere. Itaq; iterare etiam, eo tempore, Frigidæ haustum licet, atque ægrum, ut *Galenus* docet, quantùm libet, potare finire, donec notam exhibeat verisimilem alicujus futuræ vacationis. Si minus ejus, quàm oportuit, bibitur, calore id vincitur febrili, & ad morbum addit. Sin vero plus justo sumitur, labefactat nimio refrigerio, tùm ventriculum, tùm jecur. Quare moderari ejus modum oportet, prout corpus est, & morbi magnitudo. Scilicet

*Quâ mensurâ exhiberi debeat Frigida.*

cujusque

cujusque mensura remedii, quia nec dici, ut ille ait, nec scribi potest, Medicinam nostram maximè conjecturalem facit. Quidam quatuor aquæ libras porrigunt. Alii tantisper bibere hominem sinunt, donec refrigescat, acetremat. Ego verò modum ejus censeo temperandum, pro cuiusque ægri naturâ, atque febris vehementiâ. Ferè tamen ea, si adjutura est, bibi ad satietatem debet.

*Quanam  
res biben-  
da Frigidæ  
fiduciam  
addant.*

Scire autem licet, quædam interdum incidere, quæ fiduciam addant Frigidæ liberaliter bibendæ, quædam etiam, quæ, vel cautiùs parciùsque bibendam esse, vel omnino non bibendam doceant. Fiduciam addunt, febris admodum urens: ætas juvenilis: corpus boni habitûs, firmorumque viscerum: atque his (ut ferè fit) junctæ vires: ætas media: consuetudo. Ingens febris ardor, sine noxâ, Frigidæ impetum sustinet. Juvenibus firmum obtigit robur, quod resistere, ac respondere frigidi fontis (ne quid is officiat) occursum possit,



possit, maximè, si corporis quoquè bene habiti viscera sanguine, carnibusque abunde munita sunt. Itaque vires quoquè adesse par est, valentemque naturæ calorem, ne quid, propter hujus impotentiam, frigida aqua intus violet. Sed &, quò impensius frangi vis aquæ possit, æstas facit: quæ, supra morbi ardorem, suos quoquè æstus ingerit in corpus, refrigerio fontis temperandum. Quòd si, præter hæc, etiam assuetus Frigidæ, per secundam valetudinem, æger fuit: confidenter eam ipsam bibit, experientiâ aliàs doctus gelidi occursum elementi familiariter viscera tolerare. Scilicet, si sine offensione aquam frigidam sanus, ac temperatus bibit, quantò magis id futurum est, ubi is ipse maximis caloribus intus forisque tantum non extorretur, cum calores præcipuum munimentum visceribus contra Frigidam præstant. Meminisse etiam convenit, ita assuetis plus bibendum aquæ, quàm aliis hominibus esse, quò efficacior sequatur actio, quæ sem-

per, inter res familiares, ac consuetas, imbecillior est. Itaque, quod consuetudo detrahit, id copiâ fontis pensandum est.

*Quenam  
eam peri-  
culosam  
faciant.*

Proximum videatur ea proponere, quæ gelidam potionem vel periculosam faciunt, vel omnino dehortantur. Obstructio humoris putridi nondum concocti: tumor, dolorque in viscere præcipuo: partis momentaneæ imbecillitas, maximèque, ventriculi, jecinoris, latque lienis: corporis habitus nimium tenuis: infirmæ vires. Quòd cruditati humoris putris, atque obstructioni adversetur aqua frigida, ex ejus apparet viribus, quas suprà fusè expressimus. Scilicet cruda ea est, hærensque in viâ, omnia cogit, sistitque corporis effluvia. Itaque prohibet etiam, ne corruptus humor, obstructis venis, concoqui a naturâ, aut segregari a benigno commodè possit. Quare rectè *Galenus* vetuit, quibus obstructio, putridusve humor non concoctus incommodat, iis ne aqua frigida potui-

detur:

detur. Ergo expectare concoctionem oportet, maximèque in Synochis, ex multo, ac crassiusculo natis sanguine, cum referatis, tersisque meatibus, putris humor victus, ac separatus excretioni patet.

Quamquam in febribus supra modum ardentibus, ac corpus eliquantibus, necessitas interdum cogit, per principia morbi, incrementaque, Frigidam propinare; ut temperamentum ardori, quod maximus est, præstetur: utque materia morbi refrigerescens minùs furere, ac torrere hominem incipiat, meliùsque, ac citiùs idoneâ vacuatione expellatur. Quòd si propter incendium crassiuscula bilis est; tum quidem, ut sumptâ Frigidâ morbus producitur, ita periculossæ exustionis retunditur impetus. Estque hæc extraordinaria, atque coacta Frigidæ propinatio ad exitii avertendum metum. Id ita sæpe feliciter respondisse *Averroës* testatur: præstabiliusque esse censet, febrem lentam, longamque frigido poculo facere, quæ curari possit: quàm ægrum



ardore, magnitudinēque morbi superari finire. Idem sic expressit *Avicennas*: Siquando timetur malitia caliditatis, ac fitis, ut verearis secuturam inde marcidam ariditatem, atque consumptionem, ne prohibeas aquam frigidam. Cruditas enim optatior marcore est: qui subito incumbens, liquefacto ardoribus corpore, hominem consumit. *Galenus* quoque hujusmodi ægris Frigidam per initia porrigebat, antè Ptisanæ cremore nutritis, idque ne in Hecticam inciderent. Extinctâ enim flammâ, rejectâque flavissimâ bile, sæpe malum cedit. Tanti verò periculum is Auctor talium febrium fecit, ut, si inflammatio etiam adsit aliqua (φλεγμονή) *Græci* nominant) nihilo minùs tamen aquam frigidam, quæ huic est inimicissima, præbeat; præstare ratus, inflammationem in præsens augere, quàm hominem finire in hecticam febrem incurrere. Verùm id scire convenit, rarissimè nostratibus hujusmodi febres, ex tenuissimâ, ac sincerâ bile vehementer incensas, ac liquefacti-

vas, accidere ; quoniam, propter naturæ temperamentum, coelique, ac victûs rationem, bona pituitæ pars bili miscetur, unde febres nascuntur minùs acres. *Græciam* verò incolentibus, multoque magis *Arabiam*, propter contrarias causas, eadem genera febrium sunt frequentia ; ideoque plus hîc licentiæ bibendi Frigidam tribui potest. Crassamentum enim, quod hinc materiæ conciliatur, non modò non nocet, verùm etiam, propter bilis tenuissimæ mobilitatem, maximè conducit. Quæ sola res *Avicennæ*, *Razis*, atque *Averrois* confirmare sententiam potest, qui eo nomine in exhibendâ Frigidâ *Græcis* fuere indulgentiores.

Atque hætenus de febribus loquor Febribus intermit-  
 continuis, non autem de intermitten- tentibus  
 tibus: maximè, si has crassus, aut te- Frigida  
 nax humor creat. Siquidem iis, nullo potus nun-  
 unquam tempore, commodare frigida quam con-  
 aqua potest: eò quòd crassa materia, venit.  
 quantumvis concocta, neque promptè,  
 neque tutò possit impetu Frigidæ ad ex-

cretionem impelli. Facilè etiam viscera, haud tantis, ut acutâ in febris, ardoribus occupata, propter occursum gelidi fontis violantur. Et ipsa alioqui febris materia, ut modò dixi, non cedit; sed purgationibus, aliisque auxiliis efficacioribus, ut vacuetur, opus habet. Itaque commodè dixisse video *Galenum*: Aquam frigidam ipsius febris, prout febris est, semper esse remedium; quod verò ad alia spectat, non semper: veluti, cum ex obstructione tenacis, vel crassi humoris, putredo oritur.

*Neque viscerum tumoribus.*

Nunc de tumoribus dicam visceris allicujus præcipui, qui usum Frigidæ omnem dehortantur: utique si schirrus sit, aut phlegmone, aut oedema. Nam erysipelas, inquit *Galenus*, quod quidem genuinum sit, non aliter sanaveris. Si schirrus subest, in jecore potissimum, atque in liene: sumptâ Frigidâ, additur ad morbum; quia obstruit ea magis, ac refrigerando rebelliolem duritiem facit. In phlegmone autem, ipsa quoquè impeditur maturatio, parumque



rumque resolvi ab inflammato viscere, cum Frigida datur, potest. Oedema etiam Frigidâ lædi dubium non est; quoniam morbus, ejusque causa cum Frigidæ consentiunt qualitatibus.

Sequitur partis internæ, quæ quidem momentanea sit, imbecillitas, quæ periculosum Frigidæ poculum facit. Aliis enim gula Frigidâ ita læsa fuit, ut vix deglutiret; aliis ventriculus subfrigidus, & imbecillus, gravem singultum contraxit, maximèque eâ uti non solitis. Nonnullis jecur, aut colon, aut pulmo, aut septum transversum gravem offensam senserunt. Quibusdam, læso genere nervorum, repenti post Frigidæ poculum, difficultas spirandi, & distentio nervorum, & tremor acciderunt. Verum meminisse convenit, hæc incommoda, etsi formidabilem aquam reddunt, nequaquam tamen eam semper per acutarum vigorem febrium prorsus posse dehortari. Præstat enim interdum, epotâ Frigidâ, infirmam partem facere aliquam, simulque hominem

*Imbecillitas partis momentanea Frigidam raro adhiberi solet.*

a gravissimo, maximèque dubio morbo vindicare, quàm, sub vitæ ancipiti spe, tanti cassum auxilii, relinquere. Intueri utrinque incommoda, atque invicem conferre oportet, utra potiùs sequi conveniat, ad humanæ vitæ, vel commoditatem, vel conservationem. Si nocumentum, inquit *Galenus*, ex aquâ frigidâ exiguum erit, confidenter ea potui offerenda est; sin magnum metuitur incommodum, ab hâc fuerit temperandum, aliisque utendum auxiliis.

Itemque

macer habitus, viresque infirma.

Jam etiam corporis habitum videre, priusquam Frigidam exhibeas, oportet; qui, si nimium macer, atque tenuis est, potionem recusat. Etenim facilè viscera crudo elemento feriuntur, non sat probè adversus ejus occursum carnibus, & sanguine munita. Quamquam *Galenus* non usque adè Frigidam formidat, certâ quâdam exhibitam mensurâ, in iis, qui tenuem habitum, ex lassitudine, irâ, vigiliâ, curis, similibusque animi affectibus contraxerunt, indèque inciderunt in febrem, quæ aridam red-

dat

dat cutem, ingentemque habeat calorem. Nimirum fatius videtur, vel cum periculo viscerum aliquo, febrim gelido fonte extinguere, quàm ægrum in Hecticam finire incurrere: maximè, si æstas est, coelumque calidum, & siccum. Jam autem vires quoquè adesse, ut tutò Frigida propinetur, necesse est; nam alioqui, debilitatis internis sedibus, superaret naturæ calorem aqua, minimèque principium inanitionis judicatoriæ faceret. Ejus rei metus facit, quò minùs confidenter decrepitis senibus, aliisve, crebrâ inanitione, vel longâ invaletudine exhaustis, gelidum fontem demus. Atque hætenus satîs superque de frigidâ aquâ dictum videatur: id quod complures Medicos, & cognoscere velim, & semper sequi.





## CAP. IV.

*Quis Victus Vigori Continuæ Fe-  
bris sit necessarius.*

*In Statu,  
exacta ab-  
stinencia  
conducit,  
nisi sum-  
ma sit vi-  
rium im-  
becillitas.*

**Q**Uoniam in Statu natura potentissi-  
mè morbum oppugnat, sympto-  
mataque omnium sunt molestissima, jure  
negari cibus, quantum fieri potest, om-  
nis debet: idque, ne morbo intentam  
naturam, & in ancipiti vitæ edoman-  
do periculo occupatam, distrahamus ad  
cibi concoctionem. Melius enim soli  
humores, quàm simul cum his cibi e-  
vincentur. Quinetiam, propter vim  
symptomatum, parum commodè ali-  
mentum concoquitur; ideoque idipsum  
non modò naturam ab opere avertit  
suo, celeriter, nisi impediatur, victu-  
ram: verùm etiam, benignitate destitu-  
tum

tum concoctionis, corrumpitur, & ad morbum addit. Jam etiam si, ægritudinis intuitu, parcius semper alimentum damus : sequitur planè, ut tum demus omnium parcissimum, cum is est vehementissimus. Neque verò adeò metuere viribus oportet, symptomatum impetu, ut quis existimet, periclitantibus. Nam hæ jam tum pæne majores morbo evasere, concoctâ, evictâque in totum ejus materiâ. Et quæ judicialem inanitionem proximè antecedunt symptomata, ea parum periculorum, quia haud diu immorantur, exhibent; excluso enim maligno humore, protinus conquiescunt. Ergo etiam rectè sic scripsisse video *Hippocratem*: Cum morbi vis est summa, tum vel tenuissimo uti victu convenit. Et paulò post: Ipso vigoris tempore, pauloque ante eum, cibus est adimendus. Exacta itaque abstinencia, vel certè sola hîc conducunt pocula; nisi præcipua quædam nata imbecillitas, necessitatem tenuis dandæ

dandæ forbitionis injecerit. Id dignitati ipsarum tribuitur virium, quibus periclitari incipientibus nunquam non alimento succurrendum est.







DE CURANDIS

FEBRIBUS CONTINUIS,

SECTIO QUARTA,

*Quâ harum comprehenditur Declinatio.*



CAP. I.

*De iis Corporibus, quæ perfectè convalescunt.*



Uæcunque continua febris per absolutam judicationem, com-  
modis ortis vacuationibus, vi-  
gorem superavit suum, ne-  
cessariò decrescens, melioris valetudinis,  
certæ-

*Quid ex-  
pediat a-  
gere in  
Febris De-  
clinatione.*

certæque salutis spem, atque principium facit. Estque id verum ejus decrementum, in quo neminem unquam esse mortuum *Galenus* Auctor est: morbi dico occasione, non novo aliquo Medentis, vel Ægrotantis errore. Hic iste corporis convalescentis status, quoniam morbo jam victo superior est, nullis præcipuorum remediorum irritamentis est sollicitandus, sed probâ ratione victus, qui vires paulatim instauret, sustinendus. Inter quæ tempora, rationem quoquæ aëris: somni, ac vigiliæ: exercitationis, atque otii: alvi ductio- nis, similiumque rerum habere convenit. Ad hæc, viscera quoquæ subinde firmanda, quæ, & morbo, & vacuationum remediis, fuere labefactata. Simul etiam, si quis ardor prioris febricitationis etiamnum insidet, idoneis rebus tollendus est. Adeò verò danda est opera, ut qui, naturæ, artisque nostræ beneficio, longè valere melius homo coepit, modis semel omnibus convalescens, quàm optimè valeat.

Inci-

Incipiam de cibo dicere : qui mediæ *De con-*  
 materiæ esse debet, facilisque concoctu, *valescen-*  
 temperatus (nisi residuus calor subfrigi- *tium Vi-*  
 dum postulet) mediocriter humens, at-  
 que liquidus, succumque præbens bo-  
 num, qui vires facilè tùm tueatur, tùm  
 adjiciat ; cujusmodi sunt, juscula pullo-  
 rum gallinaceorum, atque caporum, vel  
 magis ex his coctis, atque contusis, u-  
 nà cum jure factæ sorbitiones. Cocta  
 quoquè hoëdorum, atque vitulorum ca-  
 ro, ejusdemque juscula idonea sunt. Pti-  
 sana item hordeacea, ex jure pulli con-  
 secta, convenit. Maximè autem stu-  
 dendum est, hujusmodi nutrimentis con-  
 valescentem reficere ; quoniam is ipse  
 exinanitus, spirituumque laborans ino-  
 piâ vitalium, incrementa sanguinis, at-  
 que virium postulat. Siquidem victum  
 in eo nimis tenue meritò *Avicennas*,  
 ut periculofam, damnavit : sæpe inde  
 malum corporis habitum, novamque  
 febrem ait emerfisse. Cibus tamen eâ  
 moderatione sumi debet, ut ne quid  
 copiâ oneret, quæ res gravium sæpe  
 peri-



periculorum ansam præbet. Ferè autem qui sic victitat, ex sumpto alimento nihil, aut corpore, aut viribus proficit; tandemque (nisi abstinentiâ, aut inanitione succurritur) in febrem, vel priorem, vel in aliam novam incidit. Consultum (me iudice, testèque *Avicennâ*) fuerit, convalescentem minimè ad satietatem esse finire: verùm, immorante etiamnum esitandi desiderio, epulis jubere desistere. Illud quoque rectè præcipitur; quoniam vacuatum corpus, atque extenuatum uberem instaurationem postulat, eam tamen attritæ vires non ferunt, cibum pauciozem, multis vicibus, dari oportere: semperque propiùs ad secundam progressis valetudinem plus cibi, ac paucioribus intervallis indulgeri, donec ad pristinam sanorum hominum tùm valetudinem, tùm cibationem perventum sit. Quæ tempora ita moderanda sunt, uti *Hippocrates* præcepit: Quæ lentè, inquit, extenuata sunt corpora, lentè reficere oportet: quæ contrà, breviter.

Porro

Porro utile poculum, mediocris ætatis, atque substantiæ, probè cocta cervisia est; itemque vinum album, ac tenue, vel odoriferum, aquæ fontanæ, aut hordeacæ mistum. Præfrigida autem aqua, quia visceribus officit extenuatis, rejicienda est. Ut in cibo, ita & in potu intemperantia, atque nimia abstinentia inutilia sunt. Alterum enim recidivæ hominem exponit, alterum hæcticæ maciei. Illud apprimè cavendum est, ut ne quid nimis, cum cibis sumitur, bibatur. Nam sic is ipse innataret, a ventriculi corpore, propter interpositum humorem, non comprehensus. Iraque inter epulas contrahenda sunt pocula, ac tantillum humoris indulgendum, quod & linguæ molestiam soletur, & sitim levet. Concocto autem cibo, fas est liberè aliquid bibere: nam celerrimè id per corpus digeritur.

Proximum est de aëre dicere, qui *De Aëre.* temperatus esse debet, ne vel nimio calore ardores augeat, referatve febri-  
les: vel superfluo frigore extenuatis,

P

atque

atque inanitis visceribus officiat. Parum tamen refrigerii accipere eum fas est, si quid ardoris etiamnum inhærescit.

*De Som-  
no.*

Somnus convalescentibus apprimè est necessarius, utique noctu post sumptum coenæ alimentum. Sic enim corpus efficaciter humectatur, superiore ficcato febre, instauratisque succis, ac spiritibus, vires acquirit meliores. Itaque etiam vigilia, quia exsiccat, ac vim hominis atterit, inimicissima est. Nunquam dormire is, qui convalescit, nisi post sumptum cibum debet, quoniam qui vacuo somnus fit ventriculo, vacuisque venis, corpus exhaurit, arefacitque.

*De Exer-  
citio.*

Exercitii verò, atque otii moderata, ac viribus respondens vicissitudo est utilis. Exercitium tamen leve esse decet, putà, gestationis, aut lentæ per cubile inambulationis. Molles quoque extremorum frictiones membrorum juvant; implent enim corpus, ac naturæ excitant calorem. Porro instaurationis



tio corporis (quia superioribus id ærumnis emacruit) vehementer necessaria est.

Inutilis autem omnis habetur inani- *De Purgatione, caterisque vacuationibus.*  
tio, præter unicam dejectionem ventris, qui convalescentibus, propter siccitatem intestinorum, astringitur. Nequaquam autem purgatorium esse medicamentum licet (quod *Græci καθαρῶν* appellant) sed lenitivum, ac sterco-  
rarium (quod *ἐκκοπρωτικὸν* dicunt) cujuscumque recens extracta est cassia, jufculo pullo gallinacei, vel hordei decocto soluta; itemque electarium lenitivum, diapruron solutivum, diacatholicon, manna, & id genus alia. Ad eandem rem emollientes etiam faciunt clysteres, ex pinguibus jufculis, cassiâ, oleoque violaceo facti. Suos *Galenus* ex sincero parabat oleo. Scire autem licet, minimè frequentem usum horum lenitivorum esse licere: maximè, quæ movendi ventris causâ, per os dantur, ne scilicet crebrâ dejectione (quæ tum certè inutilis est) corpus ali definat, de-

fluente unâ succo meliore. Ut nulla non vacuatio, præter moderatam, uti præcepi, dejectionem, convalescentibus incommoda est: ita maximè Veneris, quæ affatim vitæ spiritus profundit, viresque tenui in corpore dissipat. Porro jucundis etiam rebus occupari convalescentis animus debet: unde vis naturæ, spiritusque vitales eriguntur; tristis autem sollicitudo, quoniam ficcatur, nocet.

*De fir-  
mandis  
visceribus.*

Nunc de firmandis dicam visceribus, quorum vis multum a morbo laceffita, laxatâque fuit. Materiæ autem, mediocri præditæ astrictione, atque refrigeratione, ejus beneficium roboris præstant. In quo numero sunt electarium diarhodon, diacorallion, pastilli ex rosis, ex spodio, & hujusmodi. Sæpe etiam ubi calores defunt, ipsæque, prioribus remediis refrigeratus, ventriculus parum concoquit, utile est aromaticum rosatum. Cæterum, nullo alio febris acutæ tempore, talium materierum usus esto, quàm declinationis, idque me-

tu astrictionis, quæ illis inest. Ea si-  
quidem, ut convalescentibus (utpote  
morbi materiâ jam exoneratis, ac de-  
bilibus) utilis est: ita aliis, qui adhuc  
dum vim morbi experiuntur, retento  
humore corrupto, prorsus adversatur;  
nisi si tamen effusæ alicujus incide-  
rit vacuationis symptoma, quod sine  
modo vires resolvat: effrænatum dico  
vomitum, alvi fluxum, atque sudo-  
rem.

Atque huc usque de iis locuti sumus  
hominibus, qui, absolutam experti ju-  
dicationem, integrè, atque plenè con-  
valescunt. Quare posthac eorum pro-  
ponam constitutionem, atque provisio-  
nem, qui, quoniam diminutè fuere ju-  
dicati, non commodè convalescunt,  
inappetentiæque, defectæ nutritioni,  
ardoribus, recidivæ, cæterisque vitiis  
sunt obnoxii.





## CAP. II.

*De iis, qui, propter diminutam  
Judicationem, haud probè con-  
valescunt.*

*Post im-  
perfectam  
Crisin,  
nullâ ferè,  
nisi per  
purgatio-  
nem, va-  
cuatione  
utendum  
est.*

**Q**Uæcumque judicatio materiam morbi non exhausit, multâ ejus in corpore relictâ parte, imperfectam, atque symptomatis molestantem declinationem exhibet. Tum enim homo, assumptis etiam commodis, justisque epulis, neque alitur, neque firmatur, ardores etiam experitur, quàm par sit, majores. Protinus tum vacuante medicamento, si humor idoneus est purgationi, succurrere oportet, quod prioris morbi extrahat reliquias. Quod ni fiat, in foribus erit vel abscessus, vel recidiva. Semper medicamentum parari, pro materiæ naturâ, ac virium modo, debet. Vomitus autem omnis

*inutilis*

inutilis est, nisi si corruptus aliquis humor stomachum occupat. Sæpe autem venæ per ea medicamenta commodè repurgantur, quibus urinas cieiendi facultas obtigit. Id quod tum sequendum est, cum naturæ vi corruptus humor ad ductus urinarios impellitur. Sanguinis verò missio prorsus fugienda est, cum propter materiæ rationem peccantis, tum propter vires, quæ præteritis vacuationibus vehementer fuere labefactatæ. Quò magis *Avicennam* demiror, qui etsi rectè dicit sanguinis missione parum egere convalescentes: in eo tamen fallitur, quòd venam, propter sanguinis vitium, tum incîdat, propter id, quod, veluti assatum ex malis humoribus, in sanguine remansit; ideoque necesse esse ait, ut extrahatur sanguis ejus malus, & cumuletur bonus. Quasi verò humoris vitium non solâ tolli debeat purgatione, ac quasi promptum sit, atque in hominum positum manu, dissectâ venâ, corruptum humorem effluere sinere, meliore san-

guinis particulâ intus manente. Neque verò hîc solùm, utî liquet, peccâsse *Arabem* constat: verùm in ipsarum etiam æstimatione virium, quæ convalescentibus, propter debilitatem, mittendo sanguini sunt impares. Ut ne dicam etiam nequaquam tum magnum morbum (quod alter est secundæ venæ scopus) esse posse, ùt cujus vehementior jam tum cessavit impetus.

*Victus  
subtenuis  
esse debet.*

Porro, quod ad victum pertinet eorum, qui imperfectè convalescunt, scire licet, subtenuem esse oportere, donec, exhausto humore, felicioris nutritionis præbeantur exordia. Rectè siquidem dixisse video *Hippocratem*: Impura corpora eò magis offendi, quò magis aluntur. Postquam materiis morbosus homo erit probè exoneratus, ita dein omnibus in rebus haberi, tractarique debet, utî suprâ de iis, qui exactè convalescunt, præceptum est.





# I N D E X

## C A P I T U M.



De CURANDIS

FEBRIBUS CONTINUIS,

SECTIO I,

Quæ earum continet

PRINCIPIUM.

CAP. I.

II. *DE* Missione Sanguinis. p. 4.

III. *Quâ Mensurâ acutè Febricitantibus Sanguis debeat mitti.*

22.

IV. *Quo*

IV. *Quo Tempore per Febres Continuas Sanguis mitti debeat.*

P. 43.

V. *Quæ Vena per Febres Continuas secanda sit; quidque, inter Sectionem, & post, agendum.* 70.

VI. *Quæ Viçtûs ratio in genere Febrium Continuarum servanda sit.* 75.

VII. *Genera quædam, itemque formæ Alimentorum, quæ acutè Febricitantibus dari possunt.* 91.

VIII. *De Potionibus acutè Febricitantium.* 99.

IX. *Quæ Viçtûs ratio Principio Febris acutæ conveniens sit.* 104.

X. *Quomodo Materia Febrium Continuarum concoquenda sit.* 109.

## SECTIO II,

Quæ Februm Continuarum comprehendit  
INCREMENTUM.

CAP. I. *De Materia Purgatione.* 122.

II. *Quid a Purgatione agendum, & quomodo fervor acutæ Febris temperandus sit.* 137.

III. *Quomodo gravioribus Symptomatis acutæ Febris occurrendum sit.* 143.

IV. *Quæ Victus ratio per Incrementum Continuae Febris servanda sit.* 159.

## SECTIO III,

Quæ Februm Continuarum complectitur  
STATUM.

CAP. I. *De Vacuationibus Judicatoriis.* p. 162.

II. *De Aquæ frigidae potione* 170.

III. *Quæ observationes bibentibus Frigidam sint necessariae.* 182.

IV. *Quis*



IV. *Quis Victus Vigori Continuæ  
Febris sit necessarius.* 194.

SECTIO IV,

Quâ Februm Continuarum comprehenditur  
DECLINATIO.

CAP. I. *De iis, Corporibus, quæ per-  
fectè convalescunt.* p. 197.

II. *De iis qui, propter diminutam  
Judicationem, haud probè con-  
valescunt.* 206.



# Catalogus Librorum prostantium apud GUL. & JOH. INNYS.

**H**ippocratis de Morbis Popularibus Liber primus & tertius Gr. Lat. His accommodavit novem de Febris Commentarios Joannes Freind, M. D. Coll. Med. Londin. & Societatis Reg. Socius, 4to. 1717.

*Emmenologia: in quâ Fluxûs muliebris menstrui Phenomena, Periodi, Vitia, cum medendi methodo, ad Rationes Mechanicas exiguntur, Authore Joh. Freind, M. D. Coll. Med. Londin. & S. Reg. Soc. 8vo. Edit. 2. 1717.*

*Prælectiones Chymicæ, in quibus omnes fere Operationes Chymicæ ad vera Principia & ipsius Naturæ Leges rediguntur, Ann. 1704. Oxonii, in Museo Ashmoleano habitæ, à Johanne Friend, M. D. Æd. Christ. Alumn. 8vo.*

*Sanctorii Sanctorii de Staticâ Medicâ Aphorismorum Sectiones septem cum Commentario Martini Lister, 12mo. 1716.*

*Pharmacopœia Extemporanea, sive Prescriptorum Chilias, in quâ Remediorum elegantium & efficacium Paradigmata, ad omnes fere medendi Intentiones accommodata candidè proponuntur; unâ cum viribus, Operandi ratione, Dosibus & Indicibus annexis. Editio quinta longè auctior & emendatior, per Tho. Fuller, M. D. 12mo. 1714.*

*Pharmacopœia Extemporanea: Or a Body of Medicines, containing a thousand select Precepts answering most Intentions of Cure; to which are added useful Scholia, a Catalogue of Remedies, and a copious Index for the Assistance of young Physicians; the second Edition with large Additions by the Author Tho. Fuller, 8vo. 1714.*

*Pharmacopœia Colleg. Reg. Londini Remedia omnia*

*nia succincte descripta. Editio quarta, per J. Ship-ton, 12mo, 1711.*

*Processus integri in Morbis ferè omnibus curandis nec non de Phthisi Tractatula, Editio quarta à Thoma Sydenham, M. D. 12mo, 1712.*

A Treatise of the Asthma in four Parts, containing 1. A History of the Fits, and the Symptoms preceding them. 2. The Cacochymia which disposes to the Fit, and the Rarefaction of the Spirits which produces it. 3. The accidental Causes of the Fit, and the Symptomatic Asthmas are observed. 4. The Cure of the Asthma Fit, and the Method of preventing it is proposed, &c. By Sir John Floyer of Litchfield, Kt. the second Edition corrected, 8vo. 1717.

*Specimen Physico-medicum, de Corpore humano, & ejus morbis; or an Essay concerning the Knowledge and Cure of most Diseases afflicting human Bodies; to which is annex'd a short Account of Salivation and the use of Mercury. By P. Paxton, M. D. 8vo.*

A System of rational and practical Chirurgery; wherein all the general Intentions, whether natural or artificial, are accounted for and explained, according to the Corpuscular Philosophy, and the evident Qualities of Medicines; together with the Causes, Diagnosticks, and Method of Cure of Tumours, Ulcers, Wounds, Fractures and Dislocations. To which is added, an Index of Medicines, and their evident Qualities. By Richard Boulton, late of Brazen-Nose-College in Oxford, 1714, 8vo.

*Boerhaave's Aphorisms concerning the Knowledge and Cure of Diseases; translated from the last Edition. Printed at Leyden 1715. with useful Observations and Explanations, 8vo. 1715.*

The History of Cold Bathing both Ancient and Modern, in two Parts. The first by Sir John Floyer of Litchfield, Kt. The second treating of the genuine use of Hot and Cold Baths; together with

with the wonderful Effects of the Bath Water drank hot from the Pump, in decay'd Stomachs, and in most Diseases of the Bowels, Liver, and Spleen, &c. The fourth Edition, with Additions. By *Edward Baynard*, M. D. 8vo. 1715

*De rectâ Sanguinis Missione*: Or, new and exact Observations of Fevers, &c. By *J. White*, M. D. 8vo. 1712.

Philosophical Transactions, giving some account of the present Undertakings, Studies, and Labours of the Ingenious, in many considerable Parts of the World. Vol. 29. for the Years 1714, 1715, 1716. continued and published by *Edm. Halley*, J. V. D. Savilian Professor of Geom. Oxon. and Reg. Soc. Secr. 4to. Where may be had complete Sets, or any single Numbers.

*Anthropologia Nova*: Or a new System of Anatomy, describing the Animal Oeconomy, and a short Rationale of many Distempers incident to human Bodies. Illustrated with above fourscore Figures drawn after the Life, by *James Drake*, M. D. late Fellow of the College of Physicians and Royal Society. The second Edition corrected; with a Preface by *W. Wagstaffe*, M. D. and Reader of Anatomy at Surgeon's Hall, in 2 Vol. 8vo.

*Traſtatus de Fœtu Nutrito*: Or, a Discourse concerning the Nutrition of the *Fœtus* in the Womb, demonstrated to be by Ways hitherto unknown. In which is likewise discover'd the Use of the Gland *Thymus*, with an *Appendix*: Being some practical Animadversions on the Food of Children newly born, and the Management of the Milk of Women. By *F. Bellinger*, of the College of Physicians, 8vo.

*Joannis Raii, Synopsis Methodica Avium & Piscium; Opus Posthumum, quod vivus recensuit & perfecit ipse insignissimus Author: in quo multas species, in ipsius Ornithologiâ & Ichthyologiâ desideratas, adjecit: Methodumque suam Piscium Natura*  
magis



magis convenientem reddidit, cum Appendice, & Iconibus. 8vo. 1713.

Essays on several Parts of the Animal Oeconomy, by James Keil, M. D. The second Edition, corrected and enlarged, 8vo, 1717.

Pharmacologia, seu Manuductio ad materiam Medicam, in qua Medicamenta Officinalia Simplicia, hoc est, Mineralia, Vegetabilia, Animalia eorumque partes in Medicina Officinis usitata, in methodum naturalem digesta succincte & accurate describuntur, opus Medicis Philosophis, Pharmacopœis, Chirurgis, &c. utilissimum. Iterata Editio, emendata & aucta, à S. Dale. 2 Vol. 12mo. 1718.

M. Lister octo Exercitationes Medicinales; quorum 1. de Hydrope, 2. de Diabete, 3. de Hydrophobia, 4. de Lue Venerea, 5. de Scorbuto, 6. de Arthritide, 7. de Calculo Humano, 8 de Variolis. Editio secunda aucta. 12mo.

Glandularum Quarundam, nuper Dissectarum Ductuumque earum Excretoriorum Descriptio, cum Figuris à Gulielmo Cowper, 4to.

Praxeos Mayernianæ in morbis Internis, præcipue gravioribus & chronicis Syntagma——Ejusdem Syntagm. alterum, 1. de Febris, 2. de Morbis Internis, 3. de Arthritide. 4. de Lue Venerea, 2 Vol. 8vo.


Medicamentorum Εὑρησιών Thesaurus, succincte comprehendens, ad omnes fere totius microcosmi morbos, Experta nec non Specifica Remedia, ex celeberrimis tam veterum quam Neotericorum Scriptis excerpta, ordineque Alphabetico digesta. Opera & cura Jo. Cruso, 12mo.

M. Lister Exercitatio Anatomica, in qua de Cochleis maxime Terrestribus, & Limacibus agitur, omnium Dissectiones Tabulis æneis, ad ipsas res affabre incisis illustrantur, 8vo.

———Exercitatio Anatomica altera, in qua maxime agitur de Buccinis Fluvialibus & Marinis, &c. cum Figuris, 8vo.











$$\frac{c}{f}$$



